

**DIT IS TYD OM
TE VERANDER**

Christo Nel

INHOUD

INLEIDEND	4
GENEES ONS LAND, HERE!.....	5
OPPAD NA GENESING	8
WANNEER SIEN MENSE WEER GOD RAAK?.....	9
GOD SE PLAN VIR GENESING EN ONS BEDIENING AAN MEKAAR.....	11
DISSIPELWEES IS OM JESUS SE VOORBEELD TE VOLG	16
'N BEKRAGTIGDE CHRISTELIKE LEWE.....	18
DIE KONINKRYK EN DIE KRAG VAN GOD.....	20
DIE EVANGELIE EN DIE KRAG VAN DIE KRUIS-VERLOSSING EN OPSTANDING VAN CHRISTUS JESUS.....	23
BEDIENING VAN DIE NOOD VAN MENSE: SIEKES	25
BEDIENING VAN DIE NOOD VAN MENSE: VERLOS ONS VAN DIE BOSE.....	27
MAAK ONS VRY VAN GEESTELIKE SCHIZOPHRENIA!.....	30
GEESTELIKE VASSTAAN - 'N BYBELSE PRENTJIE OOR DEMONE EN ONS GEESTELIKE WAPENS	33
BEKERING.....	35
DIE HERE NEEM ONS NA 'N HOËR VLAK	38
GOD IS BESIG OM SY BRUID TE RESTOREER	40
SAAI EN OES.....	45
RESTOURASIE: WORD VRY EN HEEL	50
HOE VERANDER 'N GELOWIGE SE OPTREDE?.....	52
SOGENAAMDE GENERASIE-BINDINGE.....	54
ONBEANTWOORDE BEHOEFTE, ONGENEESDE SEER EN ONOPGELOSTE SAKE	55
VERHOUDINGE	59
SIELSKRAG EN SIELSBANDE.....	61
BEGIN DOEN WAT JY MOET DOEN	63
KOM ONS MAAK ALLES VAS	65

IS JY GEREED VIR DIE TOEKOMS WAT GOD VIR JOU INGEDAGTE HET?	67
GOD SE PLAN VIR GEMEENTE-WEES	69
EKKLESIA IS OM	72
JESUS LEWE IN JULLE	75
CHRISTEN-WEES SOOS DIE WOORD ONS LEER!	76
DIE LEWE VAN CHRISTUS IN ONS	77
HOE OM IN HIERDIE OORWINNING TE BEGIN STAP	78
OORGAWE	79
GLO	81
DIE TOETS VAN JULLE GELOOF	82
GROEI.....	83
OORWINNING.....	85
ALGEHELE TOEWYDING	86
DIE JESUS-LEWE	87
LEWE BO-NATUURLIK IN HIERDIE LEWE!.....	92
LEWENSERVARINGE IN DIE WILDERNIS.....	93
BEDOEL OM ANDER TE BEDIEN	94
STAAN OP EN DOEN WAT GOD GESÊ HET...	97

INLEIDEND

Een van my vriende se geliefde sê-goed is om te sê: God is so lief vir ons ... Maar Hy is te lief vir ons om ons te los soos ons is!

G'n wonder die Here is van alle kante af besig om met Sy mense te gesels oor die noodsaaklikheid om te verander.

Kom ek deel met jou dit wat gelowiges dwarsdeur die wêreld tans hoor waarvoor God wil hê ons moet Hom vertrou.

GENEES ONS LAND, HERE!

2 KRON 7:14-16

“..en my volk oor wie My Naam uitgeroep is, toon berou en bid en vra na my wil en draai terug van hulle borse weë af, sal Ek luister uit die hemel en hulle sonde vergewe en hulle land laat herstel. Ek sal hierdie plek nou onder my sorg neem en ontvanklik wees vir elke gebed hiervandaaan. En nou kies Ek en heilig Ek hierdie tempel sodat my Naam altyd daar sal wees, en dit altyd my sorg en liefde sal geniet”

In Jak 4:7-10 staan daar “Onderwerp julle dan aan God. Staan die duiwel teë en hy sal van julle af wegvlug. Nader tot God en Hy sal tot julle nader. Was julle hande, sondaars, en reining julle harte, huigelaars. Bekla julle ellendes, treur en huil! Laat julle vrolikheid in rou verander en julle blydschap in droefheid. Onderwerp julle in nederigheid voor die Here, en Hy sal julle verhoog”

Om jou voor God te verneder beteken nie om jouself as ‘n wurm te sien nie, maar om doodgewoon jou regmatige plek voor God in te neem. Om God weer as ‘n realiteit te sien, as die Koning van die konings, en onself en almal om ons as skepsels voor Sy aangesig. Om weer Sy gesag en outoriteit oor ons lewe en ons w^reld onvoorwaarlik te erken en te bely. Maar daarmee saam ook te bely dat ons in soveel areas gerebeleer en ongehoorsaam was aan Sy riglyne met die verskriklike gevolge as gevolg daarvan.

Sondebelydenis en klein-word voor God is die deur waardeur God se seën vir jou eie lewe en genesing vir ons land kan stroom.

Om presies te verstaan wat God bedoel, moet ons net weer ‘n paar basiese terme vir mekaar verduidelik:

Sondebelydenis: Om bereid te wees om - op aandrang van die Gees van God in ons - enige ongehoorsaam, of onregmatige optrede of enigiets wat dalk ander kon seermaak in my eie lewe of in die lewe van die groep mense waarvan ek deel is, te erken.

Bekering: Wegdraai van en ophou met sulke liefdelose optrede, en begin om God se riglyne in die verband te gehoorsaam.

Versoening: Om vergifnis vir mekaar te vra en te gee, en nuwe liefdesverhoudinge te soek met mense met wie jy voorheen kwaai-vriende of vyande was.

Restitusie: Pogings om dit wat versteur was of verbreek was, te herstel, en daarna te streef dat reg en geregtigheid sal geskied in die mate waartoe ons daartoe instaat is of instrumente het om dit te laat gebeur.

Vernuwing: Die vernuwingswerk en nuwe lewe in my en ander in die Liggaam van Jesus se lewens is die gevolg van die werk wat die Gees van God in ons lewens doen.

Herlewing: Dit is wanneer God deur die werking van Sy Gees op ‘n soewereine wyse mense en gemeentes kom besoek in Sy heerlikheid en met Sy krag. Herlewing is dus nie soseer geboue vol mense nie, maar eerder mense vol van God en Sy heerlikheid.

Reformasie: Dit is as die samelewing en gemeenskap op alle terreine begin in lyn kom met wat God se hart vir ons is.

God se hart vir die hier en nou in ons en ons land, is dat hierdie begrippe letterlik die een na die ander moet begin vloei: 'n Sondebelydenis wat sal lei na bekering, wat weer sal lei na 'n soeke na versoening en restitusie, wat weer sal uitloop in vernuwing, herlewing en reformasie.

Ek hoef nie die realiteit van sonde en die tragiese gevolge daarvan in ons eie lewe, in die Liggaam van Jesus en in hierdie land vir jou in detail te teken nie; dit ken ons almal maar te goed. Maar hoe gemaak daarmee? Hoe verander ons dinge? Hoe verander ons so 'n wêreld wat so lyk om ons? Die Bybel sê in die mate wat ons God toelaat om ons te verander sal die wêreld om ons ook begin verander. God begin altyd by ons.

Kom ons kyk dus wat sê God vir ons oor sonde.

Die Bybel het net een opdrag wat ons met sonde kan doen en dit is dat dit bely moet word. Die Skrif is baie duidelik daarvoor dat as iemand gesondig het, moet hy dit bely en God se vergifnis vra. As hy teen iemand anders gesondig het, moet hy gaan en daardie persoon of persone gaan vra om hom te vergewe (Mat 5:22-26). Die probleem is egter wat gebeur as die persoon of persone wie verkeerd opgetreë het of gesondig het, al klaar dood is? Wie moet dan belydenis van sonde doen? Die logiese antwoord is dat die huidige geslag dit dan moet doen. 'n Mens vra dadelik: Is daar enige Skrifbewyse hiervoor?

Heb 9:22 stel dit baie duidelik dat daar geen vergifnis van sonde kan wees sonder die vergieting van bloed nie. Vergifnis vind dus nie plaas net omdat daar tyd verloop het na die sonde wat gepleeg is nie. God kan alleenlik mense, en selfs 'n geslag mense vergewe vir sondes wat twee dae of vyf jaar of vyfhonderd jaar gelede gepleeg is, as ons dit bely en op grond van die gestorte bloed van Christus om vergifnis pleit.

Dan 9:4 tot 20 is 'n goeie voorbeeld van so 'n belydenis namens ander. Hier sien ons Daniël bid in die 67ste of 69ste jaar van ballingskap. Die volk van God was juis in ballingskap a g v die opgehoopde sonde en opstand teen God van baie honderde jare vooraf. Die sondes van die geslagte vooraf het letterlik die land so bevuil dat God, getrou aan Sy waarskuwings in Sy Woord, sy volk in ballingskap moes wegstuur. Die ballingskap was juis om hulle weer op die punt te bring om hulle sondes te besef en te bely. Daardie sondes was die sondes van die huidige geslag maar ook die sondes van al die geslagte voor hulle ook. En dit was die huidige geslag wat dit moes bely.

Daarom lees ons hoe Daniël en sy geslag as't ware namens die vorige geslag voor God gaan staan en hulle assosieer met daardie sonde om dit dan te kan bely. Kyk bv na vers 5, 8, 16, en 20. Sien jy hoe hy telkens sê "ek" en "ons" as hy die geslagte vooraf se sondes bely.

In Jes 24:5-6b lees ons hoe die sondes van mense 'n land bemors voor die aangesig van God. Vir God, om dus weer in genade daardie land te herstel, is belydenis, bekering, versoening en reformasie nodig. En dit is presies wat ons lees gebeur daar in Dan 9 en wat op 'n nasionale skaal onder Nehemia se toesig, daar in Neh 9 en Esra 9, voortgesit word.

Ons sien ook hoe Nehemia, daar in hoofstuk 1:6 tot 11, namens sy voorvaders sondes bely en hoe die huidige geslag daar in Neh 9:2, hulle eie en die voorgeslagte se sondes bely.

Kom ons blaai nou na Eseg 22. Hier het ons te make met 'n verkondiging van God se oordeel oor die volk.

Dit handel met die bemorsing van 'n stad voor die aangesig van God deur afgodsdienste (vers 4), onregverdigde winste en bloedvergieting wat daar plaasgevind het. Esegïel wys ook op die verbreking van die verbondsooreenkomste soos ooreengekom in Deut 27 (vers 7,24 en 29). En dan lees ons die bekende verse daar in hfs 22:30 en 31 van hoe God dan iemand soek om in die gaping te kom staan tussen Hom en die volk sodat Hy nie die stad hoef te vernietig nie. En die taak van so 'n persoon is dan om te kom pleit vir en namens die stad en sy mense. Hy moet belydenis kom doen vir die sondes van daardie stad en sy mense. Soos wat Esegïel self moes doen daar in Eseg 4:4 en 6. Vir 40 dae moes hy die sondes van Juda bely en 390 dae vir Israel s'n sodat God hulle genadig kon wees.

Identifikasie met die sondes en die ellende van die mense om ons is een van ons hooftake as die nuwe geslag priesters in Jesus. As priesters is dit ons taak om na God te kom met gebede en voorbidding vir ons families, geslag, generasie, nasies ens. En moet ons, op grond van die werk van Christus aan die kruis, vergifnis vir hulle pleit. Die enigste manier hoe ons die bande kan breek waarmee Satan ons geslag en die mense van hierdie land bind, is deur sondebelydenis, bekering, vergifnis, versoening en restitusie. Hierdie dade vind aanklank in God se hart en is die deur waardeur Sy heerlikheid en Sy krag weer binne kan kom en onder ons kan kom werk.

Ons moet beseef dat nie enige mens so in die gaping kan gaan staan nie. Net Christene kan dit doen. Net Christene wat klaar bedek is met die bloed van die Lam kan gaan intree voor die troon van die lewende God vir mense. Net gelowiges en geestelike leiers sal deur identifikasie met die sondes van mense namens hulle voor God kan gaan pleit vir vergifnis. En dan kan die krag van die genadewerk van Jesus en die versoeningswerk wat Hy aan die kruis verrig het, instroom in die huidige geslag mense se lewens. Deur sondebelydenis van die sondes van die voorgeslagte kan die vloek van God van mense verwyder word, en kan die houvas van Satan en sy magte gebreek word op mense, op stede en op 'n land. Dit was immers ons sonde wat vir die bose die reg en houvas gegee het in ons eie lewe en die lewens van ander. (Ef 4:27).

Kom ons doen dit prakties vandag. Kom ons gebruik tyd om voor God se aangesig te verskyn om ...

- Hom te loof, te aanbid en te dank
- ons voor Hom te verneder
- ons sondes te bely
- die sondes van ons groep en die nasie te bely
- te luister hoe ons versoening met mekaar moet soek
- te bid dat God ons land sal genees
- in te treë vir ons land, die regering en alle mense in hierdie land
- te bid vir herlewing
- te bid vir die redding van mense
- te bid vir arbeiders vir die oes op die lande.

OPPAD NA GENESING

Dit tref my hoe siek en stukkend mense is. Hoe die wêreld van alle kante met antwoorde vir die seer kam maar nie werklik die wortels van die seer bedien nie.

In Jes 9:6 noem God die Messias wat oppad is, 'n Wonderlike Berader of Dokter. En in Joh 14:16 noem hierdie Messias, Jesus, die Heilige Gees wat kom ook 'n Wonderlike Berader of Trooster.

As ons gebind is deur vrees en twyfel, is God self daar om ons te bedien. Hy doen dit deur Sy Woord en Sy Gees, maar ook deur die bediening van Sy gelowige Liggaam om ons.

Daarom die oproep aan gelowiges om mekaar te bemoedig, mekaar se laste te dra, mekaar te bedien, vir mekaar te sorg en vir mekaar lief te wees.

Daar waar ons so met mekaar besig is – selfs as beraders – kom ons op 'n punt wat ons besef ek kan nie werklik mense vry maak van seer en sieklike gewoontes nie. Ek kan nie mense oortuig van wat reg en verkeerd is nie. Ek kan hulle nie werklik bedien met die “salf van Gilead wat hulle kan genees nie.

Net God kan dit doen!

Daarom is ons roeping as broers en susters, om mekaar gedurig terug te begelei na die voete van Jesus. Net Hy maak werklik heel en nuut.

Die oplossing van mense se seer is nie nog 'n klompie formules of resepies nie. Die oplossing is dat hulle weer God moet leer raaksien in hulle lewens en Hom alleen moet leer vertrou met hulle seer en probleme.

Baie van ons seer is juis omdat ons nie meer God raaksien, ervaar of hoor vir wie Hy is nie. Daarom wil ek jou 'n paar treë nader begelei om weer God raak te sien. Om Hom weer te ontmoet as die beste berader, en Sy aanraking te beleef sodat jy kan heel word.

Mense beleef 'n waar-word van Jes 61:1 ev se gebeure in hulle lewens as hulle God weer kan sien.

En ons is werklik eers lig in mense se lewens as ons lewens en woorde getuienis is van 'n God wat lewe, wie se woord waar is, by wie daar verlossing en genesing is.

WANNEER SIEN MENSE WEER GOD RAAK?

1. As Hy Homself aan hulle vertoon

- 2 Kon 6:17 – Daar waar God Homself deur ‘n prentjie of ‘n visoen aan jou vertoon, soos aan Elisa se bediende: vroeg op sy nugter-maag toe hy net vyand oral om hom raakgesien het. En dit verander jou kyk na dinge. Dit verander jou perspektief. Waar daar eers vrees was, is daar skielik hoop en geloof, omdat jy God gesien het.
- Op 4:1,2 – Daar op die eiland Patmos waar Johannes as gevangene gewerk het in die steenkoolmyne, weg van sy vriende en gelowige broers en susters – en dalk ook maar getwyfel het – sien hy God op die troon ten volle in beheer van sy en ‘n hele wêreld se geskiedenis. Wat ‘n troos!
- Hand 7:55,56 – Stefanus is besig om onder die klippe te sterf. Hy het ‘n keuse: of om kwaad te word en te voel God het hom “gedrop”, of te twyfel. Maar dan sien hy Jesus ten volle in beheer. Wat vir hom staan en wag.
- Dit is interessant om te lees dat die profeet in die Ou Testament “siner” genoem is, omdat hulle God gesien en gehoor het. Maar dit was maar enkeles wat daardie voorreg gehad het.
- Terwyl die Nuwe Testament se goeie nuus dan is – volgens 1 Kor 14 – dat God se begeerte is dat al sy nuwe kinders in Jesus, deur die werking en krag van die Heilige Gees, almal profete sal wees wat God kan sien en hoor.

2. In Sy Skepping

- Rom 1:20 – In die sonskyn, reën, wind, see, blomme, Somer en Winter kan ons die realiteite van ‘n lewende God sien.

3. In omstandighede

- Rom 8:28 – As dinge goed gaan is dit maklik om te beleef God is goed. Veral as hulle jou salaris verhoog, of jy lekker vakansie hou, of lekker geslaap het. Maar as die papaja in die waaier beland en jy jou werk verloor, of siek is, of die een of ander tragedie julle oorval, sukkel die meeste van ons om hierdie vers werklik te glo. Wat nog te praat van Habakuk daar in hoofstuk 3:17 tot 19 na te sê!

4. In jou geestelike groei

- 1 Kor 1:30 – Die feit dat ek groei in geregtigheid en heiligheid is net omdat ‘n lewende, getroue God daaglik met my besig is.

Maar ten spyte van al hierdie plekke en maniere om iets van God se realiteit raak te sien, is ons soms so stiksienig of besig om ons blind te staar teen fisiese berge voor ons, dat ons moet bid dat God tog genadiglik Homself duidelik aan ons moet vertoon. Soos Ef 1:17,18 en Ps 119:18 ons leer.

Moet ons bid: Here, maak tog my oë oop dat ek kan sien ... ten spyte van my twyfel, vrees, sonde of seer. Gee vir my gees oë ...

Soos daar in Luk 24:13 tot 35 in die dissipels oppad na Emmaus se lewens. Hulle was verslae, gebroke, moedeloos en sonder hoop totdat Jesus self aan hulle verskyn het. Eers het hulle Hom nie herken nie. Maar Hy was juis daar om hulle te bedien.

Het jy gesien hoe Hy dit doen? Hy vra hulle om met Hom te praat, eerlik te vertel wat in hulle harte aangaan.

En dit is wat Hy vir ons ook vra. Om vir Hom te vertel van ons vrae, woede, twyfel en vrese. Ja, miskien, soos die Emmausgangers ook te beskuldig dat Hy die enigste een is wat nie weet wat aangaan nie. Terwyl Hy eintlik die enigste een is wat werklik weet wat aangaan!

Dan bedien Hy hulle met Woord en ligte gaan aan in hulle lewens, asof hulle 'n nuwe bril op kry. En dan herken hulle Hom daar in hulle noodsituasie, en alles verander!

Net so kan Hy ook jou hart en gees genees, en jou leer om nuut te dink, nuut te voel sodat jy ook nuwe keuses kan maak.

Dat jy selfs soos 'n Josef kan sê (Gen 50:20): Julle wou my skade aandoen, maar God wou daarmee goed doen. En selfs 'n hele volk se lewe red.

Ons kyk ons soms so vas teen dinge. Want dit is wat dinge soos bitterheid, jaloesie, woede en seer in ons lewens veroorsaak. Terwyl God ons kan help om Hom weer raak te sien, en Sy liefde, genade en krag weer te ervaar.

Daarom wil ek jou uitnooi om te waag om weer oop te maak sodat God jou kan bedien. Gaan soek by Hom 'n slag hulp – jy was al by soveel ander plekke.

Hy is die wonderlikste Berader. En ontdek dat Hy in jou – in jou liggaam (1 Kor 6:18,19) Sy spreekkamer opgerig het, net om jou te bedien.

En as jy sukkel om dit self te ontdek, laat toe dat ander gelowiges jou bedien sodat jy weer God kan sien!

GOD SE PLAN VIR GENESING EN ONS BEDIENING AAN MEKAAR

Fondasie

Ek glo dat 6 boustene uit die Skrif 'n gebalanseerder fondasie vir ons nadenke hieroor kan vorm. Hulle is

- God wil siekes ook vandag genees. Vgl bv Mat 10:1 en een van God se wonderlike name in die OT naamlik Jawhe Rofeka, die God wat genees.
- Daarom verbaas dit ons nie as ons lees dat God deur die salwing van Sy Gees, lede in die Liggaam van Jesus wil gebruik as kanale om mekaar ook met die gawe van genesing te bedien nie (vgl 1 Kor 14:26; Gal 6:2; Jak 5:16; 1 Pet 2:9 en 4:10).
- Ons vertrou in God word deur ons gewilligheid om mekaar ook hiermee te bedien as God ons so lei, geïllustreer. Maar dan moet ons God God laat bly. Hy is die Hoof en die Here van die Liggaam, en Hy moet die opdrag gee dat dit Sy begeerte is in 'n spesifieke situasie, watter vorm van genesing nou moet bedien word, en aan wie.
- Alle Christene kan effektief bid vir siekes omdat God ons dan self deur Sy Gees toerus en bekragtig vir dit wat in Sy hart vir daardie situasie nodig is (Hand 1:8, 1 Kor 12:9, Jes 61:1 tot 3). God is ons kragbron. Ons moet net die deure deur geloof vir Hom oopmaak om tussen ons te kom werk.
- Die liefdesverhouding tussen broers en susters in die geloof, is die watte en die ruimte van sekuriteit waarbinne die gebede vir genesing en gedurige ondersteuning daarna verder moet plaasvind (vir die pad van genesing wat die Here ook al in Sy hart het vir die betrokke individu en sy/haar gesin).
- Die Here se genesing is vir die mens as geheel, na gees, siel en liggaam en eindig nie net by die verdwyn van 'n paar fisiese simptome nie (vgl Joh 7:23). John Wimber sê in hierdie verband dat dit vir God baie belangriker is wat in die mens aan die gebeur is wat siek is, as wat dit vir Hom net gaan oor watter soort fisiese siekte daardie persoon het. Daarom mag ons nooit ons respek en empatie vir 'n siek mens en sy gesin verloor in ons "poging" om die sieke te bedien met "oplossings" vir sy/haar siekte nie

God kan die genesing wat in Sy hart is bedien as daar

- 'n openheid is om te luister na dit wat die Heilige Gees vir ons in 'n spesifieke situasie openbaar oor wat God se wil is (2 Kor 3:6; Joh 14:26; 16:13-15)
- ons geestelike oë oop is om raak te sien wat God doen in mense se lewens
- as ons bereid is om maar net te sê en te handel wat God sê ons moet doen in liefde (Luk 4:38,39; Joh 5:8; Hand 3:6). Dit sluit dan ook 'n stuk troos en bemoediging en volhardende gebed in, as God mense nie fisies dadelik met genesing bedien nie totdat God presies openbaar wat Sy plan in daardie spesifieke situasie is.

God se bediening van genesing kan op 4 vlakke plaasvind:

- In die gees van 'n mens (Joh 20:23) as daar bv. onbelyde sonde of bitterheid was, en God iemand lei na 'n werklike ervaring van vergiffenis en vry word van daardie las of binding.
- In die gedagte-, en emosionele wêreld van 'n mens wanneer die Here die gevolge van 'n baie seer-kry-ervaring uit die verlede in iemand genees, en 'n stuk vrede daar rondom bedien (Mat 16:19) - bv. rondom alkoholisme of mishandeling
- In die liggaam van die mens deur spesifieke fisiese simptome van 'n siekte onmiddellik, of geleidelik, met of sonder medikasie of mediese ingryping, genees
- Wanneer die Here iemand bevry van demoniese bindinge in hulle lewens.

Genesings- en bevrydingswonders, en die ander wonders en tekens wat gebeur is deel van God se Koninkryk wat inbreek in hierdie wêreld.

In 'n sin is elke genesing of wonder wat gebeur profeties 'n teken van die koninkryk wat aanbreek, maar ook 'n profetiese woord van God aan ons. En dan profeties in ten minste drie opsigte: 1. So wys God vir ons dat Hy alleen God is. 2. En omdat God nie wil hê dat enige mens verlore moet gaan nie, wys Hy ons so dat Hy die enigste ware God is. 3. En dat Sy hart vol empatie en liefde vir ons hele menswees is.

Daarom is elke wonder of teken wat plaasvind 'n blatante onderbreking en inbreek in die demoniese houvas op hierdie wêreld en in mense se lewens. Jesus Christus het immers gekom om die werke van die bose te verbreek (1 Joh 3:8).

Nerens is hierdie "inbreek" en "verbreking" meer duidelik as in die verlossing van 'n mens nie. Hier bring die Gees van Christus 'n mens uit die koninkryk van die duisternis in die koninkryk van God (Hand 26:18; Kol 1:13) en gee daardie persoon die reg om kind van God te word (Joh 1:12).

Maar dit is net so dramaties as Jesus die werke van die bose verbreek wanneer Hy duiwels letterlik uitjaag uit iemand se lewe.

Maar dit strek ook tot waar mense verlos word uit vorms van afgodery - wat tog ook 'n demoniese houvas is op mense se lewens (1 Kor 10:19,20), of uit ongehoorsaamheid en in die besonder rebellie (1 Sam 15:23).

Dit is dus deel van ons profetiese bediening aan mense om God toe te laat om hulle te bedien met Sy wonders en gawes. Die demokratisering van die Gees na Pinkster het beteken dat wonders en tekens deel gaan wees van die normale belewenis van die lewe van die Koninkryk van God. So was dit in die vroeg-Christelike gemeentes die belewenis. Daarom die lang gedeeltes in die Skrif wat die Liggaam help om hierdie gawes reg te benut (Rom 12:1-8; 1 Kor 12-14; Ef 4:7-13; 1 Tess 5:19-22; 1 Pet 4:10,11).

In watter mate kan ons verwag om wonders en tekens en genesings as deel van ons Christen-wees te beleef?

Deel van die antwoord lê in 'n korrekte verstaan van Jes 53, veral in die lig van Mat 8:16 en 17.

Maar dit is ook belangrik om die woorde van Lukas daar in Hand 1:1 en 2 te onthou naamlik dat die lewe van Jesus net vir ons aanduiding is van die werk wat Christus **begin** (erxato) doen en leer het. Want Hy het in die Vroeg Christelike gemeentes en daarna voortgegaan met hierdie werk (1 Kor 12:6; Gal 3:5). En Hy is nog steeds daarmee besig.

Natuurlik beteken dit nie dat genesing sommer vanselfsprekend daar sal wees as gelowiges bid nie (Gal 4:14; Fil 2:27; 1 Tim 5:23; 2 Tim 4:20). Dit beteken ook nie dat genesing op dieselfde wyse deel is van Christus se versoeningswerk as vergifnis van sondes nie. Dit is nie korrekte eksegeese nie. Die “straf” en “siektes/wonde” waarvan daar in Jes 53 sprake van is, is ‘n tekening van dit wat Christus namens en vir ons moes deurmaak (Jes 53:6-12). Maar die gevolg daarvan is “vrede” of shalom wat ‘n totale heelword van die mens in alle dele van sy menswees aandui.

Hierdie genesing wat Hy vir ons bewerk het is primer ‘n genesing van hierdie vasgevang wees in sonde (Jes 1:5,6; en kyk veral na 1 Pet 2:24,25), maar ook die belofte van die Gees wat gaan kom (Jes 48:16; Joh 14:26,27) wat in ons gaan kom woon.

Maar genesing van siektes word ook moontlik op grond van sy versoeningswerk (Jes 53:4) in die mate wat vergifnis van sonde genesing moontlik maak (Ps 103:3; Jak 5:15,16).

Om genesing te beleef is ‘n gawe van genade (1 Kor 12:9,28,29) en word selfs in die Vroeg Christelike gemeente net gedeeltelik belewe (vgl maar Paulus se eie lewe).

Luister na wat Gordon Fee sê: Healing is provided for because the atonement brought release from the consequences of sin; nonetheless, since we have not yet received the redemption of our bodies, suffering and death are still our lot until the resurrection”.

Christus het dus nie net aan die kruis gesterf vir ons sondes nie, maar ook opgestaan en opgevaar na die hemel om by die Vader die Gees as belofte Geskenk te kry wat Hy dan vir Sy kinders stuur en wie Hy toerus met Sy krag vir ‘n profetiese lewe (Rom 8:9-14).

Dié wat lewende getuies van Christus wil wees se lewens en bediening moet getuig van die Gees van profesie wat in en deur hulle werk (Op 19:10), soos dit in Christus se lewe was (Joh 14:12).

Kom ons probeer ‘n wonder definieer: “ A miracle is a less common kind of God’s activity in which He arouses people’s awe and wonder and bears witness to Himself”.

Kom ons probeer vir ons vervolgens duidelikheid te kry vanuit die Skrif oor die verhouding tussen sonde en die konsekwensies van sonde soos siektes, duiwelbesetenheid, dood en natuurlike rampe.

- Christus se dood aan die kruis het versoening vir ons sondes gedoen en verskaf so die fondasie en grond waarop God ons kan heilig en restoreer van die gebrokenheid wat sonde in ons lewens kom aanrig het (Jes 53:4-6; Mrk 10:45; Rom 3:22-25; 5:8,9; 2 Kor 5:21; Gal 3:13; Kol 1:21,22; 1 Tim 2:6; Heb 2:14; 9:14,26-28; 10:10; 1 Pet 1:18-21; 2:24; 3:18; 1 Joh 2:2; 3:5,8).
- Sonde het gevolge in ons lewens as individue, maar ook in die menslike ras as geheel en in die wêreld. Verder is van hierdie gevolge onmiddellike gevolge, terwyl ander weer op die langtermyn gevolge het.

- As ons kyk na Gen 3 is dit duidelik dat sonde die wêreld vir altyd verander het. En reeds in die volgende drie hoofstukke sien ons hoe dit verbreekte verhoudinge tussen mense tot gevolg het wat lei tot moord en geweld. En uiteidelik selfs elke gedagte van die mens sou deursuur (Gen 6:6; 8:211).
- Hieruit is dit dan duidelik dat sonde kan lei tot stukkende verhoudinge met ander mense
- en tot armoede (Deut 15:4,5)
- en tot siekte (Eks 15:26; Deut 28:15,21,22)
- maar ook tot demoniese aanvalle en besetenheid (vgl Saul daar in 1 Sam 13 en 14 en 16:14).

In die Nuwe Testament word dit 'n baie meer gedetailleerde prentjie van Satan en sy rol in hierdie wêreld vir ons geteken as in die Ou Testament. Die volgende is belangrik:

- Ook hier word sosiale verbreekte verhoudinge geteken as die gevolg van sonde (Rom 1:18-32) en lyste vol gevolge in hierdie verband word op veskillende plekke aan ons gegee (vgl Gal 5:19-21).
- Baie keer word allerlei natuurlike rampe en krisisse beskryf as die gevolg van sonde (vgl Op 6:6; 9:20,21).
- Siekte word in 'n hele aantal gedeeltes indirek betrek by sonde van die een of ander aard, sy dit dan persoonlike sondes of die gevolg van sonde in die algemeen (vgl Rom 5:12; Joh 5:14; Jak 5: 16; 1 Kor 11:27-30; Hand 21:23; Joh 9:1-3).
- Demoniese aanvalle en selfs besetenheid word beskryf as die vrug van sonde in hierdie wêreld. Vgl Luk 22:3-6; Hand 5:1-3; 2 Kor 2:10-11; 1 Tim 3:6,7; 1 Pet 5:8.
- Dan is daar ook tekse wat ons waarsku om nie in Satan se kloue te beland nie (bv 1 Kor 7:5 a g v seksuele temptasies; Ef 4:26,27 a g v woede; 2 Tim 2:25,26 a g v verkeerde leringe). Al hierdie gedeeltes is aanduidings dat sonde van enige aard ons vatbaar maak vir Satan se aanvalle of beïnvloeding in ons lewens (sy dit dan in ons wil of gedagte-wêreld).

Hoe word hierdie gevolge van sonde uit ons lewens verwyder?

Die OT teken Jahwe as die antwoord, siende dat Hy ook die God is wat ons genees (Eks 15:26). En die hart van hierdie genesingsproses is 'n herstelde, intieme liefdesverhouding met die lewende God .

In die NT word Christus se dood en opstanding as die hart van alle versoening en ware totale genesing geteken (Mat 8:16,17; 20:28; Mrk 10:45; Joh 12:27-33 ens).

Aangesien die hele wêreld onder die mag en beheer van Satan is (1 Joh 5:19), het Christus gekom om sy mag in ons lewens te kom breek. As tekens of bevestiging hiervan is Jesus se totale genesings- en bevrydingsbediening onder mense.

'n Gedeelte soos Luk 4:18 en 19 beskryf dit baie goed. En Hy gaan selfs die mag van die dood as laaste angel van sonde en die bese se heerskappy in ons lewens as reeds-verslane vyande vertoon. (Luk 7:11-17; 8:40-56).

Die gevolge van sonde in mense se lewens o g v die werk van Christus vind in hoofsaak op twee wyses plaas: deur Sy soewereine genadige ingrype in mense se lewens (Mrk 1:21-28), en deur bekering en geloof in mense se lewens (Mat 9:1-8). En dan spesifiek geloof as vertrouwe in Christus wat dinge kan laat gebeur ongeag die oënskynlike onmoontlikheid daarvan (vgl Jak 5:15; 1 Joh 5:4).

Tog is daar ook 'n nie-nou-al-kant in hierdie gebeure. Die duidelikste voorbeeld in hierdie verband is die rol wat die dood in ons lewens as Christene speel (vgl Rom 8:23 en 1 Kor 15).

Wat is dan die bedoeling van wonders en tekens in die NT?

- Natuurlik mag dit nooit ons fokus verskuif van Christus en die werk aan die kruis en die oorwinning oor die dood af nie.
- Gawe-bediening is bloot bedoel as die instrumente waarmee God deur gelowiges Sy werk van evangelisasie, dissipelmaking, bediening, en bemoediging verrig sodat God daardeur verheerlik kan word in Christus Jesus (1 Pet 4:10 en 11).
- Hier is sprake van God se krag (dunamis) aan die werk.
- In die NT dui die uitdrukking “wonders en tekens” genesings en bevrydingsgebeure aan soos in Hand 14:3; 8:6,7,13; 5:12,15,16; 4:16,22; 12:17,18; 9:16; Joh 9:16; 6:2; 4:48,54; Mrk 16:17,20. Maar dit kan ook dui op die bediening van die Gees van Christus deur die gawes van die Gees soos bv in Heb 2:3,4; 1 Kr 14:22 en Mrk 16:17,20.
- Wonders en tekens, en krag-dade van die Gees was baie keer bedoel om die geloof van Christene te versterk en te verdiep (vgl Hand 4:29,30; Joh 10:37,38; 14:11; Mrk 2:10).
- 1 Kor 2:4 en 5 dui aan dat 'n ervaring van God se werk en krag 'n illustrasie is van die waarheid en die Persoon van Christus op wie ons ons vertrouwe gevestig het. Geloof word versterk as ons God sien doen wat Hy in sy Woord sê Hy kan en wil doen. Vgl ook Mat 11:5; Luk 7:16; 8:39; Hand 22: 15.
- Baie keer is dit soos Karl Barth gesê het dat die evangelie ons lei van wonders na geloof en van geloof van wonders. Maar ons fokus moet op Christus bly wat hier aan die werk is (Joh 10:37 en 38).

DISSIPELWEES IS OM JESUS SE VOORBEELD TE VOLG

Die Liggaam van Jesus Christus is geroep om die boodskap van Jesus Christus se koninkryk hier op aarde te dra van mens tot mens en om Sy koninkryks-bediening hier te bedien aan mense.

En die hart van hierdie boodskap van die koninkryk van God is dat God se Heer-skap in hierdie wêreld ingebreek het. Daarom moet elke ander mag voor hierdie Heer-skap buig. En daarvoor moes Christus daar aan die kruis en in die graf die oorwinning behaal.

As 'n mens in hierdie lig na Christus se bediening onder siekes, besetenes en ander in verskillende vorme van nood kyk, was dit 'n manier om te proklameer dat Hy die nuwe Koning is. Daarom sien ons Hom as Soldaat-Koning die stryd aansê teen elke bese mag.

Jesus het dus nie hierdie wêreld wat verslaaf en onder die beheer van Satan en sy magte was net kom bedien met genade nie. Hy het ook met die hemelse outoriteit en krag kom oorlogmaak teen enige vorm van bese mag wat Sy koningskap sou wou teëstaan. Elke wonderwerk of genesing wat ons dus in Sy bediening sien plaasvind is die manifestasie van die aanbreek van God se genadejaar van verlossing en die begin van die totale vernietiging van Satan en sy magte.

As Jesus dan sy dissipels opdrag gee om uit te gaan en dissipels te maak van alle mense in die wêreld, dan stel Hy dieselfde krag en outoriteit tot hulle

beskikking waardeur Hy gedoen het wat Hy moes doen, sodat hulle dieselfde kan doen as Hy en selfs nog groter dinge (vgl Luk 9 en 10; Mat 28:18-20; Hand 1:8).

En hierdie bediening is nie net 'n woordbediening alleen nie - dan is dit net 'n leë dop. En dit beteken ook nie net aksie nie - want dit kan die werk van die bese ook wees. Die koninkryk van God realiseer in situasies waar woord en geloofsaksie hand aan hand loop.

Dan word ons medewerkers van Christus wat Christus onder mense verteenwoordig.

Ons sien in die Skrif genoeg getuigenis van "gewone" Christene - wat nie apostels was of deur apostels amptelik aangestel was nie - wat deur God gebruik word om die koninkryk en sy genade te bedien aan mense onder die beheer van die bese (vgl die 70 van Luk 10:1; Gal 3:5; Hand 9:17,18; 22:13; Rom 12:6-8; 1 Kor 12:1-11,28-31; 14:1-31; 1 Tess 1:5,6; 5:19,20; Heb 6:2; Jak 5:14-16; 1 Pet 4:10,11).

Daarom moet die hele liggaam van Christus toegerus word met die oog op hierdie dienswerk (Ef 4:7-16), en verwag Paulus van sy volgelingen in die verskillende gemeentes om sy bediening (Rom 15:18,19) na te boots (1 Kor 11:1) soos hy Christus s'n nageboots het.

Die gemeente behoort dus onder mekaar en in die gemeenskap adres te wees van 'n Lewende Christus-liggaam waar hulle Christus toelaat om deur Sy Gees en die krag van Sy Gees, mense wat siek is te genees, mense te restoreer wat stukkend is, ens.

Hiervoor wil Christus deur die doop van die Gees die verskillende gawes van die Gees deur hulle laat vloei om mense so te bedien. Sommige van hierdie gawes gee die Gees aan ons die oomblik as ons dit nodig het

(1 Kor 14:24-26,30); ander van die gawes word so gegee dat dit daar is as ons dit wil gebruik - veral aan diegene in leierskapsposisies in die liggaam (1 Kor 12:28 - tithemi).

Ons word ook verder opgeroep om hierdie gawes aktief te soek (1 Kor 14:1) en te beoefen in liefde (1 Kor 13).

Deur die salwing van die Gees is elke gelowige gereed om deur God gebruik te word om te profeteer of te genees (1 Kor 12:7; 14:1,5,12,13,24,31; Joh 14:12; Mat 7:7-11; Jak 4:2). En is ons toegerus vir die priesterbediening van elke gelowige.

Dit staan natuurlik totaal teenoor die tradisionele siening van wat bediening van die Liggaam in hierdie wêreld sou beteken. Tradisioneel was bediening bloot die ondersteuning van gelowiges om hulle kruis te dra en hulle lyding in stilte met geduld te verduur. Terwyl die wêreld om ons honger is na vergifnis, versoening, geregtigheid, vrede, honger is na kos, en honger is na bevryding.

Dit beteken prakties dat gelowiges tradisioneel verstaan het dat hulle maar Satans se aanvalle moet verduur in plaas daarvan dat hulle dit op grond van Christus se soendood en oorwinning begin weerstaan het. Daarom het ons tradisioneel eerder medisyne aan mense wat besete is gegee as om hulle met die vooruitsig van bevryding in Jesus se Naam te bedien. Daarom het ons mense eerder net bemoedig wat gely het eerder as om God te vertrou vir hulle genesing.

‘N BEKRAGTIGDE CHRISTELIKE LEWE

Dit is duidelik in die NT dat die krag van God bedoel is as metgesel vir die verkondiging van die evangelie, en dat dit ervaar sal word in die lewens van die draers van die goeie boodskap.

Heb 6:5 praat van die “kragte van die toekomstige eeu, of doodeenvoudig die Heilige Gees in aksie.

Hand 2:32 en 33 praat van Christus se soendood en opstanding as die weg na Christus as die Salwer met die Gees wat Sy Gees uitstort in en op sy mense in hierdie wêreld om sy getuies te wees.

In die NT sien ons dan hoe gelowiges as gevolg van die salwing met die Gees en sy gawes kanaal word waardeur God se krag vloei en wonders en genesings en profesieë bedien word. (Die term “wonders en tekens” beskryf hierdie gebeure in kort).

Dit is dan wanneer gelowiges kanale word van woorde wat met krag aan mense bedien word en werklik ‘n impak maak op hulle lewens.

Ons sien Jesus daar in Luk 4:14 terugkeer uit die woestyn in die krag van die Gees, en dan ook die impak wat Sy prediking maak op die mense. En ons hoor Hom aan die dissipels opdrag gee om eers in Jerusalem te wag totdat hulle krag sal ontvang as die Heilige Gees op hulle kom, en dan sal hulle werklik eers Sy getuies kan wees (Luk 24:49 en Hand 1:8). En die gevolge hiervan lees ons onder andere daar in Hand 4:33.

Oor hierdie krag van God wat in die evangelie en die boodskappers van die evangelie werksaam is, getuig Paulus dan daar in Rom 1:16 en 15:18 en 19, en ook daar in 1 Kor 1:17 en 18 en 1 Kor 2:4 en 5.

Maar die NT praat nie net van God se krag wat realiteit word in wonders en in die verkondiging van die evangelie nie, maar ook oor die krag van God wat in ons aan die werk is, om ons dinge te maak verstaan en dinge te doen wat andersins onmoontlik sou wees.

Lees maar dit wat Paulus bid vir gelowiges daar in Ef 1:17 tot 19. Hier gaan dit dus nie oor die krag wat deur ons as gelowiges wil werk nie, of oor die krag in die boodskap nie. Hier handel dit oor die krag in en op gelowiges wat hulle lewens radikaal verander. En dit is dieselfde opstandingskrag wat Christus uit ‘n graf laat opstaan het. Paulus bid dat dit ons hele lewens innerlik sal verander en verryk sodat ons totaal anders kan wees as voorheen en as ander om ons.

Daarom is dit belangrik om

- Christene weer opnuut bewus te maak van God se bo-natuurlike krag wat beskikbaar is en dat ons dit moet verwag om tussen ons te gebeur
- weer opnuut die belang van God se gawes te begryp en oop te wees vir die bediening daarvan
- gewillig ‘n verwagting te hê om bloot kanaal te wees waarmee God deur die werking van Sy Gees ander kan bedien daar waar hulle nood het

- soepel te wees dat God mense kan bedien soos en hoe Hy wil met die woord en die gawes
- die krag en die beheer van God se Gees in jou lewe te soek met die oog op 'n lewe van geregtigheid, oorwinning, bevryding in alle areas sodat God daardeur verheerlik kan word.

Lyk vir my die weg daarheen is 'n nederige buig voor God om doodgewoon kanaal te wees van die gawes en geskenke wat Hy in bepaalde situasies aan sekere mense wil bedien soos en hoe Hy wil.

God se krag is sy krag. Hy gee dit nie vir ons om te gebruik soos ons wil nie. Daarom praat Paulus van 'n besondere krag-senario waar God se krag vrylik kan vloei veral as ons swak is en ons totaal op Sy krag moet fokus en daarvan afhanklik moet wees (2 Kor 12:7-10).

DIE KONINKRYK EN DIE KRAG VAN GOD

Solank as wat alles in die kerklike wêreld in netjiese boksies met mooi beskrywende name op verdeel kan word, het die meeste mense nie daarmee probleme nie.

- As 'n mens weet jy het met iemand uit die Pinksterkerke of met iemand uit die Gereformeerde wêreld te make, voel mense redelik op hulle gemak en in beheer van dinge. Maar as dinge 'n bietjie deurmekaar begin raak ... as mense nie meer in hierdie of daardie "kerk" wil behoort nie, maar net aan die liggaam van Jesus wil behoort en bloot in hierdie gemeente hier nou wil aanbid en saam met hulle die gemeenskap wil bedien, begin mense kiewelrig word.
- As 'n Gereformeerde bid vir siekes, het die meeste mense nie probleme daarmee nie, maar as daardie siekes hier voor ons oë gesond word, en op allerlei buitengewone wyses bedien word deur die Gees van God, is almal skielik ongemaklik.
- Solank jy praat oor die kernevangelie, het mense vrede daarmee, maar as jy die Gees van God vra om mense persoonlik te begin bedien en vry te maak, en God toelaat om self mense met Sy krag te bedien, vlieg die vonke sommer gou-gou.

Waar jy jou ookal in die Liggaam van Christus tans bevind, hoor jy wêreldwyd verhale dat God vandag nog wonders bewerk deur sy kinders. Hoor jy hoe Christene opgeroep word om God te vertrou om hulle te gebruik om die evangelie van lewe aan mense te bedien, maar dan ook om oop te wees dat God self deur Sy Gees met die volle spektrum gawes van die Gees self die mense sal bedien. Ja, dat ons moet verwag dat die Gees selfs profesieë, woorde van wysheid en kennis, genesingswonders, talewonders en interpretasie van tale sal gee.

Tans bring die gesprekke oor die Gees van God se plek in die Liggaam van Christus, en die bediening van mense met die gawes van die Gees, 'n geleidelike een-word in die Liggaam van Jesus te weeg tussen die sogenaamde Pinkster- en Charismatiese gedeeltes van die Liggaam, en kom iets tot stand wat in die wêreld die sogenaamde Derde Golf genoem word wat bestan uit gelowiges wat werklik die Liggaam van Christus in die oog het, en net buig voor hulle eksklusiewe lojaliteit teenoor Christus as die Here.

Die eerste golf wat begin het was die Pinkstergolf aan die begin van hierdie eeu, met die tweede golf van die Charismatiese beweging hier in die 50's en 60 wat daarna gevolg het.

In 1988 reeds het hierdie Derde golf-christene gegroei teen 'n tempo van sowat 19 miljoen per jaar, of 54000 per dag (volgens Dawid Barrett, 'n Anglikaanse statistikus).

En verder het daar hieruit 'n soeke gekom na wat die Woord oor al hierdie dinge werklik te sê het. Vrae het na vore gekom soos: Kan 'n gemeente 'n genesingsbediening hê? Kan gemeentes doelbewus mense help om in Christus vry te word van allerlei demoniese bindinge en emosionele seer in hulle lewens? Hoe gee 'n gemeente werklik sinvol ruimte vir die volle spektrum gawes van die Gees om te kan bedien? Moet ons net konsentreer op die kern-kruisboodskap of mag ons die krag van die kruisboodskap ook toelaat in ons byeenkomste?

Miskien is hierdie soort vrae vir die meeste van ons nie werklik krisisse nie, maar ons moenie vergeet nie dat dit vir die meeste mense wat nog in die tradisionele dele van die Liggaam sit, wel 'n groot probleem is.

Natuurlik is daar 'n hele klomp verskillende menings ook onder hulle. Aan die eenkant kry ons mense soos John McArthur en die protestantse Gereformeerde wêreld wat ons ken, wat oortuig is dat die wondergawes wat in die Skrif genoem word, eenvoudig opgehou het toe die laaste van die Bybelse Nuwe Testamentiese apostels gesterf het. Daar was eenvoudig nie meer vir hulle enige sin om daar te wees nie.

Aan die anderkant staan diegene wat vra: Maar waar staan dit in die Skrif dat hierdie dinge opgehou het? En, hoor jy hoe hierdie faksie in die Liggaam van Christus beklemtoon dat genesing en die gawes van die Gees tekens is van die Koninkryk van God wat in hierdie wêreld deurbreek as tekens van God se genade en verlossing waaroor die evangelieboodskap tog praat. En dat dit vandag net so noodsaaklik is soos in die Vroeg-Christelike gemeentes.

Maar kom ek wees prakties vanuit die Skrif hieroor met jou.

Ek is 'n eksponent van die sogenaamde derde golf-beweging. Alhoewel ek baie van die dinge sê wat die Pinkster en Charismatiese gedeelte van die Liggaam oor die jare gesê het, sê ek dit hier en daar anders as hulle.

Ek is oortuig dat die Bybel vir ons leer dat ons nie die Heilige Gees ontvang om in ons te woon eers as ons gedoop word met die Heilige Gees nie. Ons ontvang die Heilige Gees reeds voor of by ons bekering. En die tekse wat ek as bewys hiervoor wil aanvoer is 1 Kor 12:3; Ef 1:13,14; Tit 3:5; Joh 3:3-5; Rom 8:9; Gal 3:26 en 4:6.

Tog erken ek hiermee saam die noodsaak dat ons vervul of gedoop of bekragtig moet word met hierdie Gees, en dat dit wel een of meer kere na ons bekering kan gebeur. En die tekse wat dit na my oordeel bevestig is bv Ef 5:18; Hand 4:8 en 31; 7:55; 13:9 en 52.

Ek sonder ook nie die gawe van tale uit asof dit die bewys sou wees dat iemand die doping of vervulling met die Gees ontvang het nie. Inteendeel, ek glo dit is moontlik dat iemand gedoop kan wees met die krag van die Gees sonder om noodwendig in tale te praat. Daar is honderde gelowiges wat die Here kragtig gebruik om genesing aan ander te bedien wat glad nie in tale praat nie.

Ek beklemtoon eerder die wonderlike boodskap dat God elke gelowige wil salf en toerus met die Gees om mekaar en die gemeenskap met die verskillende gawes van die Gees, hoe en soos Hy wil, te bedien. En hiervoor hoef ons maar net na gedeeltes soos Joh 14:12; 1 Kor 12:7; 14:1,5,12,13,24,31 en Mat 7:7-11 te kyk.

Baie sogenaamde evangeliese Christenleiers maak aansprake dat wonderwerke nie nodig is as ons mense wil evangeliseer nie, en dat ons nerens in die Skrif bewyse kry dat God wonders moet gebruik om ongelowiges te oortuig nie. Met die bedoeling natuurlik dat dit dus nie vir ons nodig is om so te hamer daarop dat God vandag nog vir ons toerus om ons te gebruik om vandag nog wonders te doen nie.

Maar dit is 'n onwaarheid, want die Bybel is vol van presies die teendeel. Ons kry letterlik honderde teksgedeeltes in die Skrif wat vir ons wys dat God wondergenesings en ander wonderbedieninge van die Gees hand en hand laat loop het as die evangelie deur Jesus of die ander dissipels of die vroeë Christene verkondig is. Dink maar net aan Stefan, Phillipus, en Ananias.

Maar kom ons gaan kyk vir ons self na enkele van hierdie gedeeltes: Mat 4:23; Luk 4:40-43; 5:15,17; Mat 9:1,2; Mat 9:6-8; Mat 10:1,7,8; Hand 3:6-8, 11-26; 4:29-30; 8:4-7,12,13; Rom 15:18-20; 1 Kor 2:4,5; 1 Tess 1:5; 1 Pet 4:10,11.

Die Griekse woord euangelizesthai is dus nie doodgewoon om die evangelie te verkondig nie. Dit is die proklamasie met outoriteit en krag dat die evangelie van Christus en Sy koninkryk wat gekom het, waar is. En daarom het tekens en wonders hand en hand daarmee geloop om dit te bevestig. Hoe kan ons vertel van 'n God wat genadig is en wat regeer, as daar nie bewyse daarvan in en om ons eie lewens is wat dit bevestig nie? Hoe kan ons vir mense vertel dat God sondes vergewe en hulle kan verlos as hulle geen tekens sien van verlossing wat rondom hulle plaasvind nie?

Baie gelowiges sê dat wonders nie vir mense in die Skrif nodig was om tot bekering te kom nie. Maar dit is net nie waar nie. Dink maar net aan Hand 3 tot 5. Daar lees ons hoe 5000 mense tot bekering gekom het na 1 man se genesing (4:4).

Dit lyk dus vir my dat die Woord vir ons genoeg getuienis gee dat God met groot genot mense nie net wil bedien met 'n verlossingsboodskap wat hulle kan hoor nie, maar ook met graagte hulle iets laat sien van die egtheid en realiteit van hierdie boodskap. Dit is tog wat 'n gedeelte soos Luk 4:18 en 19 impliseer.

Ek wil nie die blote woord-getuienis oor die evangeliewaarhede aan mense afskiet nie. Ek sê net dat dit vir my meer Bybels lyk om te verwag dat God deur Sy Gees ook aan mense deur wonders en tekens bewyse wil lewer dat die evangelie waar is. En ons moet gereed wees om kanale te wees van God se krag as Hy dit so wil doen.

Ek soek dus na 'n meer gebalanseerde Bybelse prentjie waar biede die verkondiging van die Woord, en die bediening van God se krag deur Sy Gees plek het. En die volgende Skrifgedeeltes bevestig so 'n siening: Rom 15:18,19; 1 Kor 2:4,5; 4:20; 11:1; Gal 3:5; 1 Tess 1:5; Heb 2:3,4; 1 Pet 4:11; Jak 5:13-16.

Maar dan soek ek ook balans tussen die vrug van die Gees en die gawes van die Gees as 'n demonstrasie van die realiteit van die egtheid van die evangelie en God wat werklik lewe en mense kan verander.

DIE EVANGELIE EN DIE KRAG VAN DIE KRUIS-VERLOSSING EN OPSTANDING VAN CHRISTUS JESUS

Die plaasvervangende, versoeningsdood van Christus aan die kruis is die hart van die evangelieboodskap. Dit staan tog duidelik daar in 1 Pet 2:24 en word bevestig deur velerlei ander teksgedeeltes soos Mat 20:28; Mrk 10:45; Joh 12:27,31-33; Rom 3:22-25; 5:8,9; 2 Kor 5:21; Gal 3:13; Kol 1:21,22; 1 Tim 2:6; Heb 2:14; 9:14,26-28; 10:10; 1 Pet 1:18-21; 2:24; 3:18; 1 Joh 2:2; 3:5,8; Op 12:11.

Hierdie krag van die kruis is die sleutel tot volkome vergifnis (1 Joh 2:2). Maar die kruis is ook die basis op grond waarvan God alles wat Hy verder in ons lewens beplan het aan ons wil bedien, bv om ons te heilig en te restoreer van die gebroke-wees a g v sonde (1 Pet 2:24; 2 Kor 5:21; Kol 1:22; 1 Joh 3:8).

Ek is oortuig dat die kruis van Christus die oplossing is van elke probleem waarmee manne en vroue vandag worstel (2 Pet 1:3) - en dus nie genesing en die ander bediening van geestelike gawes as sulks nie.

Aangesien die soendood en opstanding van Christus die fontein is waaruit alle ander seëninge vloeï wat God aan die mens in Christus wil skenk, is dit ook waar van genesing en die andere bediening deur die krag van die Gees.

Genesing en die ander bediening van die Gees beteken niks op hulle eie nie. Daar is immers genoeg bewyse van soortgelyke kragte uit die demoniese wêreld (Eks 7:11,22; 8:7; Hand 8:9-11; 13:6 ev; 16:16; 19:13,18,19). Tog gebruik God genesingswonders en die bediening van die gawes om die onvergelykbare heerlikheid en krag van Christus te proklameer as die Here (1 Kor 12:1-3; 1 Joh 4:2), en gee Hy die goeie vrug wat daarop volg (Mat 7:20; Gal 5:22,23). Dit moedig verder geloof en groei in 'n verhouding met Christus aan (1 Kor 14:12; Ef 4:11; 1 Pet 4:10,11).

Die kruis van Christus is waarom die evangelie draai, maar tog is die genesings en die Gees-bediening illustrasies van die genade, vergifnis, en versoeningskrag van die kruis (Mat 9:6; 11:4; Mrk 2:10; Luk 4:18,19; 5:24; Jak 5:15,16; Rom 15:18,19; 1 Kor 2:2-5; 1 Tess 1:5).

Dit kom illustreer aan ons dat Christus se koninkryk gekom het om die bose se werke deur sonde en sy afskuwelike gevolge, te kom vernietig (1 Joh 3:8). Daardeur het God 'n militante magsbeweging (weerstandsbeweging) in hierdie wêreld kom mobiliseer wat vyand is van alle magte van vernietiging en chaos.

Ek glo dat gedeeltes soos Ef 6:10 ons oproep om te soek na God se krag, want God se krag is 'n noodsaaklike bestanddeel om te laat plaasvind wat nou in God se hart vir die wêreld en vir mense is (Rom 15:18,19; 1 Kor 1:17,18; 1 Kor 2:4,5; 1 Kor 4:20; ef 1:18-20; Ef 3:16,17; 6:10,11; 1 Tess 1:5).

As Christene bevind ons ons in 'n baie donker en stukkende wêreld vol stukkende en siek mense. Dink maar net aan al die geweld, seksuele misdade, moorde, verskriklike siektes, okkultisme en spiritisme. Ons het werklik God se krag vir 'n tyd soos hierdie nodig. Ons kan nie daarsonder klaarkom nie. Ons het alles nodig wat God vir ons wil gee om alles te doen wat Hy deur Sy Liggaam wil doen vir mense in Christus.

Oral in die Skrif is daar genoeg getuigenis dat God ook mense wil genees na liggaam, siel en gees. Sy Seun het dit tog duidelik in Sy bediening vir ons kom illustreer. Die apostels en gelowiges in die vroeg-Christelike gemeentes het dit voortgesit, en daarvoor het Hy aan ons die gawes van die Gees belowe (1 Kor 12:9). Daarom roep Hy ons ook op om vir siekes te bid (Jak 5:14-16).

Maar tog teken die Skrif nie vir ons God se krag asof dit eenvoudig mense onmiddellik volmaak heilig of alle siekte en lyding en swakheid laat verdwyn nie. Kyk maar na gedeeltes soos Rom 8:4-16; 1 Kor 6:11-19; Gal 5:16-6:10 oor heiligmaking, en Rom 8:17; 2 Kor 4:7-11; 12:7-10; Gal 4:13-14; 2 Tim 1:8 en 3:12 oor die gebrokenheid en lyding steeds in hierdie wêreld.

Terwille van die volle waarheid is dit belangrik om op te merk dat die Skrif duidelik daarvoor is dat ons heiligmaking en hierdie verlossing van die volle implikasies van sonde in hierdie lewe net gedeeltelik gaan beleef (Fil 3:12,13; 1 Joh 1:9). Net so gaan ons voor die wederkoms van Christus ook genesing en die bediening van die gawes van die Gees as beleefde onvolmaaktheid beleef (vgl 1 Kor 13:9 met 1 Kor 12:8-10; 13:8-12; 1 Joh 3:2; Op 22:4; Fil 2:27; 1 Tim 5:23 en 2 Tim 4:20).

Dink 'n mens aan genesingswonders, weet jy dat vir solank ons nie volkome verlossing beleef van die gebrokenheid van ons menslike liggame nie, sal ons in hierdie lewe altyd die lyding van siekte en dood beleef tot by die wederkoms.

Daarom bevestig dit net aan ons dat alhoewel God genees, beleef ons nie altyd genesing of volkome genesing nie. Daar is nog altyd in hierdie wêreld 'n noodsaak om in nederigheid in geloof die reeds en nie-nou-al van die evangelie en verlossing te bely. Daarom hoef ons nie altyd aan te neem dat daar noodwendig iets moet skort met ons geloof of God se getrouheid as daar nie in elke geval genesing plaasvind nie.

Miskien lê daar 'n balans in 'n koppeling van die kruis en die opstanding van Christus vir ons as Christene. Die kruis herinner ons aan die lyding en die swakheid midde hierdie stukkende nog-gebroke-wêreld van ons, terwyl die opstanding van Christus ons in geloof laat opkyk na die transformerende krag van die nuwe lewe en die wonders en genade wat daarmee ons s'n geword het.

As Paulus gelyktydig hieraan probeer vashou, bely hy daar in 2 Kor 12:12 die krag wat deur hom as kanaal vloei, maar in vers 10 tot ook weer die swakheid wat hy ook beleef. Maar dit is juis in sy swakheid waarom die krag kan vloei.

Ek wil afsluit. Wonders en tekens kom as deel van ons wandel in die lig en in die genade van die koninkryk van Christus wat in hierdie wêreld ingebreek het. Dit gaan deel wees van die normale van ons Christelike lewe. Daarom is 'n bediening van genesing en vergifnis aan mense maar net 'n manier om mense lief te hê omdat God hulle lief het. En 'n uitvloesel van Sy liefde en empatie vir mense.

BEDIENING VAN DIE NOOD VAN MENSE: SIEKES

Jak 5:13-17 gee vir ons opdrag om hulle te bedien

Een van God se name is Jahwe Ropheka (die God wat genees) - Eks 15:26

Jesus en sy volgelinge in die vroeg-Christelike gemeentes is ons voorbeelde

ENKELE SKRIFBEGINSELS AS FONDASIE VIR 'N GEBALANSEERDE SINVOLLE BEDIENING VAN MENSE

- Die Woord bevestig dat God nie elke keer elke sieke wil genees nie. Vgl Hand 28:9; Fil 2:25-27; 1 Tim 5:23; 2 Tim 4:20; 1 Kor 2:3; 2 Kor 12:5,7-10; Gal 4:13). Daar is soms ook ander dinge wat 'n rol speel.
- Gebed vir genesing moet bedien word in lyn met God se wil, plan, dissipline-program en begeerte om verheerlik te word in elke situasie. Vgl Joh 9:2,3 - midde alles gaan God se Naam verheerlik word; 1 Kor 11:30 - siekte kan deel wees van God se dissipline-program in mense se lewens; die dood is steeds 'n realiteit is elkeen van ons se lewens om voorbereid te wees voor (1 Kor 15:53-58). Baie siektes is dus deel van die normale deurgang oppad daarheen. Daarom moet ons telkens aan God vra in die aangesig van dodelike siektes: Is hierdie siekte tot die dood? (Heb 9:27) Is dit dalk die gevolg van 'n spesifieke sonde? (2 Kron 26:16-20; 1 Kor 11:30) Of is dit 'n geleentheid waarin God se heerlikheid opnuut gaan deurbreek? (2 Kor 12:7-9).
- God is met ons besig om die beeld van Christus almeer in ons te laat deurbreek (Rom 8:28-30; Ef 1:15-19; 3:14-21). Maak dus baie seker waarmee God besig is in elke situasie.
- Ons kan net "gelowig bid" (Jak 5:15) as ons gebed gefundeer is op 'n woord van God in daardie situasie. Geloof is immers nie positiewe denke nie. Dit berus ook nie op emosies of gevoelens nie. Ons moet soek wat God se bedoeling is. En Hy openbaar dit deur 'n woord van kennis in baie gevalle (1 Kon 18:1,41-44). As ons nie seker is nie, kan ons op grond van Jak 4:2 ons begeertes in die spesifieke situasie aan God bekend maak, maar steeds in onderdanigheid aan Sy plan as Here God.
- Die gawes van genesing neem verskillende vorme aan daar waar ons mense in nood bedien (1 Kor 12:9). Soms word genesing letterlik uitgespreek oor 'n sieke (Hand 3:6). Soms is dit God se plan om met handopgelegging dit te bedien (Hand 28:8). Soms vind genesing onmiddellik plaas (Joh 9:1-41 en 11:38-45). Soms gebeur dit nie onmiddellik nie (Mrk 8:24 ev).
- Genesing vind ook op verskillende vlakke in mense se lewens plaas: sy dit liggaamlik, in hulle sielsdimensie, of in hulle gees.
- Genesing is nie altyd afhanklik van die siek mens se geloof nie, maar geloof is baie beslis 'n belangrike element in hierdie bediening (vgl Mat 8:5-10; Luk 5:17-20).
- Nie alle bo-natuurlike genesing is noodwendig van God af nie. Ons leef in 'n tyd wat spiritualisme en okkultisme weer hooffy vier. Vgl Eks 7:11,12,22; 8:7; Hand 8:9-11; 13:8-10. Toets elke gees (1 Joh 4:1).

- Gebed vir genesing is nie bedoel om mediese aandag en behandeling te vervang nie. Vgl Jak 5 en 2 Kon 20 in die verband.
- Bediening van siekes is net nog 'n belangrike instrument om stukkende mense met God se liefde en genade te bedien. (Vgl “die 25 gebeds-bedieningstasies” van Casa Adobes Baptist-gemeente in bedieningsdienste waar 'n ouderling en twee intersessors mense met nood bedien met gebed, bediening en die Nagmaal soos God lei).
- Die wêreld is vol seer en stukkende mense. Ons taak is om met die hart van God hulle net te bedien in Sy Naam.

BEDIENING VAN DIE NOOD VAN MENSE: VERLOS ONS VAN DIE BOSE

‘n Groep stukkende mense wat feitelik heeltemal geïgnoreer is deur die tradisionele Gereformeerde gemeentes is dié wat demonies aangeval en geteister word.

1 Joh 2:12-14 teken vir ons ‘n Christelike gemeenskap waar deel van ons geestelike volwasse-ording juis ‘n leerproses behels om oorwinnings oor die Bose te behaal. Lyk dus vir my dat direkte gevegte met die bose en demoniese magte, en oorwinning oor hulle, deel behoort te wees van die normale groei in ‘n Christen se lewe.

Ons moet nie hierdie dimensie in ons bediening nalaat net omdat sekere Christene allerlei rasionele probleme hiermee het nie. Gesonde Bybels lering hieroor vorm die fondasie van ‘n sinvolle bediening.

Die Bybel is baie duidelik oor die volgende: Satan en demoniese magte is ‘n realiteit in hierdie wêreld en in ons lewens (Mrk 1:23,24; 1 Kor 10:20; Ef 6:12; Op 12:3-9). En ons gaan die realiteit van hulle aanslag op ons en ander mense se lewens meer en meer beleef, tensypte die beskermde lewe wat ons ly. Vgl maar die realiteit daarvan in die Oosterse wêreld.

Christene kan na my oordeel nie duiwel-besete wees nie, maar wel geestelike geneutraliseer word deur die bose. Die term “duiwelbesetenheid” is ‘n woord wat eintlik nie in die Skrif voorkom nie. Die Griekse woord daimonizomenos dui letterlik aan dat iemand ge-“demonized” word of is (Mat 12:22), en dui heelwaarskynlik verskillende grade daarvan aan. ‘n Eenvoudige, maar meer-aanvaarbare siening hiervan is die volgende: Stel Satan en die demone se aanslag op mense voor as ‘n reguit pyl van links na regs. Op hierdie reguit lyn is dan ons liggaam, ons sielsarea en ons geesarea aangedui. ‘n Soliede vertikale lyn tussen “siels-area” en “gees” dui aan dat die Christen se gees vry en veilig vir ewig is van enige sataniese aanvalle aangesien die Gees dit gewederbaar het en self daar sy inwoning kom neem het (Ef 1:13). Terwyl nie-Christene nie hierdie beskerming het nie. As die bose dus ons liggaam en sielsarea as Christen aanval, en ons dit nie suksesvol herken en afslaan nie, kry hy suksesvol ‘n houvas op ons lewe in daardie areas van ons lewe en rig chaos daar aan (2 Tim 2:24-26; 1 Pet 5:8,9; Ef 6:12). Hy kan ons nou wel nie volkome vernietig nie (Joh 10:10; Hand 26:17,18; Kol 1:13; 1 Joh 4:4; 1 Kor 3:16; 6:19,20; Ef 4:27). Maar hy kry reg om ons so te neutraliseer deur ons getuieis kragteloos te maak, ons gebedslewe oneffektief te maak, ons begeerte om na God te luister of met Hom te praat uit te doof, ons meer en meer met gemak te versoek in sekere areas; ons lewens te vul met leuens; ons te laat twyfel; ons lewensvreugde en vrede te steel; en ons selfgesentreerd te laat lewe.

Hierdie wêreld is in die hande van die bose (Mat 4:8,9; Joh 14:30,31; 16:11; 2 Kor 4:4; Ef 2:1,2; 1 Joh 5:19). En ons as Christene is die vryheidsvegters in die Naam van God se koningskap wat veg agter die vyande se verdedigingslinies. Ons moet net verhoed dat ons gevange geneem word of geneutraliseer word deur die vyand.

Sommige mense se probleme kan net verstaan word as ons ook sensitief is vir moontlik sataniese aktiwiteite in en om hulle lewens. Die konflik tussen God en Satan is nog altyd ‘n werklikheid. Die Here moet ons net deur sy Gees ‘n sensitiewe onderskeidingsvermoë daarvoor gee. Maar dit hoef nie te

beteken dat ons 'n "duiwel agter elke bos" hoef te sien nie. Ingeligtheid en 'n sensitiwiteit vir God se stem is deel van 'n gebalanseerde bediening ook hier.

Maar ons moet ook nie blind wees vir Satan se aanvalle en metodes nie. Hy staan nie verniet bekend as die engel van die lig nie. Miljoene is eenvoudig blind vir hom en sy aanslae. Hy is bedrieër par excellence (2 Kor 11:3). Daarom die baie waarskuwings in die verband (Hand 13:10; 2 Kor 11:13-15; 2 Tess 2:9-12; 1 Tim 4:1; 2 Tim 3:13). Een van sy beste metodes is leuens (Joh 8:32,44); woede/aggressie (Ef 4:26,27); onvergewensgesindheid (2 Kor 2:10,11); sondes (Ef 2:1,1; 1 Joh 3:8-10); beskuldigings en insinuasies (Op 12:10); versoekings (1 Kor 7:5; 1 Tess 3:5); kontak met die okkultiese (Deut 18:10-13); dwelm- en alkoholmisbruik (Gal 5:20,21). Natuurlik bied ons sondige natuur (Rom 7:1-25; Kol 3:5-10; Ef 4:22-24) 'n goeie teiken vir sy aanvalle in ons lewens.

Baie Christene is "maklike teikens" vir die bose se aanvalle in hulle lewens. Veral as ons dit waag tussen al die okkultiese bedrywighede rondom ons. Onthou okkultisme in al sy vorms is die deure na die geeswêreld, en blootstelling aan demoniese magte in hulle volle mag en realiteit (Lev 19:31; 20:6,27).

As enigiemand hom/haarself blootgestel het hieraan of betrokke was daarby, moet die volgende erken, bely en afgelê word (2 Kor 4:2; Spr 28:13): 1. Kontak met okkultiese bedrywighede (Deut 18:10-13). 2. Persoonlike oopstelling vir demoniese rigtinggewing en - hulp (2 Kor 11:3,4). 3. Dwelm- en alkoholmisbruik (Gal 5:20,21). 4. Gewoonte-sondes (Ef 4:27). 5. Sondes van die vaders of voorvaders waarvan die Gees jou oortuig (Eks 20:5,6). 6. 'n Ongedissiplineerde gedagte-wêreld (2 Kor 10:3-5). 6. Seksuele sondes of - mishandeling in die verlede (Rom 1:24,25; 1 Kor 10:19-21; Hos 4:12,13).

God het alles aan ons as Christene verskaf wat nodig is om volkome oorwinning te belewe van enige demoniese aanval of binding.

Belangrike boek-hulpbronne in die verband is The Adversary van Mark Bubeck; en Neil Anderson se The Bondage Breaker en Victory over Darkness.

In die meeste gevalle is die normale bediening van die gemeente heeltemal voldoende om ook hierdie probleem effektief aan te spreek soos wat Jak 4:7 en 8 vir ons aandui. Om jou "aan God te onderwerp", fokus op ons vlees en sondige natuur. Daarom word ons uitgenooi om (1) te bely as daar enige area in ons lewe is wat buite beheer is en waar ons hulp verlang; (2) doelbewus daardie area weer onder die Heerskap van God te onderwerp; (3) en ons dood te ag vir daardie sonde wat ons so teister volgens Rom 6. As die probleem so opgelos word, loof die Here, want dan was dit bloot 'n sonde van jou sondige natuur.

Maar as die probleem voortduur, dan geld die tweede deel van Jak 4:7. Dan beleef jy heelwaarskynlik 'n demoniese aanval en sal jy nie oorwinning beleef voordat jy die geestelike geveg daarmee afgehandel het nie. "Weerstaan die duiwel" maak erns met hierdie geestelike aanslag. Hier word ons aangemoedig om (1) alle bindinge of aanvallers in hierdie area van ons lewe te bely en hulle mag oor jou lewe met jou mond en belydenis doelbewus te breek; (2) te bid dat die Gees van God oor daardie area die beheer sal neem en ons vry sal maak sodat ons weer in vryheid kan kies.

Dit is lewensnoodsaaklik vir Christene om daaglik voorsorgmaatreëls te tref as beskerming teen die vurige pyle van die bose. Hier pas die wapenrusting van Ef 6:10-17 in wat ons daaglik doelbewus moet aantrek. Verder kan ons bid vir 'n muur van beskerming rondom ons persoonlik, as gesin, en gemeente. Hierdie muur staan op die fondasies van Ps 91 waar ons die Here ons vesting en toevlugsoord maak (vers 1,9,10); ons kies om God met alles wat ons het lief te hê (vers 14); en ons Sy Naam as Here en God bely (v 14).

Bediening van demonies-geteisterdes is altyd 'n gebedsbediening. Gebed is die sleutel tot verlossing van die Bose. Deur gebed kan ons pleit om beskerming vooraf; het ons toegang tot al die wapens wat oorwinning kan verseker; en het ons die kanaal waardeur die Here self deur Sy Gees die nodige salf en genesing kan bedien aan mense.

Daarom hoef ons as Christene nooit enige geestelike weerstand-bied en - verdryf van bese vyande te vrees nie.

Wees ook bewus van die neiging van die bese om met teenaanvalle te kom, en bid vir beskerming daarvan. Onthou dit is 'n oorlog waarin ons betrokke is!

Hierdie bediening is bloot bedoel as net nog 'n instrument in ons bediening van stukkende mense in ons midde en rondom ons in die gemeenskap.

MAAK ONS VRY VAN GEESTELIKE SCHIZOPHRENIA!

In die meeste tradisionele Gereformeerde gemeentes sit daar letterlik duisende opregte Christengelowiges wat nog nooit 'n wonderwerk of 'n onmiddellike genesing gesien nie.

Die vraag is waarom nie? Daar is tog derduisende ander wat kan getuig dat God nog steeds dieselfde is en optree as in die tyd van die Bybelgebeure.

Kom ek probeer 'n verduideliking hiervoor gee. As jy weet wat 'n deïs is, is die meeste van ons in die Gereformeerde wêreld eintlik net dit. Vir 'n deïs het God die wêreld opgewen soos 'n groot horlosie en hy tik so op sy eie die dae en tye af. 'n Deïs ontken gevolglik dat wonderwerke plaasvind, of glo dat dit slegs tuishoort in 'n bepaalde spesiale tyd soos toe Jesus hier op aarde was. Verder glo hulle dat God net in ons lewens in ons hart/siel/gees inbreek, maar nie sommer die normale kom omkrap met 'n wonderwerk nie.

Moenie dink dat hulle so glo omdat hulle nie werklik gelowiges is nie. Hulle is werklik opregte gelowiges wat glo en weet God is daar en wat weet wat in die Woord staan, maar hier diep binne is hulle steeds deïste. Daarom bid hulle wel vir genesing, maar eintlik verwag hulle gee merkwaardige, buitengewone respons nie.

As jy, soos ek, op 'n goeie, maar konserwatiewe teologiese skool geswot het, weet jy dat ons goeie wetenskaplike teoloë daar geword het, maar min opleiding ontvang het in Gees-bekragtigde bediening. Ons het baie geleer oor God, maar min werklik oor 'n intieme verhouding met God as Vader, en oor 'n verwagting dat God deur die hele spektrum gawes van die Gees kragtig deur jou wil vloei en werk. Niemand het ooit daar vir my geleer hoe om God se stem werklik anders as net in die Woord te hoor nie!

Maar hier diep binne het ek geweet dit kan nie al wees wat daar in Christenwees is nie. Daar moet meer wees. En ek het begin wag vir 'n deurbraak. As ek eerlik moet wees, was ek ook bang dit gebeur, want ek het geweet dat dit my hele netjiese wêreldjie deurmekaar sou krap!

2 Tim 3:5 praat van 'n godsdienstigheid sonder krag! Ek wil amper praat van 'n soort geestelike schizofrenia waarin ons geloof in die almagtige God van die Bybel bely, maar aan die anderkant 'n geloof beoefen wat in werklikheid kragteloos en geloofloos is!

Hiervoor glo ek is daar ten minste twee redes:

- Ons het onbewustelik die anti-bonatuurlike, rasonele veronderstellings van die ongelowige wêreld om ons aanvaar.
- Ons geloof as Christelike gemeenskap het korrup geword met 'n geestelike hoogmoedigheid, 'n kragtige ongelowigheid, 'n vrees vir die bonatuurlike, en 'n onwilligheid om los te kom uit ons tradisionele denkwyses en oop te wees vir dit wat die Gees van God wêreldwyd aan die doen is onder gelowiges.

Met geweldige tragiese gevolge natuurlik. En een van die gevolge is dat dit maak dat die meeste tradisionele Gereformeerde en ander hoofstroom- gemeentes elke jaar 'n negatiewe groeikoers van ten minste -10% het. Terwyl die Gees van God op 'n kragtige wyse in gemeentes in Afrika, Suid-Asie, Latyns-

Amerika, en Kommunistiese China aan die werk is. In Brasilië kom daar elke dag 10 000 mense tot bekering, en in Afrika was daar in 1993 'n groei van 6 miljoen vir die jaar, en in China en Suid-Oos Asie 'n groei van 35 miljoen vir die jaar. Hier word nie net dissipelskap met erns bejeën nie, maar leer gelowiges mekaar hoe om met vrymoedigheid in die Gees te bedien. Daarom is getuïenis oor genesings en wonders talryk.

Kyk 'n mens na die Bybel, sien jy oral getuïenis van die krag van God in ...

- siek-mense wat gesond word en mense wat demonies gebind was wat vry kom
- gelowiges wat woord praat wat getuig van 'n bonatuurlike insig of kennis
- mense wat visioene sien
- belewenisse van buitengewone verlossing, beskerming en voorsiening
- buitengewone verhoring van gebede

In Jesus en die vroeg-Christelike gemeentes sien ons 'n evangelie wat met woord en kragtige daade onder mense werk. Maar tog is ons tevrede met 'n een-benige evangeliebediening!

Hoe kry ons terug wat ons langs die pad verloor het?

- Bestudeer die Skrif - dit is immers ons handboek in krag-bediening. Lees veral Lukas en Handelingte as voorbeeld en soek na wat die koms van die Koninkryk beteken het. En lees dit biddend met 'n kinderlike naïewiteit en gelowigheid.
- Lees 'n bietjie 'n goeie boek oor waarmee God nou besig is. Bv Power Evangelism en Power Healing deur John Wimber; Signs, Wonders and the Kingdom van Don Williams.
- Gaan en laat toe dat jy vanuit die hele liggaam van God bedien word, veral daar waar jy weet dinge gebeur.
- Waag dan om mense te bedien soos die Skrif ons leer Jesus en sy dissipels gedoen het. Al doen jy dit net uit gehoorsaamheid sonder om resultate te verwag of te sien selfs.
- Soek die Here. God se teenwoordigheid in jou lewe wat meer en meer 'n werklikheid vir jou word, maak die verskil.
- Bid dapper dat God deur Sy Gees jou weer en weer sal vervul en sal bekragtig om mense in nood te kan bedien (Ef 3:19; Luk 11:13).
- Neem ander gelowiges sagkens met jou saam.

Toe Jesus na die aarde toe gekom het, het Hy na mense gekom met baie dieselfde verwagtinge as die meeste nie-Westerlinge. Die eerste eeuse Jood het gesoek na krag-demonstrasies, en nie alleen rasonale argumente om God se teenwoordigheid tussen hulle te glo nie. En omdat Jesus hierdie verwagtings geken het, het Hy die nodige bewyse gelewer (Mat 9:6-8; Mrk 2:10-12; Luk 5:24-26). En Hy het dit gedoen tenspyte van die gevare daaraan verbonde - dat mense meer na die krag as na God self sou soek. Hy is

verder ook nie afgesit deur die leunstoel-teoloë van sy tyd wat selfs tensynte van al die bewyse voor hulle nie wou glo dat wonders vandag nog kan plaasvind nie. Soveel so dat hulle 'n geneesde blinde probeer uitpraat het uit sy genesing (Joh 9:13-34). Hulle het wel geglo dat God in die verlede wonders kon doen, maar hulle kon nie glo dat Hy dit vandag kan doen nie (Joh 9:29).

Jesus het 'n volledige evangelie aan mense voorgehou. En die kern daarvan was dat God ons verlos van sonde. Maar ook dat hierdie verlossing van sonde verder behels dat God instaat is en gewillig is om mense van hulle huidige probleme te verlos (Mat 9:2,6; Mrk 2:5,10,11; Luk 5:20,24; Jak 5:15,16).

Ons wêreld is nog steeds opsoek na 'n God wat belangstel in hulle behoeftes en steeds Sy beloftes aan ons hou dat Hy gevangenes kan vrymaak (Luk 4:18).

In die Oosterse wêreld is mense baie meer geneig om die behoefte aan geestelike krag en ingrype te bely. Daarom is huweliksprobleme, worstelinge om kinders te hê, siekte, swak besigheid en finansiële probleme, ongelukke en gebroke verhoudinge, alles aanduidings van geestelike magte wat aan die werk is in hulle lewens. En dit het tyd geword dat die Christendom hierdie behoeftes begin bedien.

Anders gaan mense ander hulpbronne begin uittoets soos New Age of okkultisme.

Terwyl die God wat ons dien, wat ons leer ken het in Christus Jesus, begerig is om mense met Sy hart en Sy oorvloed genade te bedien oral waar hulle nood het. En ons is die kanale wat hulle hiermee moet bedien.

GEESTELIKE VASSTAAN - 'N BYBELSE PRENTJIE OOR DEMONE EN ONS GEESTELIKE WAPENS

Luk 13:11 praat van 'n "gees van siekte", wat maar net bevestig dat daar demone is wat baie spesifieke opdragte en funksies het. Vgl ook die volgende:

- 1 Tim 4:1 - geeste wat bedrieg
- 1 Joh 4:6 - gees van dwaling
- 2 Tim 1:7 - gees van vrees
- Rom 11:8 - gees wat bedwelm
- Rom 8:15 - gees wat vasvang in vrees
- Hand 16:16 - gees van waarsêery
- Luk 13:11 - gees van siekte
- Luk 11:14 - demoon van stomheid
- Mrk 9:17,25 - gees van doof- en stomheid
- Mat 12:22 - blindheid en stomheid wat 'n demoon veroorsaak
- Mat 8:28,31 - demone wat besetenheid bewerk in mense
- Sag 13:2 - gees van leuenagtigheid wat valse profesie kan veroorsaak
- Hos 4:15 - gees van prostitusie
- 1 Kon 22:22 - gees van bedrog/verleiding

So lees ons ook in die Vroeg-Christelike litteratuur van 'n gees van ambisie, 'n gees van wraak, gees van blindheid, gees van towery, gees van oorlog, gees van stryd en 'n gees van bloedvergieting.

Dit is duidelik dat Jesus die bestaan van demone in hierdie wêreld as 'n realiteit gesien het wat bloot werktuie van Satan self was. Hierdie geeste of demone het mense "binnegekome, geteister, beheer oorgeneem oor sommige se lewens, en in baie mense se lewens allerlei fisiese of psigiese probleme en siektes kom veroorsaak.

Kyk veral na gedeeltes soos Mat 12:43-45.

Ons sien selfs dat demone in varke kan gaan woon.

Dan hoor ons hoe Jesus praat daarvan dat hierdie geeste of demone gebind moet word, of hulle uitjaag uit mense uit. Vgl Mat 12:29 en Luk 11:21,22. Die “sterk man” waarvan hier sprake is is dus die Satan en sy demoon-handlangers. En die manier hoe Jesus hulle gebind of verjaag het was deur ‘n woord soos die Gees van God in Hom gegee het. Vgl Mat 4:4,7,10; Luk 4:4,8,12; Mat 8:16.

Omdat Jesus, en na Hom sy volgelinge ‘n bepaalde gesag en outoriteit gehad het was dit al wat nodig was om God se krag en Christus se oorwinning oor die magte van die bose in werking te stel.

Satan oefen sy gesag en outoriteit oor hierdie wêreld en mense se lewens uit deur verskillende vorms van sonde en siekte en die dood. Die demone is sy agente (vgl Mat 12:29).

Die sending van Jesus is dus om as die “sterker een” te kom en om die sterk amn te bind , sy huis binne te kom en hom te roof van dit wat tot nou toe sy besittings was. Bevryding en duiweluitdrywing is dus niks anders as die krag van ‘n lewende Jesus wat as die nuwe Koning die mag van Satan in mense en dinge breek en Sy heerskappy en verlossing ook daar herstel soos Hy dit wil doen nie.

Ef 6:17 sê dat die Woord van God ons swaard gaan wees in hierdie geveg, soos dit daar in Joh 8:28, 12:49 en 14:24 in Jesus se lewe was. En hierdie Woord gaan die geskrewe woord wees (Mat 4:4,7,10) of die woord wat God in daardie bepaalde situasie deur Sy Gees gaan gee (Mrk 1:25; Luk 4:35; Mrk 5:8; Mat 8:32; Mrk 9:25; Luk 13:12).

Jesus beloof verder aan sy dissipels dat Hy self hulle deur Sy Gees gaan lei in wat hulle moet sê en doen (Mat 10:19 en Joh 14:26).

BEKERING

Daar is mense wat sê bekering is nie nodig vir 'n verbondskind nie. Maar kom ons kyk na wat die Bybel daaroor sê:

God het die mens gemaak om in sy binneste wese (sy natuur) soos God te wees, beeld van God te wees, daarom blaas Hy Sy Gees in die mens in (Gen 2:7).

Maar dan kom Satan en verlei die mens met 'n leuen: Eet van die vrug van daardie boom en dan sal julle soos God wees.

Die mens kies om hierdie leuen te glo en eet van die vrug. En iets in hom gaan dood. Dit wat God gesê het gaan gebeur (hulle gaan sterf as hulle van daardie boom se vrug eet), gebeur dus.

Hier vind inderwaarheid 'n ruil plaas: Hulle Gees-natuur vir dit wat Satan hulle aangebied het ('n sondig-beheerde -, demonies-beheerde -, verstand-beheerde natuur). En "naaktheid" word dan die simbool van hierdie sondige natuur. Naaktheid wat die mens dan probeer bedek met 'n vyeblaar-voorskoot.

Maar God kom egter en konfronteer hulle met die volle waarheid, en bedien hulle dan met velklere wat hulle naakt-heid (hulle sondige natuur) kan bedek. Maar daarvoor moet 'n prys betaal word: 'n dier moes sy lewe gee, en sy bloed moes vloei.

Maar hulle ruil het verdere implikasies gehad: Dit het gemaak dat hulle verhouding met God nie meer "paradys" kon wees nie, want hulle en God het nie meer dieselfde natuur gehad nie.

Soos die geskiedenis daarna verloop, reël God sekere rituele om die mens te bly herinner dat hy met sy sondige natuur nie die paradys kan beërwe nie. Daar sal weer 'n terug-ruil moet plaasvind om ware gemeenskap met God moontlik te maak. Neem bv die sondebok-ritueel wat God inbou in Sy volk, Israel, se godsdienst. ("Hier sit ek nou my sondige natuur op hierdie bok" en dan word die bok die woestyn ingejaag om te sterf!).

Dit alles wys na Jesus, die Een wat moet sterf vir almal". Soos wat een persoon, Adam, deur sy ruil-keuse die sondige natuur almal se deel gemaak het, moet die Sondelose nou sonde gemaak word om so ontslae te raak van ons sondige natuur. Kyk maar na Rom 3:23-26; 5:12-18;6:5-11.

Wat het in wese aan die kruis dus gebeur? God het geweet dat bloed moes vloei, 'n lewe van 'n sondelose moes geruil word om 'n terugruil vir die sondige natuur van die mens moontlik te maak. En die enigste sondelose was God self. Daarom moes Hy as die God-Seun, mens word soos ons, maar sonder 'n mens-pa, anders het die bloedlyn maar weer die sondige natuur ook na Hom oorgedra.

Jesus gaan kruis toe om vir ons sonde te sterf. Maar dan nie sonde net as iets wat ons doen nie, maar sonde as hierdie sondige natuur waarmee ons gebore word. Wat ons van voor ons geboorte af het, en niks aan kan doen nie.

Die sondige-natuur-mens sal nooit in die hemel kan kom nie. Al is hulle ook verbondsmense! Al doen hulle geen sonde in hulle lewe nie, gaan hulle as gevolg van hierdie natuur hel toe. Al wat oorbly om hulle hiervan te red, is iemand wat sal kom met 'n sondelose Goddelike Gees-natuur, wat plaasvervangend in hulle plek hel toe sal gaan!

Elkeen wat in die geloof aanvaar dat hierdie ruil vir hulle persoonlik plaasgevind het, en glo dat dit genoegsaam is om hulle totaal te verlos van hulle sondige natuur, kry deel aan hierdie ewige-lewe-natuur van Jesus deur die werking van die inwonende Gees van Jesus in hulle.

In die proses word ons “een met Jesus” (Rom 6:5 e v). Deur geloof identifiseer ons met wat Jesus gedoen het vir, en namens ons. Dit is asof ons heelpad saam met Hom, deel-van-Hom, was in Sy dood, maar ook Sy opstanding.

Aan die voorkant van die kruis hang Jesus. Maar die oomblik as ek in die geloof ja sê vir hierdie ruil-transaksie om plaas te vind - Sy Goddelike Gees-natuur vir my sondige natuur - wys Hy vir my die agterkant van die kruis en sê: Maar dit beteken dat jy kies om te sterf.

Om te glo beteken om self gekruisig te word sodat ek, my ego, my ou natuur-mens kan sterf, en God deur Sy Gees in my kan lewe. Dit is die eenvoudige Evangelie, maar ook die moeilike van die Evangelie. Ek moet kies om alles prys te gee, om aan die einde van myself te kom. God gaan dit nie by my vat nie. Hy vra ‘n gewillige oorgawe.

En as ek dit gee, gee God aan my die geregtigheid van Jesus, Sy natuur, Sy Gees om in my te wees. En onmiddellik word die paradys-verhouding herstel en is daar – soos in die begin – weer vrede tussen my en God.

As God nou na my kyk, sien Hy Sy eie natuur in my en kan daar werklik harmonie en liefde tussen ons wees.

Met die sondeval wou die mens god word. Daarom is die wese van die sondige natuur dat die mens dink en lewe asof hy god is. Die mens sit op sy eie troon in sy lewe en alles draai net om hom. Met die terugruil word God weer God en ek “mens van God”. Dit is die wese van bekering, ware bekering! En dit laat die mens in sy wese verander.

Sonder hierdie terugruil kan die mens nooit werklik verander nie, en is die mens lynreg oppad hel toe (al is dit onder ‘n blink godsdienstige dop!)

‘n Natuurverandering is die hart van ware Bybelse bekering. Hierdie soort bekering beskryf die Bybel met woorde soos metanoia (letterlik “my verstand verander”) en upostrepho (letterlik “om-keer”).

As my gees dan verander word in Jesus, sal hierdie bekering deurwerk in my

sielsarea (waar my verstand, emosies en wil, setel). Maar dit behels ook ‘n omkeer wat selfs my liggaam en die werking daarvan sal beïnvloed.

Van die prentjies wat die Bybel gebruik om hierdie ruil-proses vir ons teken is ... Dit is soos die koringkorrel wat in die grond moet val en sterf. Of soos ‘n die man wat alles moes verkoop om die skat of pèrel te kon koop. Of dit wat daar in Gal 2:20 hieroor staan.

1 Joh 3:6 sê dat Jesus se natuur in jou nie kan sondig nie. As daar sondes in jou lewe as Christen is, is dit omdat jy ‘n doelbewuste keuse gemaak het om te sondig (teen jou nuwe natuur se grein in).

Die Gees van God is besig met ‘n heiligmakings-proses in jou lewe. En

hierdie proses is in wese waar jy nou jou siel en liggaam moet onderwerp aan die nuwe natuur (Jesus se Gees wat in jou woon) se beheer oor jou hele lewe.

Prakties beteken dit 'n prysgee van alles wat ek gedink het "my regte" is (om 'n huis te hê of 'n motor, of om gelukkig te wees). By my bekering sit ek dus saam met my ou natuur al hierdie regte, en al die dinge wat ek nie uit myself nie kan oorwin nie in die mandjie, wat ek dan wil ruil vir Jesus se volmaakte natuur. En God ontvang dit en gee vir my 'n nuwe natuur (2 Kor 5:17).

Om my hiermee te help, moet God soms ruimte in ons lewens maak vir krisisse om ons op 'n punt te bring waar ons geen ander keuse het as om te kies om te sterf nie. (G'n wonder Jakobus praat van "wees bly as daar allerhande beproewinge oor julle pad kom ...")

Sien, 'n oorwinningslewe is eers na die sterf en opneem van ons nuwe lewe in Jesus moontlik.

Ek wil afsluit: Dink wat kan gebeur as twee mense wat hierdie nuwe natuur in hulle het, met mekaar 'n verhouding het of trou: Dan kan daar mos ware harmonie tussen hulle wees (in die huwelik, gesin en werk)! As hierdie natuur in ons is, kan ons groei tot 'n volwassenheid in Jesus (soos wat Jesus was) na gees, siel en liggaam. Sonder vlek of rimpel.

Want op 'n dag gaan God kom om Sy Bruid te kom haal. Presies soos Hy, met Sy natuur wat tot volle wasdom gekom het. God klop nie duike uit nie. Hy gee vir ons iets nuuts in die kern van ons wese. Dit is wat 2 Kor 5:17 tog sê. Dit is wat bekering beteken.

DIE HERE NEEM ONS NA 'N HOËR VLAK

Van oraloer is Christene onder druk en beleef ons dinge wat amper "abnormaal" stresvol is. Dit is asof ons gerek word en gestrek word, veel verder as wat ons eie "comfort zones" dit sou wou hê.

Wat is God se planne hiermee? Die Skrif belowe immers daar in Rom 8:28 dat God iets goeds ook hiermee kan bereik in ons lewens. Kom blaa saam met my na 'n paar Skrifgedeeltes en laat God deur Sy Gees jou bemoedig en inlig oor Sy planne hiermee:

- Luk 4:16 tot 5:11,17-26

Toe Jesus begin het met Sy bediening was dit so anders as waaraan mense gewoon was. Sy bediening het mense bedien met die krag, outoriteit, genade en liefde van 'n lewende God, en nie net leë woorde vol allerlei menslike slimghede soos die gewone godsdienste van Sy dag nie.

Godsdienste maak mense klein dink, want daar is nie 'n almagtige God wat God-grootte dinge kan doen om mee rekening te hou nie. Maar mense wat in 'n intieme liefdesverhouding met so 'n God tree en gelei en bedien word met genoeg lewende Woord en Sy Gees, begin in God se terme en standarde dink en leef.

Waar Hy ingestap het tussen skynbaar "godsdienstige mense", het demone gemanifesteer (4:33). Mense het iets beleef van die waar-woord van Jes 42 se "dienaer van die lewende God" se bediening daar tussen hulle (v 36). Wat gemaak het dat mense vrygeword het van allerlei bindinge en siektes (v 40). Jesus was werklik besig om hulle bloot te stel aan 'n hoër vlak van bediening en openbaring van God se plan vir nou in hulle lewens. Van wat Sy verbond, en liefde nou vir hulle inhou.

'n Voorbeeld hiervan was soos dit wat op daardie dag gebeur het waarvan Luk 5:1 ev ons vertel. Wat gemaak het dat mense in pure verwondering na hulle asemes gesnak het, want soveel van God se genadige oorfloed het hulle nog nooit beleef nie!

Of dit wat in daardie verlamde man se lewe gebeur het die dag toe hierdie Jesus in sy lewe ingestap het. G'n wonder die skare het aan mekaar gesê Wie sou kon dink dat daar 'n dag soos vandag sou aanbreek wat ons met ons eie oë hierdie kaliber wonderlike, bonatuurlike dinge sou sien gebeur!

Vandag weer beleef ons dwarsoor die wêreld dat Jesus op 'n wyse met mense besig raak wat maak dat hulle baie groter verwagtings en drome het as enige vorige generasie. Nog nooit was daar 'n generasie wat so groot dink soos hierdie generasie nie!

- Jes 55:8 -11

God dink soveel groter as wat ons kan dink. Onthou dat dit dieselfde God is wat die wêreld en al die planete gemaak het. Soos Jes 40:12 ev Hom beskryf as die Een wat 'n aarde wat teen 10 000 myl per sekonde beweeg en 'n 1000 myl per sekond na 'n ander rigting spin, met al sy water en berge so perfek in balans dat daar nooit 'n "wobble" erens langs die pad kom nie.

Dink dus net wat kan gebeur as Hy ons begin oplik na die vlak en grootte waarin Hy dink en beplan! Dit is wat besig is om met mense te gebeur wat toelaat dat God deur Sy Woord en Gees hulle bedien en

deursuur met Sy gedagtes. Dit is Hy wat Jes 40:29-31 waar maak in mense se lewens wat kom sit in Sy teenwoordigheid en bedien word met Sy vuur en die hart van Jesus.

Dink dus net wat kan gebeur as Hy jou begin oplaag na die vlak en grootte waarin Hy dink en beplan!

- Rom 12:2

Van oral oor hoor ons dat God besliste planne vir die wêreld het. Planne soos dit wat daar in Jes 46:10 en 60:1 staan. Laat dus toe dat God jou gedagtes in lyn begin kry met dit wat in Sy hart vir hierdie seisoen is.

- 1 Kor 2:9 ev

Solank as wat ons net luister na wat die wêreld sê wat moontlik is, en bedink wat ons verstand kan bedink, leef ons ver onder die vlak wat God vir ons bedoel het. God wil nie dat ons vanuit hierdie beperkings dink en leef nie. Daarom het Hy Sy Gees aan ons gegee om in ons te kom woon om self aan ons te openbaar wat in Sy hart is. Hy wil vir ons drome en prentjies gee, soos aan 'n Josef en 'n Abraham. Dinge wat God gratis aan Sy mense wil gee (v 12).

Ons God is die Eenaar van alles, en ons is Sy mede-erfgename hier en nou. Maar dit is net die Gees van God wat ons kan help om iets van die omvang hiervan te kan vasgryp.

- Jer 29:11-14

Die Here beoog 'n nuwe toekoms vir ons. Maar om te begryp wat Hy werklik in die oog het vir ons, moet ons sensitief wees vir die hart van God.

- Ps 115:9 -12

Die Here is letterlik besig om heeltyd nuwe maniere uit te dink om my te seën! "God is dreaming up new ways to bless me!" Ons het nog nie die helfde gesien wat God kan en wil doen nie. Dit raak tyd dat ons begin groter dink.

- 1 Kor 13:11

Ons is nie meer geestelike kinders nie. Dit raak tyd dat ons in pas kom met God se verwagtings vir ons. God het ons bedoel om reeds op 'n hoër vlak van outoriteit en geestelike volwassenheid te funksioneer. God soek na geloof in ons wat sal maak dat ons meer liefhê. En wat sal maak dat God ons met groter krag en outoriteit kan vertrou.

- Ef 2:6

Maar dan moet ons ons posisie langs Christus begin inneem, sit waar Hy sit om dinge te begin sien soos Hy dit sien.

GOD IS BESIG OM SY BRUID TE RESTOREER

Ons lewe in 'n stukkende wêreld vol stukkende mense. Dit is waar in die gewone gemeenskap, maar ook binne die geloofsgemeenskap in die verskillende gemeentes in die Liggaam van Christus.

Kyk ons na mekaar as gelowiges, sien ons ook maar mense wat seer en vol harts-wonde is. Sien ons ook maar mense wat oor die jare heen hoë "sekuriteits-mure" om hulle harte gebou het om nie so seer te kry nie. Dink maar aan daardie jong dogter van vyf-ses wat elke dag uit haar pa se mond moes hoor dat sy net nie goed genoeg is nie. Wat maar erens langs die pad gekies het om dit te glo, en toe 'n muur van minderwaardigheid om haar hart gebou het. Mense kan jou dan nie meer so seer maak as hulle jou as "nie goed genoeg" beskou nie. Jy gee hulle immers sommer in die staanspoor gelyk as hulle so sou dink.

En dink aan daardie jongman wat 'n muur van aggressie om sy hart gebou het om so mense van sy lyf en sy hart weg te hou wat al soveel keer sy hart langs die pad gebreek het.

As ons eerlik is, moet ons teenoor mekaar erken dat ons maar almal hierdie mure - of "vestings" soos die Bybel dit daar in 2 Kor 10:4 en 5 noem - om ons harte gebou het. Die mure is net elke keer met ander stene gebou. In my lewe is dit miskien ang of vrees, in jou lewe is agterdog, twyfel of ongelooft, onafhanklikheid, valse sekuriteite, onvergifnis, wantroue, kontrole of manipulerings.

Maar 'n ander ding wat ons vir mekaar oor hierdie mure moet sê is dat dit miskien keer dat ons seerkry, maar dit keer ook dat ons voluit kan liefhê en onself voluit kan gee om mekaar te bedien! Boonop gee dit aan die bese daardie handvatsel of vashouplek (Ef 4:27) wat hom sê gee in my lewe om my te manipuleer om na sy pype te dans.

Daarom is dit sulke wonderlike nuus om in die Skrif raak te lees dat God besig is om sy mense te restoreer. Dit is nie Sy hart dat ons vir die res van ons lewe so stukkend hoef rond te loop nie. Hy wil ons heeltemal nuut en heelmaak.

Daar is soveel teksgedeeltes in die Skrif wat hierdie wonderlike Skrifwaarheid vir ons raakvat. Dink maar aan Titus 3:5 waar daar staan dat God in ons begin werk het deur die "bad van die wedergeboorte" en hierdie werk boonop voortsit deur die "vernuwing van die Heilige Gees".

Ander teksgedeeltes is Hand 3:19 tot 21 en Rom 8. En dan is daar nog al die gedeeltes wat handel oor die tempel-restorasie in die Ou Testament - as ons dit profeties uitlê in die lig van die Nuwe Testamentiese waarheid dat ek en jy nou die tempel is van God - soos 2 Kron 24, 29, en die boek Haggai.

In Fil 1:6 belowe die Here aan ons dat God in Sy getrouheid dit wat Hy in ons lewe begin doen het, sal voltooi tot ons dood. Daarom het Hy aan ons Sy Gees gegee om in ons te woon en ons te lei as kinders van God (Rom 8), en ons in die volle waarheid te lei wat ons werklik kan vrymaak (1 Joh 2:20,27 en Joh 8:32).

In Fil 2:12 en 13 moedig Paulus ons aan om "ons heil uit te werk met vrees en bewing, want dit is God wat in julle werk om te wil sowel as om te werk na sy welbehag".

Ek wil dit so verstaan dat ons aan God die geleentheid kan gee om hierdie restorasie-werk in ons te doen daar waar ons in Sy teenwoordigheid elke dag in ons luisterkamer werklik kwaliteit-tyd spandeer, maar

ook daar waar ons toelaat dat ons deur die Liggaam van gelowiges wat om ons is, bedien kan word in klein en groter groepe. G'n wonder die Hebreërskrywer waarsku ons om nie die samekomste van gelowiges te verwaarloos nie. Immers is die verskeidenheid van gawes van die Gees juis daar wat God wil gebruik om, deur Sy Woord en die bediening van die Gees, ons te bedien en ons te restoureer.

Wat die meeste van ons nie besef nie, is dat die woordjie "restourasie" een van daardie "Eina-halleluja-woorde" in die Bybel is. Restourasie behels ten minste twee prosesse:

- 'n Proses waar alles "gestrip", uitmekaargehaal en skoongemaak word tot op die been. En dit is die "eina-gedeelte"!
- En dan eers 'n heelmaak en aanmeekaarsit soos wat dit oorspronklik die bedoeling was, waaroor ons natuurlik "halleluja" kan skreeu!

God se plan is ons totale verlossing, ons totale heel-word. Hy wil hê dat ons moet lyk soos Christus, en daarom moet my stukkendheid uit die pad kom, want dit blokeer die uitsig en trek die aandag af.

Daarom is die teiken van God se restourasieproses ons sielsarea, en spesifiek al hierdie vestings wat ons so om ons hart en ons lewe gebou het. Daarom moet Hy deur die bediening van Sy Woord en die bediening van die gawes van die Gees met al daardie idees, begeertes, optredes, gewoontes en houding-tjies van ons mee klaar speel, dat ons vry kan wees om te lewe en lief te hê soos dit oorspronklik Sy hart vir ons was.

'n Pragtige prentjie wat die Here gebruik het om vir my iets te laat verstaan van hoe dit gebeur, is dit wat daar in Mat 16:18 en 19, en 18:18 staan. Waar daar gepraat word van "bind/toesluit" en "ontbind/oopsluit".

Ek weet jy het al op baie plekke iets hieroor gehoor of gelees, maar kom ek deel met jou wat vir my sin maak.

Mat 16:19 en 18:18 praat van die loper-sleutels van die Koninkryk wat hier aan die dissipels van Jesus gegee word. Wat meebring dat wat ons ookal hiermee toesluit of oopsluit op aarde en in die hemel toe of oop sal wees.

Baie van die lering o hierdie verse fokus op die bese wat ons dan moet bind in die Naam van Christus, en die Heilige Gees wat ons dan moet ontbind om te begin werk in ons lewens. Maar my probleem hiermee is dat ons so op 'n reedsverslane vyand fokus.

Ek is oortuig dat ons vyand nie primer buite is nie, maar binne. In ons sielarena. Ons gees is wederbaar en vernuwe deur die werking en inwoning van die Gees van God in ons, maar elke dag is ons in 'n interne burgeroorlog gewikkel met ons nog-nie-gerestoureerde sielsareas of ou sielsnatuur nie. Hierdie gevegsfront is in die sg "geestelike oorlog-lering" oor die jare totaal verwaarloos met tragiese gevolge in die lewens van Christene. Dit het gemaak dat God nie sy beplande restourasiewerk in ons lewens kon afhandel soos en wanneer Hy wou nie. Ons moes immers ons eers hieraan onderwerp voordat Hy dit kon doen (Jak 4:7 en 8). En omdat ons onkundig was, het ons in gebreke gebly om Hom te vra om dit te doen.

Die pad na vryheid, oorwinning en totale restourering is daar vir elke Christen. En hierdie pad loop deur die arena waar 'n hardkoppige drietal "bullies" van ons sielsarea ons staan en inwag. Ons verstand, will en

emosies het immers al die jare ons hele lewe gemanipuleer en beheer na hulle baie siek oordeel, en hulle gaan nie sommer sonder erge weerstand sommer net daarvan afsien nie. Maar die sleutels wat Jesus vir jou in die hand stop is sleutels wat elke ysterhek, en steenmuur en vesting kan toesluit en oopsluit soos Hy jou self sal leer. En as jy na Hom en Hom alleen luister wat deur Sy Woord en Gees jou self sal bedien, sal die waarheid jou waarlik vry maak.

Staan dus op, vat hierdie sleutels en begin proe daardie oorwinning en oorvloed waarvoor Jesus reeds ook vir jou bewerk het.

Die Hebreeuse en Griekse woorde vir “bind” of “toesluit” teken vir ons ‘n klomp positiewe prentjies - om vas te maak, te knoop, aanmekaar te weef, om een van te maak of toe te sluit.

Die Griekse woord wat ons met “toesluit” vertaal is ‘n prentjie-woord wat ons ‘n tipiese Afrika-vrou laat sien wat haar baba veilig agter haar rug vasbind. So lyk dit vir my, wil die Here hê dat ons onself en die mense waarvoor ons moet intree in gebed, moet gaan vasbind aan God en Sy Woord, aan Sy beloftes, en dit wat Christus reeds volledig vir ons gedoen en bewerk het. Dink maar aan die oorwinning, hemelse skatte, die oorvloed, die lewe en genesing wat reeds ons s’n is in Christus,.

Deel hiervan is natuurlik dat Christus reeds die sterk man (die bouse) gebind het, en daarom kan ons in geloof nou ingaan en die dinge wat hy by ons kom roof het, gaan terugvat in Jesus se Naam.

‘n Ander mooi prentjie wat hierdie vasbind goed teken is om dit te verstaan in die lig van Ps 91. Dat ons as’t ware ingetrek word om met ons hele lewe in die skaduwee van die Allerhoogste veilig en sekuur te gaan sit. Daar kan niemand en niks ons aanraak nie.

Wat vir my wonderlik is, is om te lees dat as ons met hierdie “vasbind” in die geloof voor God besig is, geld hierdie vasbind nie net vir ons hier op aarde nie, maar moet ook die hemele - en dus die demoniese wêreld wat deel is van die tweede hemel - dit respekteer en eerbiedig.

Daarom kan ons God vra om deur Sy Gees, terwyl ons so veilig vasgebind sit in Sy teenwoordigheid, in te kom by die deure in ons sielsarea wat ons dan oopgesluit het. Hy wat immers die harte en gees kan ondersoek tot daar waar ons nie eers van weet nie, kan ons daar skoon- en heelmaak. Hy kan daar al daardie stene van die vestings een vir een begin afpak, totdat ons weer werklik vry kan lewe en kan liefhê.

Die woord luo in die Grieks - wat ons weer met “ontbind” of “oopsluit” vertaal het - saam met die ander woorde in die konteks teken die volgende prentjies vir ons: om op te breek, te vernietig, uitmekaar te haal, met rubbewegings uitmekaar te skeur of los te ruk.

Die woord “losmaak” of “oopsluit” is in werklikheid ‘n prentjie wat ons lewe vry kan maak, want dit teken aan ons hoe God daardie 3 aards-terroriste hier in ons harte kom uitruk uit hulle heersersposisie en kom disekteer op sy hospitaalbed. Totdat al die seer, haat en herinneringe waarmee hulle my en jou vir jare geterroriseer het, geneutraliseer is. En Hy die wonde kon salf, verbind, en kon heel met Sy liefde, genade en verlossing.

Dit is ‘n woord wat ons die gebulder van God se stootskraper of Sy kanon laat hoor wat al hierdie selfgeboorde mure of vestings om ons hart kan platstoot of opblaas sodat ons vry kan wees om voluit te lewe.

Ons verstand, wil en emosies het getrou oor die jare al die detail van trauma en seerkry-geleenthede diep weg gaan liaseer en verder detail-strategieë en aanvals-en verdedigingsplanne gaan ontwerp om ons teen soortgelyke seerkry te beskerm.

Vir party van ons is hierdie traumas en wonde uit die verlede nou nog so werklik asof dit tien minute gelede gebeur het. En dit net omdat ons siel-driemanskap so getrou alles in detail erens gaan stoor het, om dit ook gereeld onder ons neuse te vryf.

Ons neem maar genoeg daarmee en put soms selfs 'n sieklike soort genot daaruit om maar weer die seer te beleef. Min het ons besef dat hierdie hele proses die genesing, die restourasiewerk en vloei van die oorfloed van God deur ons lewe, stuit en selfs ongelooflik vertraag nie. God wil ons vry en heelmaak van al hierdie onverwerkte seer, behoeftes en idees wat ons so gepynig en verwring het oor die jare.

Baie mense - veral in die vernuwing - maak hierdie pad na genesing so ingewikkeld, maar eintlik is dit wonderlik eenvoudig. Die evangelie is mos eenvoudig. Jesus het altyd alles eenvoudig gemaak sodat selfs 'n kind dit kon verstaan. Hy wou nooit hê dat mense wat Hom leer vertrou het, van enigiets of enigiemand anders afhanklik hoef te wees as net Sy Woord, Sy liefde, Sy genesing en Sy krag in hulle lewens nie. Daarom wou Hy nie hê dat Sy skape van allerlei pastorale beraders of programme afhanklik hoef te wees vir hulle vryword nie.

Hy sê Hy gee vir ons die sleutels wat 'n oplossing is vir al ons nood. Wat tans keer dat God se genade, liefde en vrymakende krag tot in die diepste en donkerste areas in ons lewens kan deursuur.

Verstaan mooi, God wil nie jou hele verdedigingsstelsel aftakel of afskakel nie. Hy wil dit ook nie sommer platloop of ignoreer sonder jou toestemming nie. Nee, Hy doen dit nooit met 'n mens nie. Hy wag totdat jy vra, en dan doen Hy wat jy vir Hom toelaat om te doen.

Jesus Christus kan jou genees en heelmaak. Hy staan by die deur en klop. Hy sal geduldig wag totdat jy gereed is om self die deur vir Hom oop te maak, en eers dan sal Hy inkom en met Sy vrymakende restoureringswerk daar agter die mure en toe-deure begin. Laag vir laag sal Hy al daardie verdediging van oor die jare begin loswikkeld en afhaal. Al daardie ontkenning, selfverdediging en selfstandigheid waarmee jy jou seer en diepste hartsbehoefte mee toegemaak en weggesteek het, sal Hy begin bedien. Totdat ons gevul is met Sy genade en liefde, en genees is. Eers dan kan God ons drie sielsgenote in perfekte harmonie en eenheid kry met ons liggaam en gees.

As dit gebeur, kry ons wat geleerdes noem "sinergisme". Wat beteken dat die somtotaal van hierdie drie dele saam meer krag en dinamika kan bewerk as wat hulle apart kon doen.

As jy werklik sinergisme wil sien, moet jy na Jesus kyk. In Hom sien jy 'n liggaam wat gedissiplineerd 40 dae kon vas en selfs op water kon loop, en 'n siel wat midde al die haat en seer steeds onbevange kon liefhê, en met 'n gees wat in gehoorsaamheid aan Sy Vader die magte van die bose en siekte kon verjaag.

G'n wonder Rom 8:17 sê dat ons ook iets van die oorwinning, vrede, genade en heerlikheid van Jesus kan beleef as ons in Sy voetspore midde die seer van hierdie wêreld sou stap nie. Dit is deel van God se restourasie-werk in ons. Sy begeerte is om ons daar te bring. Om ons te leer om soos Jesus te lewe en soos Jesus te doen (Ef 5:1 en Joh 14:12).

Maar dan vra hierdie oopsluit ook dat ek en jy totaal moet oorgee sodat Hy elke area in ons lewe kan ondersoek. En behels dit 'n stuk kruisiging van die ou natuur in ons. So kan Hy ons deur die werking van Sy Gees werklik skoonmaak, om ons daarna net weer vol te maak, omdat ons kapasiteit nou vergroot is om Sy salwing en Sy krag vir nou in ons lewe te kan akkommodeer.

So beweeg ons letterlik van Golgota en die oopgraf na hemelse plekke waar ons weer ons posisie op die troon kan inneem om te begin heers oor omstandighede en situasies. So word ons weer vry om mekaar en die gemeenskap te bedien met die krag van die opgestane Christus.

SAAI EN OES

Ons dink baie keer aan ons lewe asof ons mense is wat op 'n geestelike reis is en geestelike ervarings het op hierdie aarde. Maar eintlik is ons geestelike wesens wat vir alle tyd en ewigheid lewe wat 'n kort ervaring ook hier op aarde het.

Soos Jesus. En soos Jesus het ons dieselfde keuses om óf te ontvang óf te weier wat Hy reeds volkome vir ons voorsien het. Ons verlede, ons lewe in die nou, en ons toekoms as gelowiges gaan alles oor die saad wat ons saai deur die keuses wat ons in hierdie lewe maak.

Gal 6:7 sê nie verniet ...dat wat jy saai sal jy maai nie. Maar die wonder van die evangelie is dat al die gebrek en gemors wat ek en jy in ons verlede gesaai het, nie al hoef te wees wat ons nou oes nie. God het ook vir ons oorvloed in Christus bewerk. Ons moet net kies om dit te glo en daaruit begin lewe.

Almal van ons het in hierdie stukkende wêreld ons teen allerlei stukkende mense vasgeloop wat nie geweet het hoe om ons behoeftes te bedien, of ons seer te heel, of al die verwarring en vrae in ons harte te beantwoord nie. Dit het gemaak dat ons mure om ons gebou het, en dat baie van wat ons dink en voel, en besluite wat ons neem, soms so verwronge is.

Maar hierdie siklus kan gebreek word. Ons hoef nie vir die res van ons lewe opgeskeep te sit met al die herinneringe wat ons aanmekeer terugspeel en so versterk word nie. Ons hoef nie opgeskeep te sit met al die woede, verwarring, vrees en onvergifnis wat opgebottel hier in die donker hoekies van ons siel is nie. Hierdie herinneringe wat gevul is met soveel emosie, vrese, verkeerde gesindhede en skewe persepsies, wat ons lewe tot hier so gemanipuleer en beheer het, se mag kan gebreek word.

En dit gaan nie daaroor dat jy net geleer word om saam te lewe daarmee nie. Dit gaan daaroor dat jy God inlaat en toelaat om agter al daardie skerms in te gaan en die pyn van al daardie herinneringe te gaan uitdoof en neutraliseer deur Sy genade en krag.

Almal van ons is onder verskillende omstandighede gebore en het verskillend groot geword. En in almal van ons se situasies was daar swak en sterk punte. Tussen al die lekker was daar hope en hope gemors en seerkry-dinge wat ons almal moes hanteer. Partykeer het ons dit reggekry, en partykeer het ons liederlike gefaal.

Toe jy 'n Christen geword het, is jy van nuuts-af gebore. Binne 'n nuwe familie met 'n nuwe Ouer, 'n Hemelse Vader, en 'n nuwe bloedlyn wat jou aan Hom en ander in hierdie familie bind. Jy hoef nie langer gebind te word vanuit jou aardse mens-verlede nie. Jy hoef nie langer te worstel oor wie jy is of wie jy kan wees as jy dink oor jou aardse ouers en aardse bloedlyn of omstandighede waarin jy hier grootgeword het nie.

Jy hoef maar net te kies om al die selfopgelegte beperkings wat jy gekies het om op jouself te lê, te los en as 'n nuwe mens te lewe wat in 'n intieme liefdesverhouding met die lewende God is.

Jy moet leer om jou gedagtes, jou gevoelens en jou wilskeuses in lyn te kry met die waarheid van die Woord wat die Gees aan jou daaglik bedien. Dat jy kind van God is. En dan nie 'n vreesbevange kind wat

sukkel om God deur al die vuil filters van skuld en vrees uit die verlede bekyk nie, maar een wat werklik vrygeword het.

Al die lering van die verlede maak nie 'n mens vry nie. Dit is eers as al daardie proppe uit jou ore, en die mure en filters om jou hart verwyder is, wat die waarheid suiwer kan deurbreek en jou kan vrymaak.

Daarom moet daar 'n dag in ons lewe kom wat ons so moeg raak vir ons verlede dat ons daarmee wil klaar kry vir altyd.

En dit is dan wanneer ons die waarheid van die Woord moet meng met geloof (soos daar in Heb 4:2 o a staan), en moet doen wat hier in Mat 16:19 en 18:18 staan.

Dit is dan wanneer ons ons wil aan God se wil moet vasbind. En ons gedagtes en verstand aan die gedagtes van Christus moet vasbind. En ek myself moet vasbind aan die bloed van Christus en wat dit vir my gedoen het.

En dan moet Christus my vasbind aan die paaie wat Hy gestap het sodat ek in Sy voetspore kan leer loop. Sodat ek Sy Koninkryk en Sy wil sal soek in my lewe bo alles.

En dan moet ek Hom vra om my te bind aan dit wat Hy vir my reeds bewerk het aan die kruis, en deur die oop graf, want daar is krag, outoriteit, liefde, vergifnis, genade, en dit kan deur my lewe dan begin vloei en my begin restoureer.

Natuurlik beteken dit nie dat as ek aan Hom vasgebind is, dat ek nie meer kan verdwaal in hierdie proses nie. Nee, al wat dit beteken is dat ek nie meer dit kan doen sonder dat al die rooi waarskuwingsligte oral om my begin flits en fluit as ek dit doen nie.

As ek dit nogtans doen, dan is dit 'n wilskeuse om ongehoorsaam te wees tenspyte van al die duidelike leiding wat ek van alle kante kry - waar ek voorheen in die donker hierdie keuses gedoen het en nie eers geweet het wat ek inderwaarheid doen nie.

In die mate wat jy God toelaat om jou met die waarheid te bedien, oor hierdie waarheid mediteer, dit begin toepas in jou lewe, en daarvolgens begin handel, gaan iets in jou gebeur. Dit gaan jou gees voed en versterk. En jou gees gaan begin stap na jou verstand en na jou emosies en hulle begin konfronteer met die waarheid. En jy sal dan moet kies wat jy gaan glo en wat jy in die vervolg gaan doen: Gaan jy doen soos wat God deur Sy Gees aan jou gees bedien het, of gaan jy maar steeds aan die wyses uit die verlede steeds bly vasklou.

As jy in geloof jouself aan God en Sy Woord begin onderwerp, gaan God jou bedien met antwoorde op jou vrae en met verlossing en restourasie.

Geloof kom as jy die Woord hoor, en groei as jy begin doen wat die Woord sê.

In die begin, toe God die mens geskap het, het God se Gees deur die mens se gees met sy siel gekommunikeer om God se goddelike plan en wil te gehoorsaam en deur die erdekruik van die mens se liggaam te laat realiseer. Maar na die val is hierdie kommunikasie verbreek en het die mens se gees sy salwing en heersersposisie verloor, en het die mens se siel eenvoudig oorgeneem, op grond van sy eie intellektuele en emosionele kennis, en verstaan van goed en kwaad, alles begin beheer.

Dit het gemaak dat die mens se siels-trio alles begin skeeftrek en verwing het. Dit is eers as God se Gees weer hierdie trio kan beetkry as die Hemelse Chiropraktisyn, wat dinge weer heropgely en inlid getrek kan word. Maar God doen dit nie sonder jou toestemming nie.

Maar dan gaan dit baie keer soos daardie radiogsprek aan die kus van Kanada 'n paar jaar gelede:

Pas asb jou koers met 0.5 grade na die Suide aan om 'n botsing te vermy.

Pas jou koers met 15 grade na die Suide aan om 'n botsing te vermy.

Dit is die kaptein wat praat. Pas jou koers aan.

Nee. Pas jy jou koers aan.

Dit is die Vliegdekskip USS van die Amerikaanse Vloot wat praat. Pas onmiddellik jou koers aan.

Dit is die vuurtoring wat praat. Pas jou koers aan.

Daarom roep Fil 2:12 en 13 ons op om betrokke te raak by hierdie restoreringsproses wat in ons aan die gang is. Luister hoe vertaal die Amplified Bybel dit: " Work out - cultivate, carry out to the goal and fully complete - your own salvation with reverence and awe and trembling (self distrust, that is with serious caution, tenderness of conscience, watchfulness against temptation; timidly shrinking from whatever might offend God and discredit the name of Christ..

Natuurlik gaan ons siel met alles wat hy het, wal gooi. Daarom roep 2 Kor 10:5 ons op om al hierdie walle te begin neerwerp en te laat verwyder.

Jy moet verstaan waarom die mens oor die jare hierdie mure om hom gebou het. Dit was om te kan oorleef midde situasies wat in die verlede buite beheer gevoel het. Hierdie vestings was baie keer 'n verwronge prentjie van die gebeure, met al die gepaardgaande emosies en keuses, om 'n stuk gebeure so te hanteer dat dit aanvaarbaar of leefbaar kon wees.

Dit is wat bv gebeur as 'n kind seksueel gemolesteer word. Die meeste van hierdie kinders draai dan die gebeure so dat hulle agterna dink dat hulle dit veroorsaak het. Hulle begin redeneer dat as hulle net kan leer hoe om die mense om hulle beter te hanteer - so perfek moontlik te hanteer - sal dit nooit weer gebeur nie.

As 'n mens eers vasgevang is in al hierdie logiese gedagtes en rasionalisasies, word ons rigied en hanteer ons ook in die toekoms mense oor die algemeen so. Daarom verhoed hierdie vestings ons om vry, oorwinnende Christene te kan wees wat mense om ons kan bedien met liefde, genade en genesing in Christus.

Hoe keer jy dit gebeur?

Kom ek gebruik 'n voorbeeld. Neem bv woede. Let veral noukeurig op hoe jy optreë as iemand jou beledig, of kwaadmaak, of vir jou leuens vertel. A g v al jou aangeleerde verdedigingsgedrag van die verlede hanteer jy daardie persoon se optrede gewoonlik met woede en aggressie. En regverdig jy jouself daarvoor. En sondig jy as jy dit nie binne 24-uur sou afhandel en liefdevol hanteer met daardie mens nie (Ef 4:26).

En moenie jou woede so maklik 'n heilige woede noem nie. Die meeste van ons ken dit nie. So, vergeet sommer hierdie verskoning ook maar.

Maak eerder maar met jouself uit dat alle woede spruit uit die feit dat jy jouself wil regverdig in die situasie. En dat jy jouself so wou verdedig. En as jy dit besef, besef jy dat jou emosies wegdryf van dit wat in God se hart vir jou is. Moenie eers dit verder analiseer nie. Begin net jouself vasbind aan Christus en sy hart nou vir jou. Kry al daardie gedagtes oor persoonlike regte, en wat reg is in die situasie, in lyn met wat nou in Sy hart is, en kry jou eie gedagtes en emosies in lyn daarmee.

Worstel jy met vrees en twyfel? Of met gesagsfigure oor jou? Of met gesins- of familieledede of bure? Sukkel jy om te wag vir dinge? Of worstel jy met jaloesie oor mense wat vooruit in die lewe gaan of meer het as jy? Sukkel jy met jou huwelik of met die feit dat jy alleen is? Dan worstel jy met 'n sielstrio wat nogsteeds erens hulle invloed laat geld.

'n Klomp persoonlike spanning sal waai as ons ons sielstrio agter die stuur van ons lewe uitskop en die stuur oorgee aan die Here deur Sy Gees.

Kom ons bid dan dat die Here ons begin bedien:

Loof die Here, o my siel, en alles wat in my is, Sy heilige Naam.

Siel, ek bind jou aan God se hartsbegeerte vir jou vas as 'n tenvolle geïntegreerde deel van God se heerlike lewe en bedoeling vir my. Ek maak alle verkeerde gelofies, houdings, denkpatrone/idees, kontrolemeganismes, selfgesentreerdheid en lae los waarmee jy my probeer beskerm het oor die jare en my lewe beheer het.

Ek los alle ontkenning, bedrog, en moedeloosheid wat jy bewerk. Ek maak alle vloeke en woorde los wat jy oor die jare as waarheid aanvaar het. Ek maak alle bande en verkeerde verbintenisse los wat jy oor die jare met mense en dinge gesluit het. Ek maak ook al die bande met vorige generasies en hulle krisis, wat jy as feite oor my aanvaar het, los in die Naam van Jesus, of dit nou kom van mense of van demoniese magte wat op die wyse my wou beheer. Ek kom en bind myself nou vas aan die heerlike vryheid wat daar in Christus Jesus is, wat my deel geword het in my splinternuwe bloedverbond en nuwe geloofs- en familiegemeenskap as kind van God.

Siel, jy is geskep deur God om die openbaringe en werkinge van God se Gees te vertaal in verstaanbare taal aan die wêreld, en nie om my lewe te oorheers nie. Jy het nie 'n idee wat God alles in Sy hart vir jou het as jy volkome inlyn kom met wat in Sy hart vir jou is nie. Daarom kies ek nou dat jy 'n oorgegewe instrument word in die hand van God se Gees, om dit wat in God se hart is uit te druk. Woorde en gedagtes van lewe sal voortaan uit my verstand, wat gedurig vernuwe word, stroom. Bonatuurlike vrede en vreugde sal my emosies, wat gedurig vernuwe word, oorheers. Terwyl 'n goddelike en gesonde dapperheid my wil sal inspireer om keuses te maak vir God se koninkryk en Sy wil in my lewe.

Daarom, siel, bind ek elke deel van jou nou aan God se plan en bedoeling vir my lewe vas.

Verstand, waar jy voorheen vasgevang gesit het in allerlei negatiewe gedagtes en vrese oor dinge waaroor jy nie beheer of antwoorde het nie, bind ek jou nou aan God, aan Sy bestaan en wonderwerkende genade en vrede vas, sodat Sy vrede jou nou begin oorheers. Ek bind jou vas aan 'n heerlike bewuswording dat God self in ons is en my nou bedien met Sy restourerende genade.

God gaan jou gebruik om Sy wysheid en Sy openbaringe deur die werking van die Gees en Sy Woord aan ander te openbaar.

Emosies, ek maak jou los sodat jy voortaan God se vrede kan ontvang, en Sy ware blydskap en hoop. Sodat jy kan reageer op die werkinge van die Gees anders as in die verlede.

Wil, ek bind jou nou aan die wil van die Vader vir my lewe vas. Jy sal leer hoe om sterk te wees, maar tog ook soepel; hoe om reg te wees maar tog ook oop vir ander se menings; om dapper te wees maar tog ook met 'n sagtheid en empatie vir ander.

Ek kies nou om die Gees van God toe te laat om elke verkeerde motief of begeerte of verbintenis in my sielsarea te ontbloot en die bande daarvan om my los te maak en te heel.

Siel, jy kom nou inlyn met God se wil en beheer oor my lewe. Jy kies nou om alle lae en verdedigingsstrategieë uit die verlede neer te lê voor Sy planne vir my lewe. Ek maak alle selfbeheer, ontkenning, selfbeskerming, selfverdediging en selfgesentreerdheid nou los sodat God by elke duimbreedte van my hart en lewe kan uitkom en my heeltemal na Sy wil kan restoureer en heelmaak. Ek maak alle leuens en skuldgevoelens los sodat jy volkome kan vry kom van die verlede.

Here, ek vra dat U elke laag sal afskil en elke vestings rondom my hart sal afbreek sodat U my volkome kan heelmaak. Ek vra dat U u genade in elke holte en gaatjie in my lewe sal laat instroom om elke nood of behoefte of onverwerkte aangeleentheid te bedien. Net U kan dit heeltemal heel. Laat die waarheid van U Woord my enigste norm en waterpas wees.

In Jesus se Naam. Amen.

RESTOURASIE: WORD VRY EN HEEL

Die hart van die evangelie is dat Jesus reeds alles gedoen het wat nodig is om ons vry te maak van enige ding wat ons gedoen het of wat aan ons gedoen is. Daarom is Hy instaat om deur Sy Gees

- ons gees te restoureer en 'n nuwe verhouding met God die Vader moontlik te maak
- ons te bevry van alle skuld, skaamte, woede, bitterheid, onvergifnis
- en so ruimte te maak vir die volle vernuwing en seën wat my erfenis is in Christus.

En die wonder is dat God vir jou nou sê: Jesus wil jou nou vrymaak, werklik vrymaak. God se genade in Christus kan die krag van alle seer neutraliseer en breek in jou lewe.

Ons pyn en seer hierbinne word aan die lewe gehou deur 'n ongerestoureerde verstand, wil en emosies wat oor die jare detail-rekords gehou het van alles wat met jou gebeur het. Maar die restourasie wat God in jou wil bewerk gaan nie oor 'n opdiep van daardie rekords nie. Dit gaan ook nie oor skuld uitdeel nie. Dit gaan oor die breek van die houvas van my ou siels-natuur op my lewe as ons die Gees van God toelaat om deur God se genade die pyn van al hierdie seer te neutraliseer.

Jy hoef nie eers mooi te verstaan hoe Hy dit presies doen nie, en eintlik kan ons ook nie, want dit is die werk van die Gees van God in ons daar diep binne.

Natuurlik sal jou ou sielsnatuur dit ook probeer teëstaan, maar moet hom nie toelaat nie! Kry klaar met daardie stinkende gemors onder in die kelderverdieping van jou lewe!

Hoe? Gooi dit uit! En dit beteken nie dat jy daarvoor moet praat of dit stukkie vir stukkie hoef te analiseer eer nie. Nee, jou aandeel in hierdie proses is om die selfbeskermende mure wat jou siel gebou het oor die jare, oop te sluit met 'n gebed en dan die Heilige Gees uit te nooi om in te gaan en daar binne te gaan heelmaak waar dit nodig is. Gee jy maar net totaal aan Hom oor.

En as Hy klaar is met Sy werk, sal die feite uit die verlede nogsteeds dieselfde bly, maar die pyn van die herinneringe sal geneutraliseer wees.

In die vernuwing beskuldig ons allerlei geeste en bindinge vir die siek optredes van gelowiges. Maar dit lyk vir my ons mis baie keer die hart van ons probleme, naamlik dat God ons moet verlos van onself, van ons ou sielsnatuur en sy houvas in ons lewe. Dit is waarna Ps 51:18 en 19 verwys as hy verwys na ons siel as setel van ons "rational mind; seat of the senses, affections and emotions of various kinds". Maar ook as hy verwys na ons "hart" wat bloot 'n kombinasie-term is vir ons gees en sielsarea.

Verder is dit insiggewend om te weet dat die woord in die Hebreeus wat ons met "berou" vertaal het, dakah, ook vertaal kan word met "to collapse, break in pieces, be crushed". Dit is immers wat God in ons soek: 'n gebreekte siel waar die vestings afgebreek en losgemaak is sodat Sy Gees kan doen wat Hy daar wil doen.

Dit is dan wat Spr 25:28 na verwys as ons daar opdrag gegee word om te begin heers oor die sielsarea in ons lewe!

Ek is oortuig dat baie van die sogenaamde "geeste" waarvan ons praat in die vernuwing - soos 'n gees van rebellie, of verwerping, of ongeloof, of manipulering, of Jesibel-gees, of gees van godsdienstigheid - eintlik niks anders is as handeling en simptome van 'n siel wat net nog nie oorgegee het nie. Oorwinning oor hierdie dinge sal daar begin deurbreek waar ons ophou veg teen hierdie sogenaamde geeste, en eerder die waarheid van die Woord begin gebruik om ons siel se verdedigingstelsels oop te maak. Sodat die Gees van God met sy restourasie- en bevrydingswerk kan begin in daardie weggesteekte areas in ons lewe.

Natuurlik is dit moontlik dat bepaalde bese geeste juis as gevolg van die siel se beheer oor ons lewe, 'n sê of houvas in ons lewe gekry het. Daarom sal deel van die restourasie van die Gees dan ook 'n breek van hulle mag in ons lewe wees.

Leer jy maar net om saam met God en Sy Gees in ons lewe te werk om so hierdie restourasieproses te verhaas. Bind jy maar n a v Mat 16:19 jou wil aan God se wil en jou verstand aan Jesus se gedagtes vir jou lewe. En begin die vestings los- en oopmaak soos wat hy sy kragtoertjies openbaar en die Gees jou van oortuig. Maak maar net oop en gee dan oor sodat God self sy werk kan doen.

Daarom is Joh 3:30 so 'n wonderlike prentjie van wat hier moet gebeur. "Hy moet meer word en ek minder"! (Waar jou "ek" dan inderwaarheid "jou ou sielnatuur" in jou is).

HOE VERANDER 'N GELOWIGE SE OPTREDE?

Ek en jy moet begin verstaan waar ons onaanvaarbare optredes eintlik vandaan kom.

Omdat ons dit nie verstaan nie, probeer ons eers om verlos te word daarvan deur ons uiterlike optredes deur selfweerhouding en selfdisipline te verander. En natuurlik is dit uiteraard goed, maar ongelukkig faal hierdie selfhelp-pogings die een of ander tyd as daar sterker innerlike dryfvere ontstaan wat my pogings begin saboteer.

Ons probeer om op te hou drink, of rook, of vloek, of dobbel, of dwelms gebruik, maar eintlik is ons probleem nie hierdie uiterlike simptome nie. Ons probleem lê binne-in ons self. Dit lê in ons hart of ou sielsnatuur met al sy pyn en seer en onverwerkte probleme van die verlede.

Daarom moet Christene leer om ook in daardie area van hulle lewe die genade, waarheid en lewe in Christus te ervaar (Kol 1:27). Net Christus se lewe in ons is ons enigste hoop om permanent die vrot vrugte-siklus van ons ou natuur te breek. Daarom gaan dit dus nie net oor 'n ding in ons lewe wat ons "net onder beheer" moet kry nie.

In Christus het ons 'n lopersleutel wat op alle slotte pas. Ook op daardie slotte van die boeie en tronke wat ons vir soveel jare gevange gehou het in ons lewe. Ons moet dit net begin gebruik om ons ou natuur oop te sluit dat Hy ons ook daar kan bedien met Sy lewe en Sy verlossing.

Baie keer is ons "verkeerde optredes" bloot aangeleerde metodes van ons sielsnatuur om al die onbeantwoorde nood of behoeftes, die ongeneesde seer uit die verlede, en onopgeloste sake van gister en eergister te hanteer.

So glo ek is die meeste vorme van homoseksualiteit en lesbianisme bloot selfpogings om onbeantwoorde behoeftes en seer te bedien, en deur rasionalisasie te oorbrug.

As ons natuurlik in hierdie proses van selfverdediging aan die duiwel vatplek gee (Ef 4:27), word ons probleem dubbel so erg. Dan word ons uiteindelik gedryf deur twee kragte, naamlik van ons eie sielspogings en diŉ van bepaalde demoniese magte wat sê gekry het in ons lewe.

Hou dus op om net bloot die simptome te dokter. Begin fokus op die wortel van jou probleem, en laat Christus se verlossing en restourasie al daardie sielsvestings in jou lewe bedien.

'n Sekondere bron wat ook verkeerde optredes in jou lewe tot gevolg kan hê, is die dinge wat mense oor die jare oor jou en aan jou gesê het. Woorde van ouers, dokters, onderwysers en ander gesagsfigure het 'n geweldige krag in ons lewens. Daarom is dit so belangrik dat ek en jy al hierdie negatiewe woorde, en selfs vloeke wat oor ons lewens gespreek is, sal breek.

Hier is 'n gebed wat jou daarmee kan help:

"Here, ek maak die invloed en gevolge van alle woorde en vloeke (bekend of onbekend) wat oor my lewe gespreek is, of wat ek gespreek het oor myself, los. Ek bind myself nou aan die waarheid van U Woord wat vir my sê dat ek tot alles instaat is deur Christus wat vir my die krag gee. Hy is daar om my daarmee te

help. Ek bind myself vas aan die waarheid van die Woord dat Jesus vir my Sy vrede gegee het wat niemand by my kan wegneem nie. Ek bind my aan U Woord vas dat alle dinge tot my beswil sal verloop. Ek word nie beperk deur enigiemand anders se mening of opinie oor my nie, of deur my eie vermoëns nie, behalwe as ek self kies om daarmee saam te stem. Ek maak dan ook enige bande los waarmee ek myself gebind het deur die aanvaarding van ander se woorde of menings oor my lewe. Ek bind my vas aan die waarheid dat ek in Christus 'n nuwe mens is. Die ou dinge het verby gegaan. Alles het nuut geword en wag dat ek dit moet vasgryp en daaruit begin lewe. In Jesus se Naam. Amen.

Hierdie selfde beginsel kan ook deurgetrek word na jou liggaam en jou eie gesondheid. Hier volg dan ook 'n gebed wat jou kan help om baie spesifiek te bid vir die restourering van jou liggaam as daar enige siekte jou of ander kwel of teister.

" Here, ek het bepaalde behoeftes in my liggaam, hierdie tempel van U Gees wat U gekies het en gebou het vir my om in te bly. As ek enige valse god of gees laat heers het in my siel, vra ek vergifnis en bid ek dat U my sal reinig van die gevolge daarvan. Here, ek weet dat die najaag en misbruik van kos, geld, alkohol, dwelms, seks, en mag, is almal die gevolg van "ander gode" se mag in my lewe.

Here, ek bid dat U enige ongehoorsaamheid in die verband aan my sal openbaar, al ontken ek dit eers. Ek begeer ook om U oorvloed in my gesondheid te beleef sodat ek U Koninkrykswerk onbelemmerd kan doen. Ek bind my gedagtes, wil en emosies aan U waarheid vas. En ek maak enige weerstand wat my ou sielsnatuur kan bied, los. Heilige Gees, wees U self my Leidsman en waarsku my as ek op 'n dwaalweg my bevind.

Ek maak ook enige laag van beskerming los wat ek in my siel gebruik het om enige natuurlike swakheid, leuen, of halwe waarheid te verberg. Laat U genade my vul, soos wat ek al hierdie doodsklere van my siel en liggaam uittrek voor U. Ek soek nie slegs verlossing van die uiterlike simptome nie, Here, ek wil hê U moet die wortel daarvan bedien. Wys vir my wat aan die wortel lê, sy dit 'n onoorgegewe sielshouvas, of demoniese aanval of 'n aanval van 'n aansteeklike virusse of ander organisme. Vader, ek maak hiermee elkeen van die vyand se pogings om my aan te val ongedaan.

As hierdie siekte die gevolg is van enige vesting in my lewe, of oorerwing uit my vorige geslagte of verkeerde gewoontes, maak ek dit nou los, en bid vir U verlossing en heling daarvan.

As hierdie siekte die gevolg is van 'n aansteeklik organisme, vra ek U om vir my te wys hoekom my immunestelsel ingebreke gebly het om my daarteen te beskerm. Wys vir my as ek verkeerd eet. Wys vir my as ek op verkeerde medikasie of menspogings staatmaak wat nie U wil nou vir my is nie. Wys vir my die bron. Ek breek nou die krag daarvan in my liggaam. En verbreek ook die verder groei en aanteel daarvan in my liggaam. In die Naam van Jesus. Amen.

Staan dan op en gaan aan met jou lewe in geloof, hoop en liefde. Sonder vrees.

Onthou: jou liggaam is bloot 'n volgeling van jou siel en gees. Hy kan letterlik sy eie chemie so aanpas dat dit pas by dit wat in jou siel en gees geglo word vir waarheid. Begin gee dit geloofsrigting!

SOGENAAMDE GENERASIE-BINDINGE

Meeste van hierdie bindinge is bloot die gevolg van sielsverbintenisse en -instemming met gesindhede en maniere van doen wat van generasie tot generasie oorgedra word. Sy dit woede, onvergewensgesindhede, rassehaat, ens.

Maak dit los deur jou vas te maak aan die Woord en jou vryheid in Christus.

Natuurlik kan bose geeste ook hierin 'n rol speel in die mate wat mense in die proses ongehoorsaam was aan die Woord en so vir die bose vatplek gegee het.

Maak die deur oop sodat die Gees van God die verlossing van Jesus kan bedien ook in daardie areas van jou lewe deur belydenis te doen van daardie sonde en instemming met gesindhede en manier uit die verlede. Bind jou vas aan wat die Woord sê en maak dan jou sielsarea oop sodat God se genade dit kan oorspoel.

ONBEANTWOORDE BEHOEFTE, ONGENEESDE SEER EN ONOPGELOSTE SAKE

Onbeantwoorde behoeftes het in jou lewe ontstaan toe iets goed wat moes gebeur, nie gebeur het nie. Ongeneesde seer het ontstaan toe iets slegs met jou gebeur het. En onopgeloste sake was die gevolg toe jy in onvermoë gebly het om dit wat gebeur het emosioneel, geestelik, logies en fisies positief te verwerk.

Almal van ons het sulke dinge in ons lewens oor die jare bymekaar gemaak. Ons siel het dit in detail geliaser met al die bykomstige pyn, emosies en ervaring, en dit diep gebêre, om so die pyn uit te doof, dit van die tafel af te kry sodat jy kon aangaan met jou lewe tenspyte daarvan.

So het ek en jy in die proses geleer om ons hulpeloosheid te ontken en ons vrese te verberg wat die hulpeloosheid en die seer in ons lewens veroorsaak het.

Ons hanteer so die druk van buite na die beste van ons vermoëns, maar tog belewe ons soms 'n gevoel van woede dat ons gebruik word of ingeloopt word in die situasies. En daarvoor voel ons boonop skuldig, en bou daarom nog vestings om dit alles te verberg.

Die perfekte senario sou wees as 'n mens net liefde en ondersteuning as totale mense van diegene rondom jou kon beleef, en sonder hierdie behoeftes en seer en onopgeloste sake kon groot word. Maar dit gebeur nie op hierdie aarde nie. Almal van ons beleef maar een of ander tyd seer. Maar tog moet ons vir mekaar vertel dat net 'n ontmoeting met die ware God, en totale oorgawe aan Hom, ons hierdie soort volmaakte liefde en versorging en ondersteuning kan bied.

Die krisis egter is dat ons onorgegewe siel die invloed van hierdie liefde in ons lewe verhoed met al die mure en vestings wat hy oor die jare om ons hart gebou het.

Jou siel se eerste lyn verdediging is mos hierdie logiese vestings van rasionalisering, regverdiging, ontkenning en verdediging wat hy gebruik om al die verkeerde keuses, aannames, optredes, motiewe en maniere van dink uit die verlede te beskerm. Maar in werklikheid hou hy jou hiermee gevange.

Daarom is jou verstand inderwaarheid 'n oorlogsveld waar jou siel en die bose hard veg om die totale beheer oor jou en jou toekoms. Dit is waarom restourasie so dringend nodig is hier (Rom 12:2).

Feite oor die verlede se seer en trauma kan nie verander word nie. Maar God wil ons van al die bagasie wat ons siel by die feite van die verlede bygesit het, verlos. Dit is daardie bagasie wat ons geestelik laat "lek". Wat maak dat ons vreugde, hoop en vrede langs die pad "verloor". En niks wat ons gebruik in watter hoeveelheid ookal, kan daardie gebrek aanvul nie. Nie geld, kos, alkohol, seks, of verhoudinge met mense nie. Net God kan dit doen. En ons moet Hom toelaat om met al ons seer en nood en verwarring te handel, om so jou siel se mag oor jou lewe te breek.

Maar dan moet ons verstaan hoe Hy dit wil doen. Hy gaan nie in die proses jou eie verdedigingsisteme ignoreer nie. Hy gaan jou vra om dit self oop te sluit en af te breek. Dan sal Hy inkom as jy vra, en kom heelmaak wat nodig is.

As gevolg van jou sondige natuur het die mens van nature 'n natuurlike attraksie vir donker en sonde. Kol 1 :13 sê dat Christus jou hiervan juis kom red het.

Daarom is die enigste manier wat Satan na die bekering van 'n mens beheer oor ons lewe kan kry, deur die toegang wat die mens se onoorgegewe sielsnatuur nog vir hom bied. Ons moet dus kies om of oop te maak of toe te maak vir sy aanvalle. Ons moet ook kies om die infrastruktuur van ons sielsarea uitmekaar te haal en so ons "vlees te kruisig", ons "ou natuur af te lê" en die grafklere uit te trek, sodat God deur die werking van Sy Gees kan inkom en al die pyn en trauma van die verlede kan neutraliseer. Anders bly dit jou vrede en vreugde te steel.

Kom ons gesels 'n bietjie meer in detail hieroor:

Die onbeantwoorde behoeftes in jou lewe is soos 'n honger, wilde dier hier in jou. Ons probeer op allerlei wyses dit doodkry of diep opsluit, maar op een of ander manier laat geld hy hom maar weer. Net God kan hom finaal stilkry. Maar tog probeer ons eers self alles wat ons kan voor ons uiteindelik vir Hom vra.

En dit veroorsaak dat hierdie behoeftes allerlei verkeerde drange of begeertes in ons navore laat kom wat ons as swakhede beskou. En ons boonop in allerlei verkeerde verhoudinge en warm-water-situasie laat beland. Dink bv aan die vrou wat te veel koop.

Natuurlik kan hierdie dinge uiteindelik jou huwelik vernietig.

Daarom is dit so belangrik dat ons gedurig sal bid vir ons verhoudinge met mense en dit wat ons daarin dryf.

Hier volg so 'n gebed:

Jesus, ek is so moeg om weg te hardloop van al my vrese dat U nie instaat is om alles vir my te wees as al die ander weg is nie. U Woord sê dat U begeer om alles vir my te wees in my lewe. U Woord sê dat ek nooit kan dink wat U alles vir my wil gee en vir my beplan het nie. U Woord sê dat U en die Vader in my kom woon het deur U Gees. Here, wat keer dat ek die werklikheid hiervan regtig begryp in my lewe? Waarom vrees ek so om alleen te wees? Waarom twyfel ek so aan U liefde en versorging in my lewe?

Ek maak nou alle bande los wat my siel geskep het wat sê dat U nie genoeg is vir my nie.

Jesus, U het gesê dat U die Wynstok is en ek die loot. Ek bind myself nou aan die waarheid daarvan in my lewe. Ek verbreek die houvas van enige halwe waarhede, leuens, ontkenning en selfgesentreerde menigs wat ek hierrondom geglo het. Ek wil plek maak vir U deur al hierdie bagasie uit te pak sodat U self aan my die geheime hieroor kan leer en my kan inlei in 'n nuwe, intieme verhouding met U en U alleen.

Here, en soek nie meer verhoudinge met mense net om die leegheid hier diep binne in my te probeer vul nie. Dit kan net U vul. Ek gaan ook nie meer probeer om so die behoeftes hier diepbinne te probeer bevredig nie. Ek gaan ook nie meer verhoudinge gebruik om die seer uit die verlede te probeer stil nie.

Jesus, net U en U alleen kan vir my help om myself te sien soos wat die Vader my sien. Net U kan al die verwarring en seerkry dinge uit my verlede herstel.

Wys vir my as ek in verkeerde of ongebalanseerde verhoudinge tans is met mense. Wys vir my as ek mense net gebruik. Leer my om in die regte verhoudinge met mense in te groei en werklik vriende met die

regte mense te wees wat U vir my bedoel het. Wys vir my wie U spesifiek in my lewe wil gebruik as gebedsgenote, vriende, bedieningsgenote, en selfs 'n huweliksmaat - as ek nog nie een het nie. Laat my 'n erdekruik vol van waarheid, genade en liefde vir hulle wees. Leer vir my om hulle lief te hê met U liefde. In Jesus se Naam. Amen.

Voedsel is een van die mees algemene middels waarmee Christene onbeantwoorde behoeftes in hulle lewens probeers stilmaak. En daarom is die antwoord vir goeie gesondheid, energie en 'n aktiewe lewensstyl nie in die eerste plek 'n dieët nie. Dit is eerder om te leer om God toe te laat om daardie onbeantwoorde behoeftes te bedien. Bid daarom dat God self daardie diepste behoeftes sal bedien, en kry dan jou dieët en lewensstyl in lyn met wat Sy Gees jou gaan leer in die proses.

Soms gebruik ons allerlei geestelike kragtoertjies om te probeer huishou met ons gebreke, soos aanhaal van versies, gebede vir krag, liedere wat ons sing, ens. Maak eerder hierdie tye oop vir God se Gees om jou te bedien soos jy nou al tot hier geleer het.

Kom ons dink vervolgens oor die onbediende seer wat daar in jou lewe is. Dit is natuurlik hierdie dinge wat gedurig maak dat ons gevoelens van twyfel, pyn, vrees, wantroue en suspisie beleef. Dit maak verder dat ons allerlei verborge agenda in ons verhoudinge met mense het waarmee ons ons dan wil beskerm teen verdere moontlike pyn.

Daarom moet ons vir mekaar sê dat ware intimiteit altyd 'n keuse is, of dit nou in ons verhouding met God is, of met ander mense. En hierdie intimiteit gaan altyd belemmer word deur onbediende seer in ons lewe. Kies dus om God toe te laat om dit te bedien.

Hulle eie seer uit die verlede slaan altyd deur in die bediening van leiers. (Satan manuever altyd mense so dat hulle op jou seer kom trap). Kry dit dus sou gou moontlik uit die pad en afgehandel!

Wat die onopgeloste sake in jou lewe betref:

Dit is nou daardie gebeure of situasies wat jy nie in die verlede positief kon verwerk en hanteer nie. Wat allerlei negatiewe optredes en patrone in jou lewe veroorsaak soos ongeduld, 'n kritiese gesindheid, of 'n gevoel van onsekerheid, wettisme, rigiditeit en perfeksionisme. Inderwaarheid probeer jy so "reëls" neer lê in jou lewe wat grense daar kan stel waarbinne jy veilig voel.

En tog gebruik die bese juis hierdie grense van jou om jou ontbloot te laat voel wat weer gevoelens soos woede, vrees en verwarring by jou opwek.

Daarom moet ons eerder God toelaat om ons te genees van hierdie "verbode areas" in ons lewe wat ons self geskep het, anders gaan dit gedurig ons bruikbaarheid in God se diens blokeer.

Neem bv die skynbare "onvermoeë" van sekere mense om keuses te maak. Eintlik is die weiering om keuses te maak vir hulle die "veiligste keuse", want hulle is bang om foute te maak.

So beskerm onself deur lae op lae stukke selfbeheersing, selfgenoegsaamheid, onafhanklikheid, selfverdediging, selfgesentreerdheid en selfregverdiging.

En alles net omdat hier in ons nogseeds 'n sielsnatuur is wat op die wyse sy beheer laat geld. Pleks dat ons Christus toelaat om die onopgeloste sake te kom bedien met Sy oplossings en genade. Maar nou hou ons eerder aan om mense en situasies te blameer.

Kom ons konfronteer die siel in sy pogings om die seer weg te steek vir God, en maak ruimte vir die Gees om in ons te werk.

'n Gebed soos die volgende kan jou help om vry te word:

Jesus, U het gesê dat ons vergewe word as ons ander mense ook vergewe. Ek weet dit is moontlik om ander te vergewe al dink my siel nie so nie. Ek maak daarom elke verkeerde idee of manier van dink nou los oor wat reg of regverdig is vir my. Ek maak elke verkeerde gesindheid of houding los wat ek teenoor diegene gekoester het wat my verneder, of skaam of bespot laat voel het. Ek maak elke begeerte los wat wraak begeer.

Ek bind my wil aan U wil en planne vir my lewe. Ek weet dat U wil dat ek elke mense sal vrymaak van enige verantwoordelikheid teenoor my, ongeag wat hulle gedoen het. Ek kies nou om hulle te vergewe, en om die res aan U oor te laat. Ek bid nou dat U hulle verder sal seën, hulle seer sal genees, en al die onopgeloste sake in hulle lewens sal oplos. Dankie dat U my vergewe het. In Jesus se Naam. Amen.

VERHOUDINGE

Die Heilige Gees gebruik mense in ons lewens om ons soos sandpaier skoon te skuur, maar ook om ons heel te maak en baie plesier en koinonia mee te hê.

Maar pasop vir mense met dieselfde seer as jy! Dit het altyd die potensiaal van moontlike sielbande wat daar tussen julle kan ontstaan. Pas dus ook op vir leiers met dieselfde seer as jy! Pleks dat hulle self gehelp kom, gee hulle soms op en help eerder ander om gehelp te word! En bedien in die proses 'n mengsel siel- en gees hulp aan diesulkes in daardie onbediende areas van hulle lewens.

Fokus altyd primer op Jesus as die Bron in jou lewe. Natuurlik gebruik Hy ook mense in ons lewens. Maar dan om iets van Sy liefde aan jou te bedien, en om weer van jou iets van Sy liefde terug te ontvang. En Sy liefde is altyd agape-liefde sonder enige geheime agenda.

Ons het mense nodig om lief te hê en liefgehê te word. Vir koinonia, saam glo, vir balans, en vir kreatiwiteit. En vir gesonde bind met mense vir agenda-vrye liefde. Om instrumente van God se genesing in die wêreld vir mekaar te wees. Al is ons ook maar gebarste kruike.

Ons kan nie ander mense heelmaak uit onself nie, en hulle kan nie ons heelmaak nie. Net God kan dit doen, en kan ons daarvoor deels gebruik in mekaar se lewens.

Ons moet daarom leer om al die stukkende mense en gebeure in ons verlede los te maak sodat God die seer daaruit kan neutraliseer.

Maar in die proses moet ons leer dat dit nie meer saak hoef te maak wat mense aan ons gedoen het nie. In die lig van wat God vir ons gedoen het. En moet ons leer ons hoef nie meer net termometers te wees wat die geestelike en morele temperatuur in situasie meet nie. Ons kan ook die termostate wees wat die liefdestemperatuur daar kan bepaal.

Ons kan opstaan en sê: Ons is die geslag wat die siklus van imperfekte mense breek wat net mekaar se lewens verwoes. God kan al die onvolmaakte voetspore van ander in ons lewens uitwis, en ons bevry van die negatiewe invloede van ander. Sodat ek vry kan word om ander met lewe, seën en genade te bedien.

Vergifnis is die katalisator wat hierdie genesingsproses in jou lewe versnel. Spreek daarom hierdie onvolmaaktes uit jou verlede vry!

Maar dan moet die Here jou ook help om jouself vry te spreek van al jou onvolmaakthede. Tans keer al die mure en vestings om jou hart hierdie vry-word-proses. Gebruik God se lopersleutel van toe- en oopmaak om bevry te word daarvan.

2 Kon 4:2-7 vertel ons dat ons altyd plek moet maak vir wonders om in ons lewens plaas te vind. En dat jy self die grense vasstel hoe groot daardie wonder moet wees!

Ons dink baie keer dat as iets nie gebeur het nie, is dit omdat dit nie God se tyd daarvoor was nie. Maar baie keer is dit eerder ons wat God se krag en wonders en genade geblokeer het in ons lewens. Of ons wat

net met een emmer tevrede was terwyl God se hart was om vir ons gellings en gellings genade en liefde te bedien.

God rek baie keer ons geloof. En dit doen Hy as ons die Woord lees, daaroor mediteer en ons eie maak. En dan opstaan en gaan doen wat daarin staan. Dit haal ons uit ons "veilige ruimtes" uit. Daarom gebruik God baie keer krisisse en spanningsvolle tye in ons lewens hiervoor.

Daar leer ons die regverdige sal uit die geloof lewe. Daar leer ons om ons drie troepe (siel, gees en liggaam) in gelid agter Jesus as die Generaal aan te laat masjeer.

SIELSKRAG EN SIELSBANDE

Voor die sondeval van die mens was die mens na liggaam, siel en gees in die perfekte harmonie met God. Alhoewel ons ons bittermin kan voorstel wat dit in werklikheid sou impliseer, kan 'n mens net na Jesus as mens kyk om iets van die omvang van die sielskrag van die mens voor die sondeval te kan begryp.

Kan jy jou indink wat die potensiële intellektuele vermoëns van die mens, die verbeeldingskrag en die kreatiewe vermoëns van die mens toe moes wees?!

Maar met die sondeval word hierdie Godgegewe sielskrag van die mens latent en verloor die mens die vermoë om dit na behore te kan kanaliseer en konstruktief te bestuur. Studies toon hoe mense vanuit die verskillende filosofieë en godsdienste daarna streef om "in te tap" by dit wat latent in die mens se sielsnatuur opgesluit lê, met minder of meerdere sukses. Maar daar is ook gevalle waar mense paranormale kragte ontwikkel en selfs met die hulp van demoniese magte oor buitengewone krag beskik.

Ek glo dat deel van die restourasieproses waarmee God in ons lewens as Christen besig is, is juis die herstel van die ingeskape vermoëns van God se mens om ook so kanale te word van God se krag in en deur ons. Dit is immers waaroor Daniël daar in 11:32-33 en 12:3-4 en 10 profeteer.

Baie groepe in die wêreld soek vandag na metodes om hierdie sielskrag van die mens na behore te ontsluit en te benut vir hulle oogmerke. Dink maar net aan die sielskrag as miljoene Moslems saam in Mekka hulle god aanbid en saamstem in gebed! Dan verstaan 'n mens ook iets van invloed en inpak van negatiewe sielskrag op mense en gebeure.

Baie Christene manipuleer, of word gemanipuleer, deur die sielskrag en sielsbande met ander Christene. Hierdie negatiewe sielskrag en sielsbande is die gevolg waar ons as Christene saamstem oor dinge wat geproduseer en gemotiveer word in 'n onoorgegewe sielsnatuur, en wat dus nie Skriftuurlik en in lyn met God se Woord is nie.

Daarom moet ons waak om nie met gebede saam te stem wat gebaseer is op persoonlike opinies, wettiese oordeel of emosionele gevoelens nie. Hou op bid volgens 'n sielsagenda.

Sielsbande is die resultaat van so 'n vermeerde ooreenkoms tussen twee mense waar albei die een of ander voordeel uit hulle verbintenis trek wat nie in lyn is met God se plan en wil vir hulle lewens nie.

Satan is 'n bobaas-skepper van sulke situasies waarin ons ingelok word in sulke verbintensisse met mense. Kies daarom versigtig om die pad te loop van 'n lewe in geloof en in gehoorsaamheid aan God in elke detail van jou lewe. Vertrou God om wonders te doen en in al jou behoeftes te voorsien. Anders sal jy maar net weer in berou die pad om die berg Sinai deur die woestyn moet loop as jy nie in geloof gehandel het nie.

Bid die Here en vra Hom om jou vas te maak aan Sy planne en Sy hart vir nou in jou lewe. En breek met enige sielsbande deur jou te bind aan Christus, en Sy Gees toe te laat om jou te herstel.

Wees op die uitkyk vir lang periodes van rou, want dit is 'n duidelike teken van ongesonde sielsbande wat bestaan het. Rou soos die Jode van ouds vir 'n paar dae met alle intensie, en staan dan in God se genade en versorging in geloof op, en lewe in geloof verder (2 Sam 12:14-23 en 16:1).

Hou ook op om te rou oor onvervulde drome, en kies om die beste te maak in geloof van die res van jou lewe.

Sielsbande is natuurlik ook 'n groot gevaar in ons huwelike, as ons primer na mekaar kyk vir die vervulling van ons behoeftes in plaas van na God.

'n Gebed vir verlossing in hierdie area is die volgende:

Here, ek het na ander mense gekyk om hierdie nood en seer van my hierbinne te bedien. Ek het nie die regte keuses gemaak en my verhouding met hierdie mens in die regte perspektief geplaas nie. Ek wil vry wees van enige emosionele, intellektuele, of wilsbande wat ek laat ontstaan het. Vergewe vir my dat ek my bevrediging in iemand anders as net U gesoek het.

Ek sny nou alle sielsbande in my lewe los wat bewustelik of onbewustelik ontsaan het. En kies daarteen. En bind my net weer aan die waarheid van U liefde, versorging, getrouheid en genade in my lewe. U genade is vir my genoeg om al my nood, seer en onverwerkte sakte te bedien. Ek kies om eerder daarmee na U te kom as ek in die toekoms hulpeloos en kwesbaar voel. Kry asseblief my gedagtes in lyn met U planne vir my lewe. Maak my in die toekoms werklik sensitief as my ou sielsnatuur maar weer self wil ingryp om my behoeftes of seer te bedien. Ek kies nou om elke vesting wat hy bou, oop te sluit en om te trek in Jesus se Naam, en om U toe te laat om daardie nood self deur U Gees te bedien. In Jesus se Naam. Amen.

BEGIN DOEN WAT JY MOET DOEN

Joh 14:12 sê ons is bedoel as Christene om dieselfde dinge as Jesus te kan doen, en selfs ook nog groter dinge as Hy te doen. En ek glo dat die lopersleutels van Mat 16:19 bedoel is om ons te help om alles af te lê wat die onoorgegewe sielsnatuur mag gebruik om ons te verhoed om dit te doen.

Ons is soos voorafgelaaiete patrone in God se geweer om die teikens te bedien wat Hy in die oog het. (Ons moet ophou probeer om self uit die loop te spring op die teikens!)

Ef 4:22-24 teken vir ons God se sakelys in hierdie restourasieproses waarmee Hy in ons besig is. Eers is daar 'n "aflê" voordat ons die nuwe natuur-persona kan aantrek wat God in Sy hart vir ons het.

Maar onthou, hierdie nuwe natuur is nie 'n wilsding of 'n nuwe rol wat jy moet aanleer nie. Nee, dit is 'n manier van wees wat die Gees van God self in ons gaan bewerk as ons vir Hom ruimte maak om dit te doen. En mense gaan dit nie eers werklik sien en beleef voor die oue nie uit die pad is nie!

Die kortste pad van frustrasie na vryheid loop deur ons ou sielsnatuur. So ook van woede of angs na ware vrede.

Daarom moet ons die Gees van God bid om ons te wys wat nogsteeds in ons lewens God se genade en vrede steeds blokeer. Ons kan nie ons skild van geloof reg hanteer as ons nog boonop laag op laag selfbeskerming oor ons ou wonde ook moet hanteer nie.

Hou dus op om te maak asof daar nie fout is nie. En hou op om sielsgebede te bid.

- Laat jou gees die Woord begin bely en hom daarvoor verbly oor wat God sê deel is van diegene se lewens wat Hy liefhet. Bely daardie woorde, en sing daarmee psalms en lofliedere voor Hom.
- Laat jou siel konsentreer en herhaal hoe getrou God is. Moenie toelaat dat jou siel op die detail van jou omstandighede se "onmoontlikhede" broei nie. Kies om die dadelik in geloof aan God te gee wat spesialiseer in die "onmoontlike".
- Laat jou liggaam in lyn kom met hierdie belydenis en geloof in God se goedheid. Sit 'n glimlag op jou gesig, loop met 'n nuwe huppel in jou stap, en hou op om so depressief aan te trek. Kies om jou hande, voete en monde te gebruik om ander om jou te begin help.
- Laat God jou oortuig hoe Hy in jou situasie wil God wees. En moenie altyd dink jy weet presies hoe Hy dit gaan doen nie. Dalk verras Hy jou! Maak jy maar net jouself vas aan Sy planne vir nou vir jou lewe. En wees Sy getuie en bedien sy nou-evangelie aan diegene om jou.
- En begin bid vir die mense om jou. Die volgende gebed kan jou help om reg vir hulle te begin bid:

Here, ek weet dat ek my familie moet liefhê met die liefde wat van U af kom. Daarom bind ek myself aan U planne vir my lewe, U liefde, U genade en U waarheid.

Ek trek elke stukkie ou grafklere van my ou sielsnatuur nou hier voor U uit: al daardie geïrriteerdheid, frustrasie, ongeduld, woede, hatigheid, onvergewensgesindheid, ens. Ek kies nou om al my familielede totaal vry te spreek en te vergewe vir dinge in die verlede. Maak van my 'n instrument van liefde en empatie teenoor elkeen van hulle, veral hulle wat werklik soekend is na U. Help my om te verander sodat ek 'n voorbeeld kan wees vir hulle van wat U in 'n mens kan doen.

Ek bid vir my ouers en skoonouers en bind hulle vas aan U planne vir hulle. Ek bid dat U hulle wat in U glo, se geloof sal laat toeneem en versterk. Ek bind al diegene wat geen verhouding het met U nie, vas aan U liefde en U planne vir hulle lewens. Stuur asb Christene, gebeur, en genade in hulle lewens in om hulle te begelei na U toe.

Ek bid vir my kinders en bind hulle vas aan U wil vir hulle lewens. Omring hulle met U genade, en selfs met 'n muur van dorings as hulle hulle eie pad wil loop. Ek maak die vestings en lae beskerming los rondom hulle seer en onbeantwoorde behoeftes en vrae in hulle lewens, en bid dat U hulle sal bedien met U genade daar in hulle ou sielsnatuur, en hulle daar sal heelmaak.

Ek bid vir hulle totale verlossing volgens U Woord. U wil dat niemand verlore gaan nie, en daarom weet ek dat U hulle gaan verlos omdat ek dit bid in die Naam van Christus. Amen.

KOM ONS MAAK ALLES VAS

Baie keer is ons vyand nie die bese buite nie, maar die bese sielsnatuur hier binne-in ons. Begin handel met hom volgens God se Woord.

Oorwinning in situasies kom as ons nie meer reageer op situasies rondom ons nie, maar eerder as ons dadelik doen wat God vir ons sê.

Begin mense bedien soos wat die Gees van God jou sê om te doen, en nie soos jy dink of voel of sien om te doen nie! Kyk bo-oor die "wenke" wat jou siel aan jou gee! Moenie staatmaak op jou eie insigte nie.

Ons moet leer om mense te bedien met sakke oor ons kop, vatlappies aan ons hande, proppe in ons ore, en terwyl ons watertrap in 'n bodemlose poel. Net soos wat die Gees van God in ons ons lei.

Ons moet in plaas van die oormatige klem op geestelike oorlogvoering teen die bese geeste, klem begin lê op bediening van die ou sielsnatuur (1 Tim 2:1-3,7-9 in die Message-vertaling).

Satan is 'n reedsverslane vyand, maar ons sielsnatuur en rebelse gesindhede is nog nie onder die bloed op sy knieë voor Christus as Here nie (Gal 5:19 e v; Ef 4:22 ev).

Gebruik die sleutels van die koninkryk dus hiervoor en moenie dat die bese jou 'n rat voor die oë draai deur jou oorwinning in allerlei pseudo-oorlogies gee nie.

God se plan is om ons vry te maak. Ook vry van alle vorme van vrees byvoorbeeld.

Ons probeer baie keer om met 'n veiligheidsnet soveel sekuriteit of veiligheid noudom ons te skep wat alles buite hou wat ons bang maak. Pleks dat ons gebede bid wat gevul is met die waarheid van die Woord van God, en wat vry is van die invloede van 'n sielsnatuur.

So 'n gebed vir vrees is byvoorbeeld die volgende:

Here, U sê dat U nie aan ons 'n gees van vrees gegee het nie, maar van krag en liefde en selfbeheersing. Ek kies daarom in die Naam en die krag van U, Here Jesus, om voortaan nie meer enigiets anders as dit te aanvaar wat in U hart vir my is nie. Ek bind my siel, gees en liggaam vas aan U wil vir my lewe, en ek verklaar dat ek glo dat U die krag en die liefde het om my te beskerm.

Ek maak vrees nou los, en alle denkpatrone wat ek deur die jare aangeleer het. En ek sluit alle vestings oop wat vrees in my siel gevestig het om my te teister. Heilige Gees, wys vir my enige vatplek of opening wat ek geskep het vir vrees en die bese, om vrees in my so 'n sterk monster te maak. Ek bely dat ek die vrees in my so gevoed het.

Ek maak nou alle lae van beskerming om my hart los wat al daardie onopgeloste sake in my lewe wegsteek wat soveel pyn en paniek in my veroorsaak. Ek vra U om daardie dinge te neutraliseer met U genade en liefde.

Ek hoef nie al daardie dinge te verstaan nie. Openbaar U maar net aan my wat ek nou moet weet.

Herstel die vertrouwe en geloof in my lewe. Net U kan dit doen.

Ek bind myself vas aan U onveranderlike Woord dat ek nie hoef te vrees nie, want U is altyd by my. U Woord sê dat my oorloë nie myne is nie, maar dat dit U oorloë is. Veg dit asb vir my. U is my skild, my vesting, en my beskermer.

Ek kies vandag weer om te glo dat U vir my sal sorg in elke detail van my lewe.

Gees van God, leer my om te dink, te handel, op te treë en te praat vol geloof dat die Vader se liefde en beskerming vir my voldoende sal wees. Gee aan my U vrede en vreugde wat alle verstand te bowe gaan. Leer U my om kalm te wees in enige storm. In Jesus se Naam. Amen.

IS JY GEREED VIR DIE TOEKOMS WAT GOD VIR JOU INGEDAGTE HET?

Soek Sy plan vir jou lewe, en wees geduldig totdat Hy vir jou duidelike antwoorde gegee het. Bind jou dan vas aan daardie planne en begin ontspanne daarvolgens die tree gee wat jy moet gee.

God het immers 'n plan vir jou lewe. Hy wil jou gebruik. En Hy het nou al vir jou genoeg gewys hoe jy met Hom kan saamwerk sodat jy nog meer bruikbaar kan wees.

Begin bid vir ander gelowiges, en vir ander mense, en vir leiers en bind hulle vas aan God se planne vir hulle lewens (1 Tim 4 en 2 Kron 7:14)

Jy kan nie die duisternis verdryf deur dit te vloek of te kritiseer nie. Maar jy kan dit wel doen deur die lig aan te skakel en self lig te wees.

Spandeer tyd voor die aangesig van God sodat daar genesing kan kom en ruimte vir wat Sy hart vir nou is, deur te bid ...bid ...bid!

Niks gaan hierdie wêreld van ons meer effektief verander as wanneer hulle in ons lewens kan sien en ervaar dat God 'n mens werklik kan verander nie.

Bid daarom vir jou eie bediening:

Here, ek is so dankbaar dat U my gered het, en besig is om my te genees en te leer om in die Gees te wandel. Gebruik my vir dit waarvoor U my so uniek geskape het. Ek bind my liggaam, siel en gees aan U wil en planne vir my lewe vas. Ek bind my verstand aan die gedagtes van Christus vir my vas. En my wil aan Sy wil, en my emosies aan die beheer van die Heilige Gees vas.

Ek bind my voete vas aan die pad wat U vir my beplan het, oor die berge en deur die valleie heen wat U weet ek moet loop. Ek maak alle vooropgestelde idees en planne los wat ek gehad het oor my bediening in U Naam. Ek gee totaal aan U al my drome oor en stel my oop vir U visie vir my lewe.

Here, ek het een begeerte en dit is dat U deur my bediening dit sal bereik wat U besluit het. Ek wil maar net 'n leë, bruikbare erdekruik wees waarin die heerlike skat van U heerlijkheid aan mense bedien kan word.

Bewaar my daarvan dat daar 'n mengsel van Gees-salwing en ou sielsnatuur-gif uit my bediening na ander sal vloei. Reinig my sodat ek net kanaal kan wees waardeur die salwing en krag van U Gees ander kan bedien met lewe.

Laat die vrug van U Gees my lewe vul met liefde, vreugde, vrede, geduld, vriendelikheid, goedheid, getrouheid, nderigheid en selfbeheersing. Help U my om my ou sielsnatuur elke dag te kruisig met al sy begeertes en gedagtes. Vernuwe U my gedagtes en neem U die totale beheer oor my lewe oor.

Gebruik my om U liefde aan mense te bedien met wie my pad elke dag kruis. Ek maak ook elke begeerte van my siel nou los om enige leërs te hou oor enigiemand wat my in die proses mag seermaak of te na mag kom. Ek kies om hulle volkome te vergewe en vry te spreek.

Gee my werklik U hart en empatie vir mense en hulle ware nood. Dankie dat U Gees my sal leer om hulle werklik onvoorwaarlik lief te hê en te vertrou.

Vader, gebruik U vuur om al die onsuiverhede in my lewe te verwyder. Ek wil suiwer wees soos goud en volkome deursigtig sonder enige geheime agenda. Ek bind my aan U tydsberekening in my lewe en die goddelike afspraak wat U vir my reeds gereël het met mense. In Jesus Naam. Amen.

GOD SE PLAN VIR GEMEENTE-WEES

Ons kan soms dinge so kompliseer, of so gewoon wees aan die tradisionele manier van doen, dat ons nie altyd self tyd maak om mooi te luister wat God wil hê moet tussen ons as gelowiges wat tussen ons moet gebeur nie.

Dwarsdeur die wêreld is God tans besig om hieroor te praat. Is Hy besig om gelowiges te dring om weer eens te maak met Sy plan vir gemeente-wees.

Kyk 'n mens na 'n bekende gedeelte soos Ef 4 of 1 Kor 12, sien jy duidelik God se hart:

- Dat nuwe bekeerlinge moet ontwikkel in geestelik volwasse volgelingen van Jesus
- wat besef dat God 'n spesifieke plan en bediening vir elkeen van hulle het
- en wat deur hulle geloofsfamilies vrygestel word mekaar en die wêreld om hulle daarmee te bedien

Kom ons begin by die begin.

Blaai jy deur die Skrif sien jy dat dit God se plan van die begin af was om Sy heerskappy of Koninkryk op aarde te vestig.

Die metode waarop Hy besluit het was om 'n man en 'n vrou te skep en in 'n intieme liefdesverhouding in die huwelik bymekaar te bring. Sodat uit hierdie "joint venture" familie, wat soos hulle is, voortgebring kan word. En dat hulle dan, saam, die aarde sal bewerk en daarvoor sal heers in hulle Hemelse Vader se Naam.

Maar nou weet ons ook hoe die eerste Adam 'n groot gemors gemaak het hiervan. Deur sy vennootskap met God, sy vrou en sy kinders te verbreek deur sonde.

Daarom begin God 'n tweede keer. Stuur Hy 'n nuwe Adam, Sy Seun, Jesus Christus, as mens. Om vir Homself 'n bruid te kom haal. Sodat daar uit hulle intieme liefdesverhouding mense van hulle soort gebore sal word. Mense wat lyk en optree soos Jesus, volgelingen van Jesus, wat na die nasies sal gaan om hulle te leer om God se gesag te gehoorsaam.

Sodat God se Koninkryk op hierdie aarde gevestig kan word.

En dit is tans aan die gebeur. Veral in die hele huis-ekklesia-beweging wêreldwyd waar gelowiges ontdek dat hulle familie moet wees. Ef 2:19 sê dit mos baie pertinent. Dat alles wat hulle tussen hulle moet gebeur, in mense moet gebeur, net kan gebeur as hulle familie vir mekaar is.

Dit is so anders as wat ons dit vir baie jare in die tradisionele gedeeltes van die Liggaam beleef het. In plaas van ekklesias wat geloofsfamilie vir mekaar probeer wees, was gemeentes niks anders as skole vir mekaar nie.

Met geweldige implikasies.

Kom ons wees prakties. Dink wat sou gebeur as jy jou kinders sou probeer groot maak soos wat baie gemeentes dit tans probeer doen: Deur jou kinders een keer per week na 'n spesifieke gebou te neem vir 'n uur of twee, hulle te maak in reguit rye sit, en hulle dan te vertel wat hulle verantwoordelikhede vir die week is. Volgende week doen jy dit weer, en die week daarna weer.

G'n wonder die "kinders" lyk soos wat hulle lyk nie!

Ek hoef nie vir jou te vertel dat die tradisionele gemeente dit nie reg kry om volwasse volgelinge van Jesus te vorm nie. Want dit kan nie gebeur in ekklesias wat skole vir mekaar probeer wees nie. Volwasse volgelinge van Jesus, met die karakter van Jesus, word net in liefdevolle geloofsfamilies gevorm wat in 'n intieme liefdesverhouding met Jesus as hulle Bruidegom elke dag lewe.

Wat gebeur in 'n gesonde familie?

Kinders leer daar om te gehoorsaam. En nie deur hulle heelyd met nuwe inligting te voer nie. Nee, deur ouers, deur 'n pa en 'n ma, wat vir hulle iets moduleer van hoe Jesus is, hoe Hy lewe en liefhet. Iets moduleer van die karakter van Jesus. Sodat hulle dit kan begin na-aap, totdat dit deel van hulle lewens is, en hulle daarvolgens kan lewe ook as hulle alleen is.

Sodat hulle, as hulle weer kinders van hulle eie het, dié kan lei, en vir hulle ouer kan wees.

Dit is tog wat Paulus daar in 1 Tim 1:3 tot 7; 1 Tess 2:7 tot 14; en 2 Tess 3:9 sê.

Familie-wees leer ons hoe om gesonde liefdesverhoudings te hê met ander mense. En gesonde families kan weer gesonde verhoudings met ander gesonde families hê, al verskil hulle oor baie dinge.

Kom ons dink 'n bietjie verder. Binne 'n gesonde familie word mense se karakters en waardes gevorm. So word geloofs-kindere in geloofsfamilies geleer om God se waardes en heerskappy te gehoorsaam. Word hulle daar geleer om volgens Sy wil te lewe en Sy plan vir hulle lewens na te jaag.

Maar net soos in 'n gesonde gesin, moet daar 'n tyd kom waar ouers vir hulle kinders sê: God het 'n spesifieke plan vir jou lewe. Hy het jou op 'n baie spesiale manier aanmekaar gesit spesifiek daarvoor. Dit sou 'n reuse fout van ons kant wees om jou te probeer dwing om te doen wat ons dink jy moet doen. Daarom stel ons jou hiermee vry om te gaan doen wat God wil hê jy moet doen.

Gaan die wêreld in, en gaan wees die beste jy, as volgelinge van Jesus, daar buite. Gaan dupliseer iets van jou karakter en waardes as volgelinge van Jesus in ander mense. Gaan bedien ander daarbuite met die salwing en toerusting wat God deur die werking van Sy Gees aan jou gegee het.

Of dit nou is as besigheidsman of -vrou, of as kunstenaar, of as onderwyser, of boer.

Gaan heers daar in die wêreld as erfgename van die Hemelse Koning. Gaan doen besigheid as mense wat elke dag sit aan Sy tafel. Wat elke dag in 'n intieme liefdesverhouding is met Jesus, die Bruidegom.

Kan jy dink watter impak kan ons dan maak in hierdie wêreld.

Die kwaliteit van wat ons daarbuite gaan doen, gaan van een ding afhanklik wees: Van wat die kwaliteit is van ons verhouding met Jesus, ons Bruidegom.

En as dit nie op standaard is nie, gaan Jesus ook aan ons dit wat daar in Op 2:4 staan, sê: Julle het julle eerste liefde verlaat. Ek is nie meer nommer een in julle lewens nie.

Want eers as Jesus weer nommer een in ons lewens is, kan ons die regte kwaliteit vrugte dra, kan ons die regte variëteit mense kweek, die regte soort dissipels maak, wat lyk en lewe soos Jesus.

Sodat Jesus alles in almal kan wees.

EKKLESIA IS OM ...

1. "JA" TE SÊ VIR JESUS!

Daar is net een manier om deel te wees van die gemeente, en dit is om te kan getuig van 'n ontmoeting met Jesus wat jou lewe verander het (Rom 10:9 ev).

Erens in jou lewe ontmoet jy Jesus as 'n lewende Persoon, as persoonlike Verlosser en Here, en kry jy geleentheid om te kies of jy Hom in geloof gaan volg en vertrou as jou enigste God vir die res van jou lewe.

Toe die skare daar in Jerusalem vir Petrus gevra het: "Wat moet ons doen om gered te word?" het Petrus vir hulle uitgespel dat 'n ontmoeting met Jesus beteken dat ons

- Ons moet bekeer

Ons moet kies om onself te sien soos God ons sien: as totaal verlore mense. Selfs ten spyte van die feit dat ons godsdienstig groot geword en 'n goeie moreel-gesonde lewe lewe. En dan te kies om om te draai en voortaan onverskrokke die lewe wat God wil hê ek moet lewe vir die res van my lewe te leef.

- Kies om Jesus in die geloof te aanvaar as ons persoonlike Verlosser en Here.

Dit is nie genoeg om te weet dat Hy met Sy lewe in ons plek vir die sondes - wat ek gedoen het - betaal het nie. Ek moet kies om werklik te glo dat Hy dit ook vir my gedoen het. Sodat ek die voorreg kan hê om as kind van die Vader-God Sy lewe te lewe.

- As gelowige gedoop word met water

Om so hierdie omruil van lewens te illustreer: my ou lewe van doodsheid vir Jesus se opstandingslewe.

- Ook kan weet dat die belofte van Sy Gees ook vir my geld

Die belofte naamlik dat Sy Gees reeds in my kom woon het (Rom 8:9), maar ook die belofte dat Jesus as die Salwer met die Gees, ook my wil toerus met die krag en gawes van die Gees. Ook dit word myne as ek dit in geloof aanvaar soos ek Jesus as Verlosser en Here in geloof aanvaar het (Hand 2:38,39; Gal 3:2-5)

2. "JA" TE SÊ VIR MEKAAR

Om gemeente van Jesus te wees is om te kies om aan mekaar as broers en susters in Jesus te "commit" om werklik 'n familie te word wat mekaar onvoorwaardelik wil leer liefkry.

Dit kan net gebeur as ons kies om tyd by mekaar te begin spandeer om mekaar te leer ken, te bedien en te begin toerus.

G'n wonder daar is stringe en stringe tekse in die Nuwe Testament wat ons herinner aan hierdie dinge wat ons vir mekaar kan doen nie. Baie mense praat daarom somer kortliks daarvan as die "mekaar-tekse, soos ...

- ❑ Julle moet mekaar se voete was en mekaar dien soos Jesus met julle gedoen het (Joh 13:14,15)
- ❑ Julle moet mekaar liefhê soos Jesus julle liefgehad het (Joh 13:34,35)
- ❑ Betoon hartlike broederliefde teenoor mekaar (Rom12:10)
- ❑ Dra mekaar se laste (Gal 6:2)

Daarom het die Vroeg-Christelike gemeente tyd gemaak vir veral twee soorte byeenkomste in hulle besige program:

- ❑ Tyd om saam met 'n groepie ander gesinne gelowiges weekliks in mekaar se huise te vergader

Om so 'n soort toevlugsoord en herstelkliniek een meter van die hel daarbuite vir mekaar te bou waar ons mekaar kan help heelword van die seer wat ons langs die pad optel. Maar wat ook ons gimnasium kan wees om te leer om mekaar in liefde met die gawes van die Gees te bedien soos Jesus dit wil (1 Kor 12 tot 14).

- ❑ Tyd vir groter byeenkomste van gelowiges

Waar hulle verder as God se nuwe geslag bedienaars mekaar bedien het met die volle spektrum gawes soos die Hoof, Jesus, hulle gelei het (1 Kor 14:26). Maar waar daar ook plek was vir gesamentlike lof en aanbidding, en bediening deur die vyfvoudige bediening van die apostels, profete, evangeliste, herders en leraars (Ef 4:11-16). Sodat die gemeente toegerus kan word om mekaar te bedien (1 Pet 4:10).

3. DIE WÊRELD UIT TE NOOI NA DIE PARTYTJIE!

"Gaan dan heen na al die nasies en maak die mense My dissipels" het Jesus ons uitdruklik geleer (Mat 28:19; Hand 1:8 en 2 Kor 5:18-21).

Op ander plekke praat Jesus daarvan as 'n bruiloffees wat moet plaasvind, waarheen God die hele wêreld uitnooi, en ek en jy is Sy boodskappers.

Daarom is dit ons taak om huise binne te gaan rondom ons, en te gaan soek na die man of vrou wat "opsoek is na God se vrede" (Luk 10:5 ev; 14:15-24). Om daar aan mense die blye uitnodiging namens God te gaan oorhandig.

Baie gaan dit natuurlik van die hand wys, maar baie gaan dit ook aanvaar. Dan is dit ons taak om hulle verder op hulle pad as dissipels of volgelinge van Jesus te begelei. Ons sal hulle letterlik van baba-wees as gelowige, deur die jongmens-fase, na geestelike volwassenheid en vaderskap toe moet begelei (1 Joh 2:12-14). Tot dus waar hulle weer op hulle beurt mense, wat hulle na Jesus toe gelei het, verder kan begelei.

Prakties gaan hierdie proses 'n proses van vriendskap en vertrouwe-wen met hierdie mense wees. Ons sal hulle moet bevriend ...

- ❑ Eers met onself
- ❑ Dan met ons Koning en Verlosser Jesus
- ❑ Dan met ons geloofsgroep of familie in Jesus
- ❑ En dan met die groter Liggaam van Jesus

Om sinvol EKKLESSIA te wees, moet ons gedurig vir onself aan die voete van Jesus afvra:

Wat is nou eintlik dit waarmee ons ons moet besighou in hierdie wêreld?

Maar ook of ons dit doen soos wat die Bybel ons sê? Of het ons dalk erens maar weer verdwaal geraak tussen 'n groot klomp aktiwiteite of programme.

Gemeente-van-Jesus-wees beteken om deel te wees van 'n dinamiese span nuwe bedienaars wat in Jesus se Naam 'n wêreld met Sy liefde en Sy krag kan bedien.

Daarvoor hoef jy nie 'n superster te wees nie.

- ❑ Jy hoef maar net gereeld tyd te maak saam met God elke dag
- ❑ Beskikbaar te wees om ander om jou te bedien met Sy liefde en krag
- ❑ Jou tiende uit dankbaarheid te gee soos Hy jou leer (Mat 23:23)
- ❑ Bereid wees om aan 'n verlore wêreld te vertel wat jyself beleef het

Is jy bereid om hiertoe te "commit"?

JESUS LEWE IN JULLE

Die Nuwe Testamentiese geheim: 'n Christus-lewe

- Rom 7:21 - Hierdie vers beskryf ons ervaring van Christenwees baie keer.
- Die Bybel beskryf Christen-wees as 'n lewe van rus en vreugde; ononderbroke kommunikasie met God; perfekte harmonie met Sy wil; 'n lewe waar ons geen honger of dors belewe nie; 'n lewe van oorwinning; en 'n daaglikse sensitiwiteit vir wat Sy wil in situasies is.
- In plaas daarvan beleef ons die ervaring wat Rom 7:18 en 21 beskryf. Beleef ons 'n worsteling met allerlei sondes in ons lewe.

Sondes wat die Gees bedroef: jaloesie; trots; ongeloof; onwilligheid om ander te dien; 'n biddeloosheid; geen behoorlike kommunikasie met God.

Sondes van die vlees: owerspel; ongedissiplineerdheid oë (wellus); onnatuurlike verhoudinge.

Sondes van die verstand: onrein en negatiewe gedagtes; ongedissiplineerde verbeelding.

Sondes van die liggaam: ongedissiplineerde eet- en drinkgewoontes terwyl die Skrif se beginsel tog duidelik in 1 Kor 9:27 staan.

Sondes van temperament: 'n hard- en ongenaakbaarheid teenoor mense; humeurigheid; 'n kritiese gees.

Doodgewoon ongehoorsaamheid teenoor die Woord: Bv 'n onwilligheid om alles oor te gee en totaal afhanklik van God alleen te wees; 'n onvergewensgesindheid.

Is Christen-wees as 'n lewende, daaglikse liefdesverhouding met die Vader en Jesus Christus deur die inwoning en bemiddeling van die Heilige Gees, beleef ek Christen-wees as maar net nog 'n godsdiens; as maar net nog selfpogings en 'n stuk self-lewe wat nie werklik bevredig nie.

Is daar 'n ander moontlikheid en 'n oplossing vir die dilemma? Ja!. Natuurlik.

CHRISTEN-WEES SOOS DIE WOORD ONS LEER!

Kol 3:4 - En die geheim daarvan is Christus wat Sy lewe in ons lewe.

Kyk 'n mens terug na hoe dit by jou bekering was, onthou jy hoe maklik dit was om lief te hê, en te getuig. Woorde het net by ons mond uitgeborrel.. En toe ervaar ons: Maar ek sondig nog as Christen! Al die ou dinge het nie kits-kits verdwyn nie. En ek begin skuldig voel, bely hierdie sondes, en begin weer lewe. En sondig maar net weer. Om maar weer skuldig te voel, en weer skaam-skaam te bely. En dit word die sirkel van my daaglikse ervaring van Christen-wees. En dan vra mens: Maar is dit Christen-wees?

Kom ons gaan kyk net weer na die prentjie wat die Woord vir ons teken.

- Mat 1:21 - Ons sien Christen-wees is 'n lewe verlos van sonde. Christus is nie net 'n reddingsgordel wat na ons uitgegooi word terwyl ons besig was om in die middel van die see te verdrink nie. As dit al was dan bly ons steeds dryf in al die ou gemors van voorheen. Die verskil is dan net dat ons darem nie heeltemal wegsink in die dieptes in nie. Nee, Christus is eerder 'n reddingsboot wat ons kom oppik! Wat ons uitlig uit die gemors. Daarom kan Paulus daar in Gal 6:1 en Rom 6:1,2, 12 tot 14 sê wat hy sê.
- Luk 1:69,74-75 - Christen-wees is 'n intieme gesprek met God.
- Joh 4:14 - Christen-wees is 'n ervaring van lewe wat totaal bevredig. Dit is amper asof Hy vir ons 'n blanko tjekboek gee en sê: Gaan koop wat jy nodig het, maar kom net dat Ek elke keer die tjek eers teken voor jy gaan koop. Daar sal altyd voldoende fondse wees.
- Joh 7:37,38 - Christen-wees is 'n lewe waarin lewe uit jou uit stroom.
- Rom 7:25 - Christen-wees is 'n lewe waar ek nie meer 'n magteloosheid beleef teenoor sonde en versoekings in my lewe nie.
- 2 Kor 2:14 - Christen-wees is nie 'n lewe waar ek bloot verleë hulpeloos staan voor omstandighede nie. Oorwinning is moontlik, sê Rom 8:35 en 37. Ek sal alles oorkom!
- Ef 2:10 - Maar Christen-wees is ook 'n beleving dat ek groei.
- Joh 8:12 - Dit is 'n lewe in die lig.
- 1 Tess 5:23 - Ja, dit is 'n totaal geheiligde lewe.

Kan ek vra: Beleef jy dit? Nie!

Dan het ek vir jou goeie nuus. Dit is wat Christus aan die kruis vir jou behaal het. Hy het nie net gesterf om jou te kan vergewe en vry te maak van sondestraf nie. Hy het daar reeds vir jou die volle verlossing bewerk. Die oorvloedige lewe waarvan Hy praat in Joh 10 :10b. Ja, 'n lewe van verlos wees van jou sondige verlede, maar ook van die krag van sonde in die hier en nou van jou lewe.

DIE LEWE VAN CHRISTUS IN ONS

Christen-wees is nie net dat God ons wil verander nie. Nee dit is eerder 'n nuwe Persoon wat in ons kom lewe. Die Engels sê dit so duidelik: "It is not 'n changed life. It is an exchange life!"

- Gal 2:20 - Hierdie lewe het niks met my te doen nie. Dit is nie te wyte aan my pogings nie. Dit is Christus wat Sy lewe deur die Persoon van die Heilige Gees in my kom lewe. Jy sal nooit sonde self kan oorwin nie. Dit is die Ander Een wat in jou kom woon het, wat dit kan doen. Vir jou is Christen-wees nie net moeilik nie, Dit is onmoontlik! Dit is soos die verskil tussen 'n verslete Bybel en 'n nuwe Bybel. Met baie moeite kan ek die verslete een probeer restoureer. Maar dit maak hom nie werklik nuut nie. Daarom maak God jou nie nuut deur jou te help om te verander nie. Hy wil hê jy moet die nuwe lewe wat in jou is, toelaat om jou lewe vir jou te lewe. Daarom staan daar in Jes 61:3. Hy wil iets omruil: joune vir Syne!
- Hierdie nuwe lewe is nie 'n beloning nie. Dit is 'n geskenk! 1 Kor 15:57. Dit is verniet. Oorwinning is verniet. Dit is nie die beloning op baie moeite nie (Rom 6:14).
- Jy moet dit net vat of aanvaar of aanneem, soos die Bybel sê. Jy hoef dit nie te verwerf nie (Rom 5:17). Die verskil is soos wanneer jy self probeer om 'n berg uit te klim en wanneer jy met 'n helikopter bo-op afgelaai word. Daarom staan daar in 1 Kor 1:30 ... Ons het dus nie eers tyd nodig voordat ons dit kan belewe nie. Dit is nou daar vir ons. Ek hoef nie maande en maande te worstel om my humeur te beheer nie. Ek hoef maar bloot te aanvaar dat daar nou in Christus deur die werking van die Gees vir my oorwinning is!
- Hierdie nuwe lewe en oorwinning is God se werk in my. Dit is 'n wonderwerk! (Fil 2:12b en 13). Dit kom nie deur harde werk nie. God doen al die werk. Hy het dit eintlik reeds gedoen in Christus Jesus. Daarom hoef ons nie eers ons ou gewoontes en gevoelens te onderdruk nie. Die nuwe lewe wil doorgewoon spontaan uit ons uit vloei. Hoe anders is dit nie as wat ons soms ervaar nie. Soms lyk ons van buite heel bedaard en onder beheer, maar hier binne bruis en kook ons! Dit is mos nie oorwinning nie. Oorwinning kom nie deur selfverbetering, selfbeheersing en selfdissipline nie. Oorwinning word bewerk deur Christus wat sy lewe in my lewe! En hierdie lewe van oorwinning het 'n dag van registrasie, net soos jou verlossing en bekering. En dit is doorgewoon 'n keuse wat jy moet maak om Hom toe te laat om Sy lewe in jou te lewe.

HOE OM IN HIERDIE OORWINNING TE BEGIN STAP

- Gal 2:20 verskaf aan ons die antwoord. In negatiewe sin staan hier : Ek leef nie meer nie. Positief gestel beteken dit: Christus leef in my. Hoe gebeur dit?
- Deur totale oorgawe. Ek is gekruisig, sê Paulus. Skuif weg. Gee pad sodat Christus daar kan kom staan waar jy staan, en kan doen wat Hy in jou lewe wil kom doen. Jy is heeltyd in Sy pad. Sterf sodat jy uit Sy pad kan kom. Soms lyk ons dood, lê ons asof ons dood is. Maar eintlik is ons springlewendig! Rom 6 sê ons is saam met Christus gekruisig. M a w ons ou mens.
- Ons kan dit so goed weet en self al gememoriseer het, maar die vraag bly of dit ons ervaring elke dag is? Paulus het al hierdie dinge geweet waarvan hy daar in hoofstuk 6 skryf, en tog was sy ervaring dié van hoofstuk 7 elke dag!. Dit is soos die verhaal wat vertel word van die Chinese regering wat 'n wet gemaak het dat elkeen wat opium rook nadat hy of sy gerehabiliteer is, geskiet moet word. Dink jy dat iemand wat gevang is omdat hy weer gerook het, maar net kan probeer om op te hou? Nee, al wat vir jou dan oorbly is om te wag vir jou dood! Dit is ons daardie! Ons het al soveel keer geprobeer om op te hou. Daarom kom God en sê dat Hy nie wil probeer om ons te herstel of te reformeer nie. Hy wil ons kruisig! Sodat ons kan sterf en uit Sy pad kan wees!
- Tog dink ons nogsteeds ons kan self! Dit is net Rom 7 se ervaring dag vir dag in ons lewe wat ons moeg genoeg kan maak vir hierdie ervaring. Wat ons totaal kan oortuig dat ons totaal korrup is! Aanvaar dit nou maar eens en vir altyd: Jy kan nie self nie!
- En hou dan ook op om te probeer! Gee alles vir God. Sê vir Hom: Oorwinning is U werk in my! Laat los alles, ja ook die probeer. Jy kan nie self ophou rook nie. Jy het dit al tog hoeveel keer geprobeer. Gee dit vir Hom. Sê vir Hom: Here, ek nie anders as om te rook nie. Ek kan nie ophou nie. Nou hou ek op om te probeer. Nou gee ek alles vir U. Laat U my ophou.
- Glo dan. Dit werk eintlik soos 'n som: Ek as Christen = Adam + Christus in my. Trek ons Adam in die som af bly net Christus oor. Dit is wat daar in Ef 1:22; 4:15; Kol 1:18 ens. staan. Christus is die Hoof en ons is Sy ledemate. Joh 15:5 sê Hy is die wynstok en ons die lote. Wat en wanneer ons iets nodig het, verskaf Hy dit. Die onuitputlike rykdom wat in Christus is, is ons s'n. Hy is ons regverdigmaking. Hy is ons heiligmaking. Ons moet dit net in die geloof aanvaar. Soos wat jy jou kindskap en jou vergifnis aanvaar het. Aanvaar nou ook dat oorwinning oor sondes in jou lewe 'n geskenk is. Glo dit voor jy verwag om iets daarvan te voel of te ervaar. Ervaring en gevoel sal volg as jy glo wat die Woord sê.
- Gee oor! Erken dat jy nie kan nie, en nooit sal kan nie. Glo in die Seun van God en Sy lewe in jou. Glo dat Christus in jou lewe en glo dat jy daarom reeds die oorwinning in jou het. Dit is oorwinning! Alles is reeds deur Hom gedoen.

OORGAWE

- Luk 18:27 - Ons moet mooi kyk na die konteks van hierdie vers. Die saak waaroor dit in hierdie gedeelte gegaan het was dat die ewige lewe 'n geskenk is. En dit het hierdie jongman nie verstaan nie. Daarom moes Jesus hom die een ding wys wat hy nie uit sy eie kon doen nie.
- Daar in 2 Kor 12:9 ervaar Paulus iets soortgelyks.
- So is daar in elkeen van ons se lewens dinge wat ons kan doen. Maar God ken die een ding wat jy nie kan doen uit eie krag nie. En dit is dan hierdie ding wat Hy baie keer moet gebruik om jou aan die einde van jouself te bring. Sy beslissing staan vas: Jy moet sterf. Dit is net jy wat dit nog moet erken, aanvaar en oorgee. Jy moet erken en aanvaar dat verlossing onmoontlik is vir 'n mens uit eie krag. Die ewige lewe is totaal onbereikbaar vir 'n mens. 'n Lewe van oorwinning is onmoontlik vir 'n mens. Glo jy dit maar net. Dan kan God dit vir jou gee!
- Maar God wil eers hê dat ons dit moet raaksien en aanvaar. En Hy gebruik ons ervarings om ons hiermee te help.
- Dit was dan ook die wet in die Ou Testament se bedoeling: Om die volk van God aan die einde van hulle eie pogings te bring. En om dan oor te gee. Te los en op te hou self probeer. Te glo dat net God kan.
- Satan het eintlik net een manier om ons te versoek: Hy moet ons net weer kry om op te staan en self te probeer!
- Daarom staan dit daar in Gal 5:17 ... Dit is nie ons wat stry nie. Dit is die Gees in ons wat stry. Ons is net toeskouers. Laat die Here toe om die deur te gaan oopmaak as die Satan klop. Moenie jyself hom probeer uithou nie.
- Hou op bid: Here, help my! Gee oor. Sê: Here, oorwinning is U besigheid in my lewe. U is daarvoor verantwoordelik.
- Dit is soos die verhaal van die Christen wat in 'n put in die woestyn afgeklim het. Hand oor hand het hy by die tou afgeklim. Totdat hy aan die einde van die tou gekom het en nog steeds nie iets onder sy voet kon sien of voel nie. En daar hang hy. Terug kan hy nie, daarvoor is hy nou te moeg. Al wat oorbly is om te bly hang totdat sy arms nie meer kan nie. Hy begin toe skreeu: Here, help my. En die Here sê: Laat los jy maar net, dan help Ek jou. En toe los hy: Om te ontdek die bodem van die put was drie duim onder sy voete.
- Laat los jy ook maar net en land op die Rots van jou lewe: Christus Jesus, die Here.
- 2 Kor 12:9 - God gebruik ons swakhede hiervoor in ons lewe om ons te help om dit te ontdek. Juig oor jou swakhede en moeilikhede. Want so bring die Here jou aan die einde van jouself.

- Luk 19:8 - Kyk maar na die verskil wat Jesus in Saggeus se lewe gemaak het. Toe Christus in sy lewe instap het was dit onmiddellik vir hom moontlik om elkeen wat hy deur die jare beroof het, vierdubbeld te vergoed vir sy skade. God kan as jy nie kan nie.

GLO

Kom ons blaai weer na Gal 2:20 toe en ook na dit wat daar in Heb 11:1 staan.

- Oorwinning is dus nie meer my moeite en pogings nie. Dit is Christus wat in my lewe. Dit is nie meer om te verander en te verbeter nie. Dit is Christus wat vir en namens my stry en oorwin.
- Baie mense het al oorgegee. Baie is bereid om te erken: Ek kan nie! Maar tog smaak hulle nie oorwinning nie. Omdat hulle nie glo nie.
- Begin om God se feite te glo. Glo al God se beloftes is dit wat God vir jou wil doen.
- Hy is jou Verbondsgod. Hy het reeds in Christus alles gedoen wat vir jou nodig is. Hy belowe nou dit aan jou met die oog op die toekoms.
- Dit is 'n feit dat Christus vir die wêreld gesterf het. Maar in werklikheid word hoeveel mense gered? Alleen diegene wat dit glo. Die res sterf en gaan verlore omdat hulle dit nie glo nie.
- Dit is 'n feit dat Christus die Hoof van Sy liggaam is. En tog buig baie Christene nie voor Hom as Here nie.
- Dit is 'n feit dat Christus die wingerdstok is en dat lewe uit Hom vloei na ons toe as ons in Hom bly. Tog worstel baie Christene met 'n vrugtelose Christelike lewe.
- Baie van die groot krisis en armoede in die Christendom is bloot te wyte aan ons gebrek en onwilligheid om God se feite oor ons te glo! God se genade is in werklikheid werklik vir ons genoeg, soos 2 Kor 12:9 sê.
- Luk 18:27 - Geloof is nie om te vra wat God reeds belowe het nie. Geloof is bloot om te glo wat God reeds belowe het.
- Soms bid ons te veel vir oorwinning. Terwyl God doodgewoon wil hê ons moet net Sy beloftes glo. Miskien sal ons dan leer dat baie van ons gebede eerder danksegging moet wees.
- Geloof is nie om te hoop nie. Geloof is nie om te voel nie. Geloof is om God te dank vir geduld, liefde, vrede, ens in Christus!
- Ongeloof is die grootste probleem van Christene. Want dit maak God 'n leuenaar.
- Mrk 11:24 - Bely dit en glo dit. Gryp God se Woord vas en lewe daaruit.

DIE TOETS VAN JULLE GELOOF

1 Pet 1:7 - Daar is nie 'n tyd in ons lewe as Christene waarin ons geloof nie getoets sal word nie. Geloof moet getoets word. Die redes hiervoor is die volgende:

- Dat ons kan groei. Sonder toetsing is daar nie groei moontlik nie.
- Die feit dat ons geloof die toets deurstaan, verbly en verheerlik God.
- So word Satan se mond gesnoer. Hy probeer alles en nog wat om ons te weerhou om dit te vat wat ons s'n is in Christus. Hy gooi twyfel en moeilikhede na ons toe. Daarom versterk God ons geloof deur hierdie dinge te gebruik as toetsing van ons geloof. En Satan, op sy beurt, beleef dat ons nie meer so 'n maklike prooi is nie, en dan retireer hy.
- Ons kan weer ook ander help as ons hulle vertel en toerus met ons ervaringe.

In hierdie proses leer ons wat geloof inderwaarheid is. Ware geloof is immers lewenslange geloof. Dit is nie net korttermyn-geloof nie.

Die Skrif leer ons dat oorwinning kom as ons die Woord van God glo. Dat Hy ons laste dra. Dat daar in Hom oorwinning is. Dank Hom eenvoudig daarvoor.

Maar onthou: Vandag se oorwinning beteken nie dat jy verander het nie. Dit is te wyte aan Christus se werk in jou. Christo bly Christo vir altyd. Maar Christo se oorwinning is Christus se oorwinning in hom.

Moet dus nie kyk na jou ervaringe nie. Glo net die Woord. Soms kry jy dit vir 'n week lank reg om geduldig te wees, en dan misluk jy skielik. Moenie dan begin bewyse soek of die Woord nog werklik geld nie.

Waar geloof is, moet berge padgee, sê Mat 17:20 en 21:21.; Mrk 11:23 en 1 Kor 13:2. Of die berg moet padgee of jou geloof. Wat gaan dit wees? (Rom 8:11).

Jona 2:8 leer ons dat ons omstandighede bloot leuens is of versoekings is van Satan om God se Woord te betwyfel.

Joh 17:17 sê God se Woord is die waarheid. Ware geloof vertrou op God alleenlik. Laat Satan hom maar uitwoed. Vertrou jy maar net op God.

Jy verander soms. Jou gevoelens verander. Maar God verander nie (Jes 28:16).

Mrk 4:40 en Mat 8:26 leer ons daar is storms op die see. Maar met geloof kan jy die toets deurstaan en dit kop aan kop stormloop en tog vas bly staan.

Gaan staan jy maar net aan God se kant in die geveg, en aan die kant van Sy Woord.

Elke toets is maar eintlik net 'n geleentheid vir God se getrouheid om weer uit te staan in jou lewe.

GROEI

Lees Joh 17:17.

Hersien net weer die kernlering: Ons ervaar herhaalde mislukkings in ons lewe. Maar die lewe wat God belowe is meer as dit. Dit is Christus se lewe in ons wat die oorwinning bewerk. Al ons gebede, onderdrukking van ons gevoelens, en geworstel is totaal oneffektief. God se plan is nie om ons te verander nie. God se plan is om 'n Ander Lewe vir ons in ruil te gee. Christus se lewe vir ons lewe. En die manier hoe Hy dit gee is deur ons te vra om totaal boedel aan Hom oor te gee en te glo dat Sy genade in Christus voldoende is vir al ons lewens-omstandighede.

Christus is ons lewe. Hy is ons heiligheid. Los nou maar jou eie pogings. En glo dit.

Maar hierdie geloof van jou moet getoets word om te groei.

In hierdie proses van toetsing gaan God jou daaglik die volgende leer sodat jy meer en meer oorwinning kan beleef:

- Heb 12:1 - A g v sonde leef ons nie voortdurend in oorwinning nie. Terwyl dit God se plan is dat die lewe van Christus in my afreken met elke sonde wat my so verslaaf het. (Dit is soos om 'n plaas te koop en dan te ontdek dat daar rowers intussen op kom woon het. As jy die koopkontrak in jou sak het, kan jy hulle begin verdryf met die outoriteit en sekerheid dat hierdie plaas joune is. Totdat daar nie meer een van hulle oorbly nie.) So kan jy die duiwel weerstaan met die skild van die geloof, sê Ef 6:16.
- Erken elke dag jou onvermoë en aanvaar dat Christus alles vir jou kan doen. In daardie gevalle waarin jy nie eers mooi tyd het om mooi te dink nie, bid vooraf "Bewaar my van versoeking". En in daardie gevalle wat net aanhou en aanhou: Moenie stry nie. Ignoreer dit eenvoudig net en kyk hoe Christus daarmee gaan handel.
- Sonde sal altyd 'n moontlikheid bly in jou lewe. Lewe daarom in die geloof wat daar in Rom 1:17b verwoord is.
- En as jy val, handel dan op grond van 1 Joh 1:9. Die Bloed van Christus verander alles onmiddellik.

Wat is dan nou die verskil van jou vroeëre lewe en nou? Voorheen het jy gelewe as 'n verslane mens. Mislukking was jou norm. Nou, na oorgawe, is 'n lewe van oorwinning jou norm. Al struikel jy, is jy nog altyd oorwinnend. Voorheen was daar baie mislukkings en min oorwinnings. Nou is daar baie oorwinnings, en min mislukkings. En selfs al misluk jy, restoureer die bloed van Christus jou onmiddellik as jy dit bely.

Daarom kan 1 Joh 5:11 en 12 kom en sê dat ons verhouding met Christus daaglik die hart is van ons nuwe lewe.

Daar is 'n Chinese spreuk wat lui: Sorg vir die berg dan het jy altyd hout. Sorg jy maar net dat jy in 'n lewende verhouding is met Christus, dan sal daar altyd oorwinning wees in jou lewe.

En deur oorwinnings in jou lewe, groei jou geloof, want jy sien en beleef dan die waarheid van die geloof en aanvaar dit was bloot genade.

Joh 17:17 - Soos wat ons kapasiteit groei om die Woord vas te gryp en daaruit te lewe, so groei ons in die waarheid en in die genade waarvan 2 Pet 3:18 praat. Om dus te groei in genade is dus om te leer om meer en meer van God se genade afhanklik te wees.

Want dit is die waarheid wat my gebrek uitwys. En dit is die genade wat voorsien in my behoeftes. Daarom sê Joh 1:17 God is genade en waarheid.

1 Pet 1:22 leer ons om te leer om lief te hê. En midde eensaamheid te bely saam met Ps 16:11.

OORWINNING

In Ps 20:5 beteken verlossing inderwaarheid oorwinning.

Kom ons lees nou 2 Kron 20:1,3,12,15,17-22,24,26-28

- Oorwinning kom geheel en al van Christus af.
- Maar ons het nodig om God daarvoor te loof! Om te getuig nadat die oorwinning behaal is, is maklik. Maar die kuns is “to triumph in victory, before victory”! Om te skreeu voordat die oorwinning behaal is. Om fees te vier en halleluja te sê voordat jy nog iets kan sien gebeur.
- Luister maar na 2 Kron 20 om iets hiervan te verstaan: Lees vers 1,3,12,15b, 17 ev., 22.
- God werk onmiddellik as ons begin sing en juig.
- Dank en lof het twee fases: Voor die oorwinning - verse 26a, 27 en 28; en lof na die oorwinning..
- Neh 8:10c - Die lewe van God in ons vind uitdrukking in vreugde.
- Kyk verder na 2 Kor 8:2 midde krissise.
- En ook Jak 1:2; 1 Pet 1:6,8; 1 Pet 4:12-13; Mat 5:11-12; Fil 4:4; 2 Kor 12:10; 1 Tess 5:18 a; Kol 3:17.
- Rom 8:37 sê ons is meer as oorwinnaars.

ALGEHELE TOEWYDING

Lees 2 Kor 5:14-15; Rom 6:13,16; 12:1-2; 6:19,22.

- Dit is waar 'n lewe van oorwinning moet eindig!
- Rom 6:13 - Dit is wat ons doen as ons die lewe van Christus in ons toe-eien wat oorwinning gee. Sonder die lewe in ons, help dit nie ons wy ons aan God toe nie. Dan is dit alles bloot leë beloftes van ons kant af.
- Hoe wy ons ons dan toe? Op grond van God se genade wat uitgespel is in hoofstukke 1 tot 8. Nou verstaan ons God se bedoeling met ons. Hy begeer om die lewe van Sy Seun in ons te manifesteer sodat ons kan deel in Sy heerlijkheid, sê Rom 8:29.
- Rom 6:16b - Ons is Sy slawe omdat Hy ons gekoop het. Maar ons is ook Sy slawe omdat ons vrywillig onself aan Hom toegewy het.
- Dit is soos die slavin wat opgeveil is. Twee mans het op haar gebie. Die meisie het gehuil, want sy het besef 'n lewe met enigeen van die twee sou ellende vir haar beteken. Toe kom 'n derde man en koop haar. "Maak haar boeie los en laat haar gaan" sê hy. Verslae staan die meisie en kyk hoe sy vrygemaak word en die man wegstap. Toe hardloop sy agter hom aan en word 'n jaar later sy vrou.
- Dit is waarvan Rom 12 en Eks 21:2-6 ons vertel.

Toewyding aan God beteken om die volgende aan God te gee:

- Jou geliefde en ander mense wat vir jou kosbaar is - deur God meer lief te hê as vir hulle (Ps 73:25; Mat 22:37).
- Gebeure en omstandighede. En jou besigheid.
- Al die dinge in jou lewe: geld, klere, eiendom.
- Jou self - 1 Kor 6:19. Soos die gediggie s Take my hands and let them move at the impulse of your love; Take my feet and let them be swift and beautiful for Thee. Take my love, my Lord, I pour at thy feet its treasure-store; Take myself, and I will be ever, only, all for Thee! (Frances R. Havergal).
- En die resultate hiervan vind jy daar in Rom 6:22 in die vrug van heiligmaking as jy sien dat jou hande nie meer dinge wat verkeerd is doen nie. En in Rom 12:2c as God se wil jou wil word.
- Ons is dus nie meer in die eerste plek vir ander se gebruik in hierdie wêreld nie. Ons is eksklusief daar vir God se gebruik!
- Rom 12:2. Doen wat vir God goed is. Lewe dus nie meer vir jouself nie, maar vir God!

DIE JESUS-LEWE

Net Jesus kan die Jesus-lewe leef

Ek kan nie soos Jesus leef uit eie krag en vermoëns nie. As ek glo ek kan, is ek nog prooi van die oudste leuen van die bese. Daardie leuen wat hy reeds in Gen 3:4 aan die mens opgedis het.

Omdat dit 'n leuen is, misluk ons as ons probeer om soos Jesus te lewe en so Hom te probeer plesier. Daarom sukkel ons so om ons vyande lief te hê, of aan te hou "nee" sê vir daardie aangeleerde gewoonte.

Dit is eers as ons weer Gal 2:20 ontdek dat ons by die oplossing vir hierdie worsteling van ons uitkom:

"... en nou is dit nie meer ek wat lewe nie, maar Christus wat in my lewe. Die lewe wat ek nou nog hier lewe, leef ek in die geloof in die Seun van God wat sy liefde vir my bewys het deur sy lewe vir my af te lê."

Met my bekering en wedergeboorte het 'n ruil plaasgevind. God het my ou eie-ek, aan-sonde-verslaafde-natuur vervang met Jesus se lewe deur die inwoning van die Heilige Gees in my liggaam.

Ek is soos 'n erdekrui wat gevul is met iets, of eerder, iemand nuut! Ek is soos 'n loot wat oorgeënt is op 'n ander Wingerdstam om daaruit al my lewe voortaan te trek.

Solank ek op Jesus in my in geloof fokus en vertrou om Sy lewe in my te lewe, is die vrug daarvan dit wat Gal 5:22 en 23 beskryf:

"Die vrug van die Gees, daarteenoor, is liefde, vreugde, vrede, geduld, vriendelikheid, goeiehartigheid, getrouheid, nederigheid en selfbeheersing."

Maar as ek maar weer op my eie vermoëns fokus en staatmaak, is die wrange vrug daarvan Gal 5:19-21. Gaan lees dit maar self.

Jesus is nie net by my nie. Hy is in my. Hy is my lewe.

- Dit verlos my van die "arme sondaar-sindroom"

Ons kry soveel Christene wat reeds tot bekering gekom het; wat gedoop is; ge-commit is met hulle lewens aan Jesus; wat honger is vir die Woord, en selfs geestelik groei in heiligmaking. Baie van hulle staan selfs voltyds in bediening en dien die Here deur te getuig, in te tree vir ander in gebed ens. Maar hulle sit vasgevang in 'n "ek is maar 'n arme sondaar-sindroom"!

As hulle 'n slag eerlik met jou is, vertel hulle jou van hulle frustrasie om te beantwoord aan die eise van Christen-wees. Hulle sal jou vertel van gedurige gevoelens van veroordeling en mislukking.

Van 'n Christen-wees wat werklik 'n "ligte las" is, soos Mat 11:28 en 29 sê, beleef hulle bittermin. Hulle sal jou eerder wil vertel van 'n ou-vlees-natuur hierbinne-in hulle wat heeltyd grom en brom en ander wil byt.

Al wat van ware Christen-wees nog sigbaar is in hulle lewens, is daardie deeltjie wat hulle met baie sterk wilsbesluite en streng selfdiscipline uitgelewe kry. Daarom voel hulle hulle feins, want buite blink dit, maar

binne stink dit! Genoeg om te sê dat hulle bra "gekonfoes" voel, en heelyd in 'n semi-burgeroorlog met hulleself gewikkel is.

Dit is hulle wat vir jou sê: Ai, as ek maar die sterk geloof gehad het wat jy het! Bedoelende dat hulle makliker oorgee aan twyfel en vrees in hulle lewens.

Daarom is dit eintlik vir hierdie mense bevrydend om 'n gedeelte soos Rom 7:15,20-24 in die Bybel te ontdek, want daarmee kan hulle werklik identifiseer! Maar natuurlik weet hulle daar is meer! Daarom is dit so wonderlik om met hierdie mense 7 Bybelse waarhede te deel wat 'n mens vrymaak van hierdie worstelstryd:

1. God is alles wat ek nodig het, en woon in my as Christen
2. Ek is net 'n erdekruik
3. Ek leef nie meer nie
4. Jesus is die lewe in my deur Sy Gees wat in my liggaam woon
5. Ek is nou dood vir die Wet
6. Ek lewe deur die Gees van Jesus in my
7. Ek lewe in geloof dat God Immanuel is.

Kom ons gaan dink kortliks oor elkeen van hierdie waarhede.

1. GOD IS ALLES WAT EK NODIG HET, EN WOON IN MY AS CHRISTEN

God is soveel groter as wat ons dink. Hy is die Almagtige. Hy is Liefde. Hy is Vrede.

Dit is belangrik om bv daar in Gen 17:1 om raak te lees hoe God Homself aan ons bekendstel as "Ek is God die Almagtige". Net soos wat Hy daar in 1 Joh 4:16 Homself aan ons bekend maak as "Liefde".

Let op dat hier nie staan dat God liefde **het** nie. Hy **is** liefde. Met ander woorde as Hy net bloot liefde in voorraad by Hom gehad het, kon Hy dit net aan ons gegee het as ons dit nodig het. Maar omdat Hy liefde **is**, moet Hy Homself aan ons gee sodat ons ook liefde in ons kan hê.

Dit beteken dus heel prakties dat ek as Christen nie meer net sekere eienskappe van God kan vra om Christen te wees nie. Ek het nodig dat God Homself aan my moet gee, self in my moet kom woon, om werklik Christen te wees soos Hy van my vra. Daarom het iemand heel tereg opgemerk dat Christen-wees nie 'n self-verbeteringsprogram is nie. Dit is eerder 'n vervangingsprogram waardeur God, deur Sy Gees wat in my kom lewe, my ou lewe kom vervang met Sy eie lewe. Dan kan daar 'n kontinue stroom lewe uit my vloei as my oë in geloof gevestig is op Jesus, en ek Hom vra om in my te lewe en ten volle in beheer te wees deur Sy Gees.

2. EK IS NET 'N ERDEKUIK

Ons groei op in 'n wêreld wat die mens sien as 'n self-versorgende eenheid, wat geleer kan word om ten volle te kan "cope"!

Dan is dit insiggewend om te ontdek dat 2 Kor 4:7 ons teken as 'n brose erdekrui wat gevul word met lewe. Met ander woorde, ek en jy is nie die volle pakket op ons eie nie. Ons is bedoel om die Gees van die lewende God in ons te hê om mens te wees soos God dit oorspronklik bedoel het.

Dan verstaan ons gedeeltes soos 1 Kor 6:19; Joh 15:5; Joh 7:37-39; en Kol 1:18.

Ons is bedoel om die lewe te lewe wat deur God se Gees in ons geïnsiseer word. En waar ons in vertroue op hierdie lewe in ons fokus, beleef ons dat dit soos 'n spontane stroom lewe uit ons begin stroom wat ander werklik kan bedien met lewe.

Dan ontdek jy met 'n skok dat jy selfs voor jou bekering 'n leë erdekrui was, maar toe gevul was met 'n ander gees, die gees van die heerser van hierdie wêreld, satan (Ef 2:1-3).

Maar nou woon die Gees van die lewende God in jou, en Hy wil die volle beheer oor jou hele lewe hê (Rom 6:12-14,17,18; 2 Pet 1:4)

3. EK LEEF NIE MEER NIE

Baie mense groei op met die idee dat jy jou eie baas is wat self oor jou lewe kan beslis. Dit is natuurlik 'n infame leuen (Rom 6:17). Iemand anders was maar eintlik die heelyd jou baas, en jy was maar net klaas!

Daarom is die ontdekking van Gal 2:20 se woord vir die Christen 'n vrymakende woord. Om te ontdek ek leef nie meer nie, maar Jesus leef in my.

Kyk mooi wat hier staan. Hier staan nie - soos wat daar baie keer vir ons geleer word - dat ons **vir** Jesus moet lewe nie. Hier staan dat Jesus ons lewe vir ons en in ons lewe!

Ons leer so baie keer vir mekaar om **oor** Jesus te getuig, in plaas daarvan dat ons die Gees van Jesus moet toelaat om in en deur ons te getuig.

Sonder dat ons mooi besef is ons dus besig om heelyd te fokus op die Christen wat moet presteer en probeer. Wat natuurlik tipies godsdiens is! Terwyl die hart van die Christelike evangelieboodskap juis die teendeel daarvan is: Hou op strew! Beweeg in in God se rus (Heb 3 en 4).

Dit het tyd geword dat ons mekaar moet help om onself weer in die lig van die Bybelboodskap te herdefinieer: "Ek" is nou Jesus wat deur Sy Gees in en deur my lewe. Of soos Fil 4:13 dit stel: "Ek is tot alles in staat deur Christus wat my die krag gee." Maar dan deur Christus wat in my is.

Dit is so maklik om weer terug te val in die ou patrone. Daarom moet ons bid dat die Here ons sal leer om nuut, Bybels, te dink en elke dag so te leef (Kol 2:18-23).

4. JESUS IS MY LEWE

Die hart van die Evangelie-boodskap is dus dat die Gees van Jesus in elkeen woon wat wederbaar is. Hy vervang so ons "self" of ou-natuur-lewe, met Jesus se lewe in ons.

In die mate wat ons leef met ons oog en oor gevestig op Jesus in ons, kan die Gees van Jesus die lewe van Jesus uit ons binneste laat vloei en doen wat die Vader wil doen in en deur ons lewens (Joh 5:19,20,30).

Maar wat van die ou gewoonte-patrone in elkeen van ons om maar weer alles self te probeer doen wat die Woord ons vra om te doen?

Dit is duidelik dat ek self nie hierdie patrone kan breek nie - anders is ons maar weer terug by "godsdienst". Net Jesus kan dit self in ons doen deur Sy Gees wat in ons lewe.

Maar hoe doen Hy dit?

Heb 12:1 sê dit begin daar waar ons leer om net op Jesus te fokus, en net luister na Sy stem, en sensitief is vir Sy prentjies.

Rom 8 spel dit uit as dat ons dan beleef hoe "die Gees van lewe in Jesus" beheer begin oorneem in ons lewens en deur ons begin lewe. Gal 5 roep ons daarom op om hierdie Gees toe te laat om ons hele lewe te beheer.

So word ons dus in 'n sin "ontvangers" van hierdie nuwe lewe in Jesus deur die Gees van ons in ons lewens se werk (Ps 81:10), en is dit nie maar net weer 'n soort Ismael-produk en bloot dooie werke waarmee ons besig is nie.

5. EK IS DOOD VIR DIE WET

Op 'n paar plekke in die Nuwe Testament - veral in Romeine en Galasiërs - spel Paulus uit dat die Christen, wat deur die Gees Jesus se lewe begin lewe, "dood is vir die wet". Bedoelende dat dit nie meer daaroor gaan om die bevel van die wet te probeer gehoorsaam nie - want dit laat jou heeltyd veroordeeld voel.

Die vraag is egter of daar nog enigsins vir die wet plek is in die Christen se lewe?

Paul Yonggi Chou het die stelling gemaak dat 'n mens óf van die Berg Sinai óf van Golgota af dink en preek! Waar eersgenoemde niks anders as net nog wette en dood in 'n mens se lewe bring nie, beteken Golgota egter dat die krag van die opgestane Jesus in my lewe aan die werk kom (2 Kor 3:6-9).

Rom 7:4-6 spel dit uit dat Christen-wees 'n nuwe soort lewe is waar ons leef uit die krag van die Jesus-lewe deur die Gees in ons.

Waar ons egter kies om nogtans te sondig, kan die wet wel vir ons 'n soort veiligheidsnet wees wat ons kan beskerm en teruglei na Jesus (Gal 3:23-27). Maar die Christen sal maar elke keer moet kies tussen 'n lewe van intieme gemeenskap met God deur die Heilige Gees in ons (Heb 12:25 ev) of 'n lewe waar die wet maar weer die toon aangee in jou lewe.

6. LEWE DEUR DIE GEES IN MY

Rom 8:1 en 2 spel uit dat waar die wonderlike wet van die Gees-lewe van Jesus in my die toon begin aangee in my lewe, dit jou genees van hierdie innerlike oorlog van ou-natuur en Gees-natuur. Dit bewerk werklik vrede, krag en liefde in jou lewe as Christen.

Vers 3 spel voorts uit dat dit ons probleem met ons swak vlees-natuur oplos. Net die Gees van Jesus in ons kan werklik die wil van God gehoorsaam (vers 4). In die mate wat ons fokus op Sy krag in ons en roep daarna, bring dit lewe in ons sterflike liggame (vers 5,6, 11-14).

Die manier hoe dit prakties word in my lewe, kan ons soos volg voorstel:

- Word bewus van die Gees van Jesus wat met Sy krag in jou woon en aan die werk is (Gal 5:22 en 23 spel vir jou die karaktereieskappe en emosionele kenmerke daarvan uit)
- Fokus dan op die Gees van Jesus in jou gees. Word stil genoeg om bewus te word van wat Hy wil, en begin saam met Hom vloei (Ef 5:18; Jud v 20,21)
- Wees oop vir die Heilige Gees se teenwoordigheid en werk in jou lewe
- Begin praat oor wat Hy aan jou openbaar (Rom 8:26) deur Hom toe te laat om deur jou te bid, profeties aan die woord te kom, en wees oop vir visioene en ander prentjies wat van Hom af kom.

7. LEWE IN GELOOF DAT GOD IMMANUEL IS

Dit is maklik om intellektueel Gal 2:20 na te sê. Maar dit is heeltemal 'n ander saak om dit werklik vir jou lewe van elke dag te glo en te vertrou.

Ons leef in 'n wêreld wat nie glo dat God nog elke dag kan praat met mense nie, en ook nie dat Hy nog elke dag werklik wonders en genesings kan doen nie - wat God se Woord daar in Mat 13:58 en Heb 11:6 baie relevant vir ons maak.

Daarom is dit werklik 'n uitdaging om te leer uit die ongeloof van die volk van God vanouds, en te leer om God se Woord werklik te glo om so te deel in die oorfloed van God vir ons belowe het (Heb 4:7-11; Deut 28:1,2,11-13). Dit is immers duidelik dat God mense soek wat werklik geloofsmense is wat Sy stem herken en doen wat Hy vir hulle sê. God soek beslis nie "moaners en groaners" nie. Hy het immers 14,700 van hulle doodgemaak op een dag!

Daarom is dit my keuse om werklik geloofsmens te wees wat die Gees van Jesus wil toelaat om die lewe van Jesus in en deur my lewe elke dag te leef.

LEWE BO-NATUURLIK IN HIERDIE LEWE!

Die Bybel is vol wonderlike voorbeelde van doodgewone mense wat geleer het om as geloofsmense in hierdie wêreld te leef.

Dink maar aan Abraham, Moses, Petrus en Paulus. Die volgende teksgedeeltes oor elkeen se lewe behoort dit vir jou aan te toon:

- Abraham

Gen 12:1-4,10-20; 15:5,6; 16:1,2; 20:1-3; 21:2,5; 22:1-18 en Heb 11:17-19.

- Moses

Eks 2:10; Heb 11:24-26; Eks 2:11-14,15,21; 3:2-4:17; 7:1.

- Petrus

Mrk 10:28; Luk 22:31-61; Joh 18:10,11.

- Paulus

Fil 3:4-6; Hand 9:1-20; Gal 1:17,18-24; Fil 3:7-11.

Lyk dus vir my dat daar twee draaipunte in 'n Christen se lewe is, naamlik waar jy radikaal tot bekering gekom en wederbaar is, en daar waar Gal 2:20 werklik deel geword het van jou daaglikse geloofswandel met die Here.

LEWENSERVARINGE IN DIE WILDERNIS

God vat ons soms wildernis toe om ons bepaalde dinge te leer. Soos wat Hy met die volk van God gedoen het, maar ook met Jesus (Luk 4:1).

Daar word ons verlos van ons sisteme van selfversorging en steun op jouself. En daar leer jy om God en Sy krag in jou lewe bo alles te vertrou.

In die woestyn leer ons natuurlik ook om op te hou om te kla (Num 11-18; 16:49!). En daar leer ons om God se stem te hoor (Deut 5:22-31).

As jy klaar geleer het, laat God jou uitkom. Maar as jy nie leer wat jy daar moet leer nie, sterf jy in die woestyn en beleef nooit die ingaan in die Beloofde Land nie!

WAT SÊ DIE NUWE TESTAMENT IN HIERDIE VERBAND?

Gaan kyk maar na gedeeltes soos die volgende:

- Rom 6,7 en 8
- Kol 1:10-14,19,22-23,26-29; 2:1-3,5.

En dan is dit duidelik dat, soos wat ek en jy nie gered word uit eie krag nie, so kan ons ook nie Christen uit eie krag wees nie. Dit gebeur alleenlik daar waar Jesus se lewe deur my vloei soos 'n stroom lewende water.

Lees maar wat daar in Kol 2:8-12 hieroor staan. Christen-wees is nie tegnieke of teologie nie. Die hart daarvan is 'n lewende verhouding met 'n lewende Jesus wat deur Sy Gees in my liggaam woon en werk. Kyk maar wat verse 16 tot 23 en hoofstuk 3:2 tot 4 hieroor verder sê.

Net die ontdekking van die lewe van Jesus in jou deur die werking van die Gees, verlos my en jou van 'n wurm-teologie en maak dat werklik lewe uit ons lewens stroom wat ander kan bedien met God se liefde en Sy krag!

En dit is my gebed vir jou lewe.

BEDOEL OM ANDER TE BEDIEN

Kom ek neem jou na twee Bybelse senarios om jou te help vasvat wat die Here nou sê:

- 1 Sam 14:1 e v – Hier sien ons die volk van God in gate (kyk hfs 13:6 e v) en die vyand wat hulle van alle kante af teister. Menslik gesproke is daar nie uitkoms nie. Hulle het nie eers wapens om hulle self te verdedig nie. Maar in hierdie “hopelose situasie” staan een gelowige op sodat die vyand hom kan sien ... Omdat hy hoop en glo “dalk sal God ingryp en help”!
- 1 Sam 17:16 e v – Vir 40 dae stap die vyand rond en daag God se volk uit, totdat een gelowige opstaan en sê: Tot hiertoe en nie verder nie. God lewe. Sy Woord is die waarheid. Hy kan hier ‘n verskil maak. En Hy kan deur my ‘n verskil hier maak.

Toe Generaal Persing, bevelvoerder van die Amerikaanse magte tydens die Eerste Wêreldoorlog, die oorlog betree, sit die Duitse magte reeds vir 3 jaar vasgevang in ‘n loopgraaf-oorlog met die Britse en Franse magte. Wat prakties beteken het dat al beweging wat daar eintlik was, was as een van die soldate sy kop sou uitsteek en geskiet word, word hy doodgewoon vervang met ‘n nuwe “vars” soldaat. Dit was regtig ‘n geval van wie die langste gaan uithou en nog manne oor het, tree as oorwinnaar uit die stryd.

Hiermee was Genl Persing nie gediend nie. Hy was van oordeel dat ‘n oorlog gewen word deur pro-aktief die vyand strategies aan te val en te verslaan. Met 500 000 manne trek hy toe op teen die Duitsers en na 47 dae se aktiewe oorlog verslaan hy hulle finaal. Al het dit 122 000 manne se lewens gekos, was die resultaat die vyand moes totaal oorgee en die oorlog was verby.

Rondom my sien ek ‘n groot deel van die gelowige Liggaam van Jesus vasgevang in allerlei loopgrawe. Al wat hulle probeer doen is om te oorleef en kop bo water te hou.

In my gees beleef ek die Here sê ons hoort nie in loopgrawe nie! Hy bedoel besigheid met ons hier-wees. Ons talente en salwing is nie bedoel vir dekorasie nie. Dit is bedoel om aggressief die Koninkryk van God te laat kom. Dit is bedoel om te doen wat ons hande vind om te doen.

Maar intussen sit ons in loopgrawe, in die status quo vasgevang.

Wat die situasie verder tragies maak is dat geestelike leiers so gewoon geraak het aan hierdie styl van blote oorlewing! Hulle dink dit is maar hoe dit gedoen moet word. Dit is asof hulle nie meer rekening hou met die krag-dimensie van die Gees van Jesus en die heerlijkheid van lewende God nie.

Maar God is besig om ‘n nuwe geslag soldate en leiers op te rig. Mense met ‘n “oop sisteem” waar daar weer ruimte is vir ‘n lewende God om in te gryp om ‘n dramatiese verskil te maak.

Daarom roep God hierdie gelowiges op om uit veilige strukture en programme te klim en die vyand pro-aktief kop-aan-kop aan te vat.

Dit is tog wat daar in Luk 4, 9 en 10 gebeur het in die lewens van Jesus en Sy volgelinge. Maar ook wat daar in Hand 2 en verder in Handeling 2 gebeur het.

Blaai 'n mens na 1 Kor 12:4 tot 11, sien jy dat die verskillende gawes van die Gees bedoel is om die vyand pro-aktief aan te vat. Ons kan alleen mense met hierdie gawes bedien as ons opstaan uit ons veilige loopgraaf en gaan doen wat ons beleef die Gees sê ons om te doen.

Ons kan bly sit en kyk wat gebeur, of ons kan in geloof 'n eerste tree gee en so vir God 'n deur of 'n venster oopmaak om self die situasie binne te stap en dinge te kom verander.

Die boeie wat gelowiges in loopgrawe hou is in wese 'n gees van vrees. Terwyl 2 Tim 1:7 sê maar ons het 'n gees van krag, liefde en selfbeheersing.

Die anakronisme van F-E-A-R is "false evidence appearing real". Daarom daag die Here ons uit om as deel van ons opstaan uit die loopgraaf te begin handel met daardie vrese. Hou op om dit te ontken.

Vrees kom van gekwesde areas in ons onoorgegewe sielsnatuur en van aangeleerde responses en reaksies. Dit is ook die gevolg van traumatiese gebeure en aanvalle van bese geeste.

Oorwinning daarvoor kom nie as ons alles om ons net wil veilig maak nie. Oorwinning kom as ons in gebed, op grond van die Woord in geloof begin handel met dinge. As ons dit begin bedien met die gawes en die krag van die Gees.

"Fear is faith in reverse gear!"

Laat staan sulke dinge, laat staan! Staar op. Breek daarmee. Los. En laat God toe om deur jou ander te bedien.

In Ef 4:11-16 word die taak van geestelike leiers in die Liggaam juis geteken as dat hulle gelowiges moet toerus om mekaar te begin bedien.

In Mat 16:18 leer Jesus ons dat dit beteken dat ons die "hekke van hel" pro-aktief moet aanvat in Jesus Naam op grond van die Evangelie-beleydenis.

Onthou wat "hekke" in die destydse Oosterse wêreld aangedui het. Dit was die posisies van outoriteit. Daar is besigheid gedoen en besluite geneem. Dit was die sleutel tot oorlewing en beheer oor 'n hele stad en sy mense. Wie die hek het, het die beheer oor die hele stad.

Aangesien ons oorlog nie teen vlees en bloed is nie, maar teen die geestesmagte in die lug (Ef 6:12), moet ons fokus in hierdie stryd wees op al daardie vestings wat die boses in mense se lewens opgerig het oor die jare. Daar moet ons pro-aktief die Evangelie en die oorwinning van Jesus gaan proklameer (Ef 3:10). Daar moet ons opstaan en ingaan en die Naam en die Woord van Jesus gaan gebruik. Daar moet ons mense met die krag en die salwing van die Koninkryk gaan bedien.

Maar die sleutel is gelowige gehoorsaamheid. En vir diegene geld die beloftes daar in Jes 45:1-3.

Gaan haal daardie skatte wat God vir jou bedoel het ... waar die bese dit weggesteek het tot nou. Begin handel in geloof.

Dit maak deure en vensters oopgaan vir God om in te kom. Dit laat die engele hulle kragte ook by jou kom ingooi. Dit ontketen bo-natuurlike kragte en wondermagte.

As ons gaan fokus op die hekke van die hel, gee God die krag van die koninkryk om dit te bedien wat oorwinning verseker.

Oral om ons sien ons die gety aan die draai. Mense kom tot bekering.

Weet jy maar net verseker dat die koninkryk van die hemel aan jou gegee is (Mat 16:19a). Veg. Bedien. In Jesus se Naam. Gee net jou beste. Doen wat jou hand vind om te doen. Gehoorsaam die Gees se influistering. Glo!

STAAN OP EN DOEN WAT GOD GESÊ HET...

'n Prokureur-vriend van my bel my die week en sê op sy kenmerkende manier, maar meer ernstig as gewoonlik: "Ek het 'n millisekonde-ontmoeting met die lewende God gehad wat my lewe verander het! Dit was onbeskryflik! God is soveel groter en anders as wat enigeen van ons ooit kan dink. Ek het in my lewe nog nooit so vuil gevoel nie. Ek wou weghardloop ..."

God is so getrou. As jy op Hom gevra het om Homself, Sy hart en wil aan jou te openbaar – soos ons in hierdie strategiese rusperiode doen – kan jy die een of ander tyd verwag dat God met jou presies dit gaan doen! En as dit gebeur het ...as Hy gepraat het ...moet ons opstaan en gaan doen wat Hy sê.

Kom ek haal vir jou Joh 5:1 tot 9 in hierdie verband aan: "Hierna was daar weer 'n fees van die Jode, en Jesus het daarvoor Jerusalem toe gegaan. By die Skaappoort in Jerusalem was daar 'n bad met die Hebreuse naam Betesda. Dit het vyf pilaargange gehad, waar daar baie gestremdes gelê het: blindes, kreupeles en lammes. Onder hulle was daar 'n sekere man wat al ag en dertig jaar lank siek was. Jesus het hom sien lê en het geweet dat hy al baie lank siek was. Toe vra Hy vir hom: 'Wil jy gesond word?' Die sieke het Hom geantwoord: 'Meneer, ek het niemand om my in die bad te sit as die water in beweging kom nie; en terwyl ek aansukkel, gaan iemand anders voor my in.' Jesus sê toe vir hom: 'Staan op, tel jou goed op en loop.' Oombliklik het die man gesond geword, sy goed opgetel en geloop."

Hier het ons 'n man wat deel was van 'n bepaalde godsdienstige gemeenskap wat geweet het God werk by hierdie bad van Betesda, daar in Jerusalem. Hulle het geglo as daardie water begin roer sonder dat iemand daarvoor verantwoordelik is, en jy is die eerste een wat in daardie water klim, word jy gesond. Dit is waarom sy familie hierdie man hierheen gebring het. Dit is waarom hy hier leef, eet en slaap.

Hoeveel jare hy al langs hierdie bad op die Here sit en wag het, weet ons nie. Al wat ons weet is dat hy, toe Jesus by hom uitkom, al 38 jaar lank siek is. Verder weet ons ook dat daardie water al 'n paar keer bonatuurlik geroer het, en telkens moes hy terleurgesteld beleef hoe ander voor hom in die water kom.

Ek wil nie te veel detail hierop ingaan nie. Al wat ek vir jou wil wys is dat ons soms so geprogrammeer kan wees om te verwag dat God op 'n sekere manier praat of werk, dat ons soms nie eers God herken as Hy op 'n ander manier begin praat of werk nie. Hierdie man wag op die water om te roer, want so het hy en sy mense geglo God werk. Maar toe daag Jesus skielik op 'n dag in lewende lywe self daar op. En wat doen Hy? Hy roer nie die water soos almal verwag het nie. Nee, Hy vra net: "Wil jy gesond word?" en as Hy klaar geluister het na die man se antwoord, sê Hy eenvoudig: "Staan op, tel jou goed op en loop."

Ek beleef die Here sê vir baie van ons dat ons hierdie ding in ons kop het hoe ons verwag God moet werk of praat, want so het ons uit die verlede, uit ervaring, geleer of beleef hoe dit werk. Kom ek wees prakties: Ek kom uit 'n tipies Gereformeerde agtergrond waarin ek geleer en ervaar het dat as God moet praat, praat Hy deur die Bybel. Daarom was dit vir my 'n reuse verrassing om te ontdek God praat ook deur Sy Gees in my gees; dit kom letterlik soos gedagtes by my op. Voor ek dit verstaan het, het ek gedink dit was ek wat hierdie "blink gedagte" gekry het! Later het ek ontdek dat God, deur Sy Gees, wat hier in my liggaam woon, self ook so met my kan praat!

Mettertyd het ek geleer God praat ook nog op baie ander maniere. Hy praat byvoorbeeld deur ander gelowiges om my. Eintlik het ek dit nog altyd geweet. Ek het immers geweet Hy gebruik my as leraar om met gelowiges te praat. Maar soos wat ek die gawes van die Gees beter leer ken het, het ek ook ontdek, behalwe deur lering, gebruik die Here my en andere deur die gawe van profesie, of 'n woord van wysheid of kennis, of 'n woord van bemoediging, of buitengewone leierskap, of bediening, ensovoorts, om as die lewende God self mense te bedien.

Natuurlik moes ons elke keer seker maak of dit werklik God was wat gepraat het. En of die gedagte of die woord nie dalk van elders gekom het nie. 'n Mens kon dit immers self uitgedink het (dan was dit bloot "uit die vlees"). Of dit kon dalk letterlik die bese wees wat die gedagte by my of iemand anders laat opkom het (2 Kor 11:3). Soms ontdek ons dat ons maar eintlik net dink of sê wat die res van die gemeenskap om ons gedink of gesê het.

"Hoe weet ek dan wanneer is dit wie?" vra jy dalk. My antwoord is redelik eenvoudig: Ons toets dit soos 1 Tess 5:19-24 sê ons moet doen met enige woord wat ons ontvang; of ons dit nou deur profesie ontvang het, of van 'n prediker, of dalk was dit 'n gedagte wat by ons opgekom het. Die toets bly dieselfde:

- Herken jy dit as God se stem? (Joh 10:3-5) As jy 'n volwasse Christen is (in Johannes 10 se terme: 'n "skaap", en nie meer 'n lammertjie nie) het jy al 'n klomp keer in die verlede God gehoor praat. Soveel keer dat jy al teen hierdie tyd, Sy stem behoort te herken.
- Beleef jy 'n vrede hierbinne oor die inhoud van hierdie gedagte of woord? Kol 3:15 sê immers dat ons innerlike vrede baie keer soos 'n skeidsregter is wat net die spel in vrede laat aangaan as alles volgens die reëls gebeur. Maar wat gou die fluitjie sal blaas (onvrede veroorsaak) as dinge nie reg gebeur nie.
- Hier diep binne in elkeen van ons – in wie die Heilige Gees woon – is dit asof ons 'n soort ingeboude "radarstelsel" het wat waarsku as dinge net nie reg is nie. (Ons lees bv hiervan daar in 1 Kon 22:7).
- Klop dit met die res van die Bybel se boodskap? (Deut 13)
- Word dit bevestig deur ander gelowiges wat jou dalk bedien met van die ander gawes van die Heilige Gees (sy dit 'n woord van wysheid; of profesie; of lering; of bemoediging – 1 Kor 12:4-11)
- Bevestig die Here dit deur drome of visioene? Of deur deure wat oop gaan of toe gaan? (Hand 16:6-10; Joh 9:3 ev;)
- En uiteindelik, realiseer dit nadat jy al die voorwaardes of opdragte uitgevoer het? (Deut 18:22)

Om God te hoor praat met jou en my, is so 'n kardinale deel van praktiese Christenwees elke dag. Dit is wat ons die afgelope tyd aanmekaar mekaar uitdaag om te soek. Ons moet immers presies weet hoe ons elkeen inpas in God se prentjie; hoe die Here elkeen van ons presies wil gebruik; en wat ons in die gemeente en in die gemeenskap moet doen en wees. Daarom is dit lewensnoodsaaklik dat ons elkeen by God self sal hoor. En as ons dan gehoor het, moet ons opstaan en gaan doen wat Hy sê.

'n Strategiese periode van rus is bykans verby. Het jy God gehoor praat met jou? Wat het Hy vir jou oor jou spesifiek gesê? Is jy nog op die regte plek en besig met die regte dinge vir nou?

As jy gehoor het, moet jy nou opstaan en gelowig gehoorsaam begin doen wat Hy gesê het.